

## STACE

## SILVES (3894 vers)

## ECVS MAXIMVS DOMITIANI IMP.

S1\_1 v.1 Quae superinposito moles geminata colosso  
 2 stat Latium complexa forum ? Caelone peractum  
 3 fluxit opus ? Siculis an conformata caminis  
 4 effigies lassum Steropem Brontemque reliquit ?  
 5 an te Palladiae talem, Germanice, nobis  
 6 effecere manus, qualem modo frena tenentem  
 7 Rhenus et attoniti vidit domus ardua Daci ?  
 8 Nunc age Fama prior notum per saecula nomen  
 9 Dardanii miretur equi cui vertice sacro  
 10 Dindymon et caesis decrevit frondibus Ide :  
 11 hunc neque discissis cepissent Pergama muris  
 12 nec grege permixto pueri innuptaeque puellae  
 13 ipse nec Aeneas nec magnus duceret Hector.  
 14 Adde, quod ille nocens saevosque amplexus Achivos,  
 15 hunc mitis commendat eques : juvat ora tueri  
 16 mixta notis belli placidamque gerentia pacem.  
 17 Nec veris majora putes : par forma decorque,  
 18 par honor. Exhaustis Martem non altius armis  
 19 Bistonius portat sonipes magnoque superbit  
 20 pondere nec tardo raptus prope flumina cursu  
 21 fumat et ingenti propellit Strymona flatu.  
 22 Par operi sedes. Hinc obvia limina pandit,  
 23 qui fessus bellis adsertae munere prolis  
 24 primus iter nostris ostendit in aethera divis ;  
 25 discit et e vultu, quantum tu mitior armis,  
 26 qui nec in externos facilis saevire furores  
 27 das Cattis Dacisque fidem. Te signa ferente  
 28 et minor in leges iret gener et Cato castris.  
 29 At laterum passus hinc Julia tecta tuentur,  
 30 illinc belligeri sublimis regia Pauli,  
 31 terga pater blandoque videt Concordia vultu.  
 32 Ipse autem puro celsum caput aere saeptus  
 33 templa superfulges et prospectare videris,  
 34 an nova contemptis surgant Palatia flammis  
 35 pulchrius, an tacita vigilet face Troicus ignis  
 36 atque exploratas jam laudet Vesta ministras.  
 37 Dextra vetat pugnas, laevam Tritonia virgo  
 38 non gravat et sectae praetendit colla Medusae :  
 39 ceu stimulis accendit equum ; nec dulcior usquam  
 40 lecta deae sedes nec si, Pater, ipse teneres.  
 41 Pectora, quae mundi valeant evolvere curas,  
 42 et quis se totis Temese dedit hausta metallis ;  
 43 e tergo demissa chlamys. Latus ense quieto  
 44 securum, magnus quanto mucrone minatur  
 45 noctibus hibernis et sidera terret Orion.  
 46 At sonipes habitus animosque imitatus equestris  
 47 acrius attollit vultus cursumque minatur ;  
 48 cui rigidis stant colla jubis vivusque per armos

49 impetus et tantis calcaribus ilia late  
 50 suffectura patent. Vacuae pro cespite terrae  
 51 aerea captivi crinem tegit ungula Rheni.  
 52 Hunc etAdrasteus visum extimuisset Arion  
 53 et pavet aspiciens Ledaeus ab aede propinqua  
 54 Cyllarus. Hic domini numquam mutabit habenas  
 55 perpetuus frenis atque uni serviet astro.  
 56 Vix sola sufficiunt insessaque pondere toto  
 57 subter anhelat humus ; nec ferro aut aere, laborant  
 58 sub genio, teneat quamvis aeterna crepido,  
 59 quae superingesti portaret culmina montis  
 60 caeliferique attrita genu durasset Atlantis.  
 61 Nec longae traxere morae. Juvat ipsa labores  
 62 forma dei praesens operique intenta juvenus  
 63 miratur plus posse manus. Strepit ardua pulsu  
 64 machina ; continuus septem per culmina montis  
 65 it fragor et magnae vingit vaga murmura Romae.  
 66 Ipse loci custos, cujus sacrata vorago  
 67 famosique lacus nomen memorabile servant,  
 68 innumeros aeris sonitus et verbere crudo  
 69 ut sensit mugire Forum, movet horrida sancto  
 70 ora situ meritaque caput venerabile quercu.  
 71 Ac primum ingentes habitus lucemque coruscam  
 72 expavit majoris equi terque ardua mersit  
 73 colla lacu trepidans, laetus mox praeside viso ;  
 74 "Salve, magnorum proles genitorque deorum,  
 75 auditum longe numen mihi ! Nunc mea felix,  
 76 nunc veneranda palus, cum te prope nosse tuumque  
 77 immortale jubar vicina sede tueri  
 78 concessum. Semel auctor ego inventorque salutis  
 79 Romuleae : tu bella Jovis, tu proelia Rheni,  
 80 tu civile nefas, tu tardum in foedera montem  
 81 longo Marte domas. Quod si te nostra tulissent  
 82 saecula, temptasses me non audente profundo  
 83 ire lacu, set Roma tuas tenuisset habenas."  
 84 Cedat equus Latiae qui contra templa Diones  
 85 Caesarei stat sede fori (quem traderis ausus  
 86 Pellaeo, Lysippe, duci, mox Caesaris ora  
 87 mirata cervice tulit) : vix lumine fesso  
 88 explores, quam longus in hunc despectus ab illo.  
 89 Quis rudis usque adeo qui non, ut viderit ambos,  
 90 tantum dicat equos quantum distare regentes ?  
 91 Non hoc imbriferas hiemes opus aut Jovis ignem  
 92 tergeminum, Aeolii non agmina carceris horret  
 93 annorumve moras : stabit, dum terra polusque,  
 94 dum Romana dies. Hoc et sub nocte silenti,  
 95 cum superis terrena placent, tua turba relicto  
 96 labetur caelo miscebitque oscula ; juxta  
 97 ibit in amplexus natus fraterque paterque  
 98 et soror : una locum cervix dabit omnibus astris.  
 99 Utere perpetuum populi magnique senatus  
 100 munere. Apelleae cuperent te scribere cerae  
 101 optassetque novo similem te ponere templo  
 102 Atticus Elei senior Jovis, et tua mitis  
 103 ora Tarans, tua sidereas imitantia flammis  
 104 lumina contempto mallet Rhodos aspera Phoebus.  
 105 Certus ames terras et quae tibi templa dicamus  
 106 ipse colas ; nec te caeli juvet aula, tuosque

107        laetus huic dono videas dare tura nepotes.

EPITHALAMION IN STELLAM ET VIOLENTILLAM

S1\_2    v.1        Unde sacro Latii sonuerunt carmine montes ?  
          2        Cui, Paeon, nova plectra moves umeroque comanti  
          3        facundum suspendis ebur ? Procul ecce canoro  
          4        demigrant Helicone deae quatiuntque novena  
          5        lampade sollemnem thalamis coeuntibus ignem  
          6        et de Pieriis vocalem fontibus undam.  
          7        Quas inter vultu petulans Elegea propinquat  
          8        celsior adsueto divasque hortatur et ambit  
          9        alternum fultura pedem, decimamque videri  
 10        se cupit et medias fallit permixta sorores.  
 11        Ipsa manu nuptam genetrix Aeneia duxit  
 12        lumina demissam et dulci probitate rubentem,  
 13        ipsa toros et sacra parat coetuque Latino  
 14        dissimulata deam crinem vultusque genasque  
 15        temperat atque nova gestit minor ire marita.  
 16        Nosco diem causasque sacri : te concinit iste  
 17        (pande fores !) te, Stella, chorus ; tibi Phoebus et Euhan  
 18        et de Maenalia volucer Tegeaticus umbra  
 19       serta ferunt. Nec blandus Amor nec Gratia cessat  
 20        amplexum niveos optatae conjugis artus  
 21        floribus innumeris et olenti spargere nimbo.  
 22        Tu modo fronte rosas, violis modo lilia mixta  
 23        excipis et dominae niveis a vultibus obstas.  
 24        Ergo dies aderat Parcarum conditus albo  
 25        vellere, quo Stellae Violentillaeque professus  
 26        clamaretur hymen. Cedant curaeque metusque,  
 27        cessent mendaces obliqui carminis astus,  
 28        Fama tace : subiit leges et frena momordit  
 29        ille solutus amor. Consumpta est fabula vulgi  
 30        et narrata diu viderunt oscula cives.  
 31        Tu tamen attonitus, quamvis data copia tantae  
 32        noctis, adhuc optas permissaque numine dextro  
 33        vota paves. Pone, o dulcis, suspiria, vates,  
 34        pone : tua est. Licet expositum per limen aperto  
 35        ire redire gradu : jam nusquam janitor aut lex  
 36        aut pudor. Amplexu tandem satiare petito  
 37        (contigit !) Et duras pariter reminiscere noctes.  
 38        Digna quidem merces, et si tibi Juno labores  
 39        Herculeos, Stygiis et si concurrere monstris  
 40        Fata darent, si Cyaneos raperere per aestus.  
 41        Hanc propter tanti Pisaea lege trementem  
 42        currere et Oenomai fremitus audire sequentis.  
 43        Nec si Dardania pastor temerarius Ida  
 44        sedisses, haec dona forent, nec si alma per auras  
 45        te potius pensa veheret Tithonia biga.  
 46        Sed quae causa toros inopinaque gaudia vatis  
 47        attulit ? Hic mecum, dum fervent agmine postes  
 48        atriaque et multa pulsantur limina virga,  
 49        hic, Erato jucunda, doce. Vacat apta movere  
 50        colloquia, et docti norunt audire penates.  
 51        Forte, serenati qua stat plaga lactea caeli,  
 52        alma Venus thalamo pulsa modo nocte jacebat  
 53        amplexu duro Getici resoluta mariti.

54 Fulcra torosque deae tenerum premit agmen Amorum ;  
 55 signa petunt quas ferre faces, quae pectora figi  
 56 imperet ; an terris saevire an malit in undis,  
 57 an miscere deos an adhuc vexare Tonantem.  
 58 Ipsi animus nondum nec cordi fixa voluntas.  
 59 Fessa jacet stratis, ubi quondam conscia culpae  
 60 Lemnia deprenso repserunt vincula lecto.  
 61 Hic puer e turba volucrum, cui plurimus ignis  
 62 ore manuque levi numquam frustrata sagitta,  
 63 agmine de medio tenera sic dulce profatur  
 64 voce (pharetrati pressere silentia fratres) :  
 65 "Scis ut, mater," ait "nulla mihi dextera segnis  
 66 militia ; quemcumque hominum divumque dedisti,  
 67 uritur. At quondam lacrimis et supplice dextra  
 68 et votis precibusque virum concede moveri,  
 69 o genetrix : duro nec enim ex adamante creati,  
 70 sed tua turba sumus. Clarus de gente Latina  
 71 est juvenis, quem patriciis majoribus ortum  
 72 Nobilitas gavisa tulit praesagaque formae  
 73 protinus e nostro posuit cognomina caelo.  
 74 Hunc egomet tota quondam (tibi dulce) pharetra  
 75 improbus et densa trepidantem cuspide fixi.  
 76 Quamvis Ausoniis multum gener ille petitus  
 77 matribus, edomui victum dominaeque potentis  
 78 ferre jugum et longos jussi sperare per annos.  
 79 Ast illam summa leviter (sic namque jubebas)  
 80 lampade parcentes et inertis strinximus arcu.  
 81 Ex illo quantos juvenis premat anxius ignes,  
 82 testis ego attonitus, quantum me nocte dieque  
 83 urgentem ferat. Haud ulli vehementior umquam  
 84 incubui, genetrix, iterataque vulnera fodi.  
 85 Vidi ego et immiti cupidum decurrere campo  
 86 Hippomenen, nec sic meta pallebat in ipsa ;  
 87 vidi et Abydeni juvenis certantia remis  
 88 brachia laudavique manus et saepe natanti  
 89 praeluxi : minor ille calor quo saeva tepebant  
 90 aequora : tu veteres, juvenis, transgressus amores.  
 91 Ipse ego te tantos stupui durasse per aestus  
 92 firmavique animos blandisque madentia plumis  
 93 lumina deterse. Quotiens mihi questus Apollo,  
 94 sic vatem maerere suum ! jam, mater, amatos  
 95 indulge thalamos. Noster comes ille piusque  
 96 signifer; armiferos poterat memorare labores  
 97 claraque facta virum et torrentes sanguine campos,  
 98 sic tibi plectra dedit mitisque incedere vates  
 99 maluit et nostra laurum subtexere myrto.  
 100 Hic juvenum lapsus suaque aut externa revolvit  
 101 vulnera ; pro ! quanta est Paphii reverentia, mater,  
 102 numinis : hic nostrae deflevit fata columbae."  
 103 Finierat ; tenera matris cervice pependit  
 104 blandus et admotis tepefecit pectora pennis.  
 105 Illa refert vultum non aspernata rogari :  
 106 "Grande quidem rarumque viris, quos ipsa probavi,  
 107 Pierius votum juvenis cupit. Hanc ego formae  
 108 egregium mirata decus, cui gloria patrum  
 109 et generis certabat honos, tellure cadentem  
 110 excepi fovique sinu nec colla genasque  
 111 comere nec pingui crinem deducere amomo

112 cessavit mea, nate, manus. Mihi dulcis imago  
 113 prosiluit. Celsae procul aspice frontis honorem  
 114 suggestumque comae. Latias metire quid ultra  
 115 emineat matres : quantum Latonia Nymphas  
 116 virgo premit quantumque egomet Nereidas exsto.  
 117 Haec et caeruleis mecum consurgere digna  
 118 fluctibus et nostra potuit considerare concha,  
 119 et si flammigeras potuisset scandere sedes  
 120 hasque intrare domos, ipsi erraretis, Amores.  
 121 Huic quamvis census dederim largita beatos,  
 122 vincit opes animo. Queritor jam Seras avaros  
 123 angustum spoliare nemus Clymenaeaque deesse  
 124 germina nec virides satis inlacrimare sorores,  
 125 vellera Sidonio jam pauca rubescere tabo  
 126 raraque longaevus nivibus crystallae gelari.  
 127 Huic Hermum fulvoque Tagum decurrere limo  
 128 (nec satis ad cultus), huic Inda monilia Glaucum  
 129 Proteaque atque omnem Nereida quaerere jussi.  
 130 Hanc si Thessalicos vidisses, Phoebe, per agros,  
 131 erraret secunda Daphne. Si in litore Naxi  
 132 Theseum juxta foret haec conspecta cubile,  
 133 Gnosida desertam profugus liquisset et Euan.  
 134 Quod nisi me longis placasset Juno querelis,  
 135 falsus huic pennas et cornua sumeret aethrae  
 136 rector, in hanc vero cecidisset Juppiter auro.  
 137 Sed dabitur juveni, cui tu, mea summa potestas,  
 138 nate, cupis, thalami quamvis juga ferre secundi  
 139 saepe neget maerens. Ipsam jam cedere sensi  
 140 inque vicem tepuisse viro." Sic fata levavit  
 141 sidereos artus thalamicum egressa superbum  
 142 limen Amyclaeos ad frena citavit olores.  
 143 Jungit Amor laetamque vehens per nubila matrem  
 144 gemmato temone sedet. Jam Thybridis arces  
 145 Iliacae : pandit nitidos domus alta penates  
 146 claraque gaudentes plauserunt limina cygni.  
 147 Digna deae sedes, nitidis nec sordet ab astris.  
 148 Hic Libycus Phrygiusque silex, hic dura Laconum  
 149 saxa virent, hic flexus onyx et concolor alto  
 150 vena mari rupesque nitent quis purpura saepe  
 151 Oebalis et Tyrrii moderator livet aeni.  
 152 Pendent innumeris fastigia nixa columnis,  
 153 robora Dalmatico lucent satiata metallo.  
 154 Excludunt radios silvis demissa vetustis  
 155 frigora, perspicui vivunt in marmore fontes.  
 156 Nec servat natura vices : hic Sirius alget,  
 157 bruma tepet, versumque domus sibi temperat annum.  
 158 Exsultat visu tectisque potentis alumnae  
 159 non secus alma Venus quam si Paphon aequore ab alto  
 160 Idaliasque domos Erycinaque templa subiret.  
 161 Tunc ipsam solo reclinem adfata cubili :  
 162 "Quonam hic usque sopor vacuique modestia lecti,  
 163 o mihi Laurentes inter dilecta puellas ?  
 164 quis morum fideique modus ? numquamne virili  
 165 summittere jugo ? veniet jam tristior aetas.  
 166 Exerce formam et fugientibus utere donis.  
 167 Non ideo tibi tale decus vultusque superbos  
 168 meque dedi, viduos ut transmittare per annos  
 169 ceu non cara mihi. Satis o nimiumque priores

170 despexisse procos. At enim hic tibi sanguine toto  
 171 deditus unam omnes inter miratur amatque  
 172 nec formae nec stirpis egens. Nam docta per urbem  
 173 carmina qui juvenes, quae non didicere puellae ?  
 174 Hunc et bisenos (sic indulgentia pergat  
 175 praesidis Ausonii) cernes attollere fasces  
 176 ante diem ; certe jam nunc Cybeleia movit  
 177 limina et Euboicae carmen legit ille Sibyllae.  
 178 Jamque parens Latius, cujus praenoscerent mentem  
 179 fas mihi, purpureos habitus juvenique curule  
 180 indulgebit ebur Dacasque (et gloria major)  
 181 exuvias laurosque dabit celebrare recentes.  
 182 Ergo age, junge toros atque otia deme juventae.  
 183 Quas ego non gentes, quae non face corda jugali ?  
 184 Alituum pecudumque mihi durique ferarum  
 185 non renuere greges, ipsum in conubia terrae  
 186 aethera, cum pluviis rarescunt nubila, solvo.  
 187 Sic rerum series mundique revertitur aetas.  
 188 Unde novum Trojae decus ardentumque deorum  
 189 raptorem, Phrygio si non ego juncta marito,  
 190 Lydius unde meos iterasset Thybris Iulos ?  
 191 Quis septemgeminae posuisset moenia Romae  
 192 imperii Latiale caput, ni Dardana furto  
 193 cepisset Martem, nec me prohibente, sacerdos ? "  
 194 His mulcet dictis tacitaeque inspirat honorem  
 195 conubii. Redeunt animo jam dona precesque  
 196 et lacrimae vigilesque viri prope limina questus,  
 197 Asteris et vatis totam cantata per urbem,  
 198 Asteris ante dapes, nocte Asteris, Asteris ortu,  
 199 quantum non clamatus Hylas. Jamque aspera coepit  
 200 flectere corda libens et jam sibi dura videri.  
 201 Macte toris, Latios inter placidissime vates,  
 202 quod durum permensus iter coeptique laboris  
 203 prendisti portus. Nitidae sic transfuga Pisae  
 204 amnis in externos longe flammatus amores  
 205 flumina demerso trahit intemerata canali,  
 206 donec Sicarios tandem prolatus anhelos  
 207 ore bibat fontes ; miratur dulcia Nais  
 208 oscula nec credit pelago venisse maritum.  
 209 Quis tibi tunc alacri caelestum in munere claro,  
 210 Stella, dies, quanto salierunt pectora voto,  
 211 dulcia cum dominae dexter conubia vultus  
 212 adnuit ! ire polo nitidosque errare per axes  
 213 visus. Amyclaeis minus exsultavit harenis  
 214 pastor ad Idaeas Helena veniente carinas ;  
 215 Thessala nec talem viderunt Pelea Tempe,  
 216 cum Thetin Haemoniis Chiron accedere terris  
 217 erecto prospexit equo. Quam longa morantur  
 218 sidera ! quam segnis votis Aurora mariti !  
 219 At procul ut Stellae thalamos sensere parari  
 220 Letous vatum pater et Semeleius Euan,  
 221 hic movet Ortygia, movet hic rapida agmina Nysa.  
 222 Huic Lycii montes gelidaeque umbracula Thymbrae  
 223 et Parnasus honos, illi Pangaea resultant  
 224 Ismaraque et quondam genialis litora Naxi.  
 225 Tunc caras iniere fores comitique canoro  
 226 hic chelyn, hic flavam maculoso nebrida tergo,  
 227 hic thyrsos, hic plectra ferunt ; hic enthea lauro

228 tempora, Minoa crinem premit ille corona.  
 229 Vixdum emissa dies, et jam socialia praesto  
 230 omina, jam festa fervet domus utraque pompa.  
 231 Fronde virent postes, effulgent compita flammis,  
 232 et pars immensae gaudet celeberrima Romae.  
 233 Omnis honos, cuncti veniunt ad limina fasces,  
 234 omnis plebeio teritur praetexta tumultu ;  
 235 hinc eques, hinc juvenum questus, stola mixta laborat.  
 236 Felices utrosque vocant, sed in agmine plures  
 237 invidere viro. Jamdudum poste reclinis  
 238 quaerit Hymen thalamis intactum dicere carmen,  
 239 quo vatem mulcere queat. Dat Juno verenda  
 240 vincula et insigni geminat Concordia taeda.  
 241 Hic fuit ille dies ; noctem canat ipse maritus  
 242 quantum nosse licet. Sic victa sopore doloso  
 243 Martia fluminea posuit latus Ilia ripa ;  
 244 non talis niveos tinxit Lavinia vultus,  
 245 cum Turno spectante rubet ; non Claudia talis  
 246 respexit populos mota jam virgo carina.  
 247 Nunc opus, Aonidum comites tripodumque ministri,  
 248 diversis certare modis : eat enthea vittis  
 249 atque hederis redimita cohors, ut pollet ovanti  
 250 quisque lyra. Sed praecipui, qui nobile gressu  
 251 extremo fraudatis opus, date carmina festis  
 252 digna toris. Hunc ipse Coo plaudente Philitas  
 253 Callimachusque senex Umbroque Propertius antro  
 254 ambissent laudare diem, nec tristis in ipsis  
 255 Naso Tomis divesque foco lucente Tibullus.  
 256 Me certe non unus amor simplexque canendi  
 257 causa trahit : tecum similes junctaeque Camenae,  
 258 Stella, mihi, multumque pares bacchamur ad aras  
 259 et sociam doctis haurimus ab amnibus undam ;  
 260 at te nascentem gremio mea prima recepit  
 261 Parthenope, dulcisque solo tu gloria nostro  
 262 reptasti. Nitidum consurgat ad aethera tellus  
 263 Eubois et pulchra tumeat Sebethos alumna ;  
 264 nec sibi sulphureis Lucrinae Naides antris  
 265 nec Pompeiani placeant magis otia Sarni.  
 266 Heia age, praeclaros Latio properate nepotes,  
 267 qui leges, qui castra legant, qui carmina ludant.  
 268 Acceleret partu decimum bona Cynthia mensem,  
 269 sed parcat Lucina precor ; tuque ipse parenti  
 270 parce, puer, ne mollem uterum, ne stantia laedas  
 271 pectora ; cumque tuos tacito natura recessu  
 272 formarit vultus, multum de patre decoris,  
 273 plus de matre feras. At tu, pulcherrima forma  
 274 Italidum, tandem merito possessa marito,  
 275 vincla diu quaesita fove : sic damna decoris  
 276 nulla tibi ; longe virides sic flore juventae  
 277 perdurent vultus, tardeque haec forma senescat.

VILLA TIBVRTINA MANILII VOPISCI

S1\_3 v.1 Cernere facundi Tibur glaciale Vopisci  
 2 si quis et inserto geminos Aniene penates,  
 3 aut potuit sociae commercia noscere ripae

4 certantisque sibi dominum defendere villas,  
 5 illum nec calido latravit Sirius astro  
 6 nec gravis aspexit Nemeae frondentis alumnus :  
 7 talis hiems tectis, frangunt sic improba solem  
 8 frigora, Pisaeumque domus non aestuat annum.  
 9 Ipsa manu tenera tecum scripsisse Voluptas  
 10 tunc Venus Idaliis unxit fastigia sucis  
 11 permulsitque comis blandumque reliquit honorem  
 12 sedibus, et volucres vetuit discedere natos.  
 13 O longum memoranda dies ! quae mente reporto  
 14 gaudia, quam lassos per tot miracula visus !  
 15 ingenium quam mite solo, quae forma beatissimis  
 16 ante manus artemque locis ! Non largius usquam  
 17 indulisit Natura sibi. Nemora alta citatis  
 18 incubuere vadis ; fallax responsat imago  
 19 frondibus, et longas eadem fugit umbra per undas.  
 20 Ipse Anien (miranda fides) infraque superque  
 21 saxeus hic tumidam rabiem spumosaque ponit  
 22 murmura, ceu placidi veritus turbare Vopisci  
 23 Pieriosque dies et habentes carmina somnos.  
 24 Litus utrumque domi, nec te mitissimus amnis  
 25 dividit. Alternas servant praetoria ripas,  
 26 non externa sibi fluviorum obstare queruntur.  
 27 Sestiacos nunc Fama sinus pelagusque natatum  
 28 jactet et audaci victos delphinis ephebo.  
 29 Hic aeterna quies, nullis hic jura procellis,  
 30 numquam fervor aquis. Datur hic transmittere visus  
 31 et voces et paene manus. Sic Chalcida fluctus  
 32 expellunt fluvii, sic dissociata profundo  
 33 Bruttia Sicanium circumspicit ora Pelorum.  
 34 Quid primum mediumve canam, quo fine quiescam ?  
 35 Auratasne trabes an Mauros undique postes  
 36 an picturata lucentia marmora vena  
 37 mirer, an emissas per cuncta cubilia nymphas ?  
 38 Huc oculis, huc mente trahor. Venerabile dicam  
 39 lucorum senium ? Te, quae vada fluminis infra  
 40 cernis, an ad silvas quae respicis, aula, tacentis,  
 41 qua tibi tota quies offensaque turbine nullo  
 42 nox silet et nigros imitantia murmura somnos ?  
 43 An quae graminea suscepta crepidine fumant  
 44 balnea et impositum ripis argentibus ignem,  
 45 quaque vaporiferis junctus fornacibus amnis  
 46 ridet anhelantes vicino flumine nymphas ?  
 47 Vidi artes veterumque manus variisque metalla  
 48 viva modis. Labor est auri memorare figuras  
 49 aut ebur aut dignas digitis contingere gemmas,  
 50 quicquid et argento primum, vel in aere minori  
 51 lusit et enormes manus est experta colossos.  
 52 Dum vagor aspectu visusque per omnia duco,  
 53 calcabam necopinus opes. Nam splendor ab alto  
 54 defluus et nitidum referentes aera testae  
 55 monstravere solum, varias ubi picta per artes  
 56 gaudet humus superatque novis asarota figuris :  
 57 expavere gradus. Quid nunc jungentia mirer  
 58 aut quid partitis distantia tecta trichoris ?  
 59 Quid te, quae mediis servata penatibus arbor  
 60 tecta per et postes liquidas emergis in auras,  
 61 quo non sub domino saevas passura bipennes ?



62 Et nunc ignaro forsā vel lubrica Nais  
 63 vel non abruptos tibi demet Hamadryas annos.  
 64 Quid referam alternas gemino super aggere mensas  
 65 albescentesque lacus altosque in gurgite fontes  
 66 teque, per obliquum penitus quae laberis amnem,  
 67 Marcia, et audaci transcurris flumina plumbo ?  
 68 An solum Ioniis sub fluctibus Elidis amnem  
 69 dulcis ad Aetnaeos deducat semita portus ?  
 70 Illic ipse antris Anien en fonte relicto  
 71 nocte sub arcana glaucos exutus amictus  
 72 hac illac fragili prosternit pectora musco,  
 73 aut ingens in stagna cadit vitreasque natatu  
 74 plaudit aquas. Illa recubat Tiburnus in umbra,  
 75 illic sulphureos cupit Albula mergere crines ;  
 76 haec domus Egeriae nemoralem abjungere Phoeben  
 77 et Dryadum viduare choris argentia possit  
 78 Taygeta et silvis accersere Pana Lycaeis.  
 79 Quod ni templa darent alias Tirynthia sortes,  
 80 et Praenestinae poterant migrare sorores.  
 81 Quid bifera Alcinoi laudem pomaria vosque,  
 82 qui numquam vacui prodistis in aethera, rami ?  
 83 Cedant Telegoni, cedant Laurentia Turni  
 84 jugera Lucrinaeque domus litusque cruenti  
 85 Antiphatae, cedant vitreae juga perfida Circes  
 86 Dulichiis ululata lupis arcesque superbae  
 87 Anxyris et sedes Phrygio quas mitis alumno  
 88 debet anus ; cedant, quae te jam solibus artis  
 89 avia nimbose revocabunt litora bruma.  
 90 Scilicet hic illi meditantur pondera mores,  
 91 hic premitur fecunda quies virtusque serena  
 92 fronte gravis sanusque nitor luxuque carentes  
 93 deliciae, quas ipse suis digressus Athenis  
 94 mallet deserto senior Gargettius horto ;  
 95 haec per et Aegaeas hiemes Pliadumque nivolum  
 96 sidus et Oleniis dignum petiisse sub astris,  
 97 si Maleae credenda ratis Siculosque per aestus  
 98 sit via : cur oculis sordet vicina voluptas ?  
 99 Hic tua Tiburtes Faunos chelys et juvat ipsum  
 100 Alciden dictumque lyra majore Catillum,  
 101 seu tibi Pindaricis animus contendere plectris  
 102 sive chelyn tollas heroa ad robora sive  
 103 viventem satiram nigra rubigine turbes  
 104 seu tua non alia splendescat epistola cura.  
 105 Digne Midae Croesique bonis et Perside gaza,  
 106 macte bonis animi, cujus stagnantia rura  
 107 debuit et flavis Hermus transcurrere ripis  
 108 et limo splendente Tagus. Sic docta frequentes  
 109 otia, sic omni detectus pectora nube  
 110 finem Nestoreae precor egrediare senectae.

## SOTERIA RVTILII GALLICI

S1\_4 v.1 Estis, io, superi, nec inexorabile Clotho  
 2 volvit opus, videt alma pios Astraea Jovique  
 3 conciliata redit, dubitataque sidera cernit  
 4 Gallicus. Es caelo dive, es, Germanice, cordi

5 (quis neget ?) : erubuit tanto spoliare ministro  
 6 imperium Fortuna tuum. Stat proxima cervix  
 7 ponderis immensi damnosaque fila senectae  
 8 exuit atque alios melior revirescit in annos.  
 9 Ergo alacres, quae signa colunt urbana, cohortes  
 10 inque sinum quae saepe tuum fora turbida questum  
 11 confugiunt leges urbesque ubicumque togatae,  
 12 quae tua longinquis implorant jura querelis,  
 13 certent laetitia, nosterque ex ordine collis  
 14 confremat et sileant pejoris murmura famae.  
 15 Quippe manet longumque aevo redeunte manebit  
 16 quem penes intrepidae mitis custodia Romae.  
 17 Nec tantum induerint Fatis nova saecula crimen  
 18 aut instaurati peccaverit ara Tarenti.  
 19 Ast ego nec Phoebum, quamquam mihi surda sine illo  
 20 plectra, nec Aonias decima cum Pallade divas  
 21 aut mitem Tegeae Dircesve hortabor alumnum :  
 22 ipse veni viresque novas animumque ministra,  
 23 qui caneris ; docto nec enim sine numine tantus  
 24 Ausoniae decora ampla togae centumque dedisti  
 25 iudicium mentemque viris. Licet enthea vatis  
 26 excludat Piplea sitim nec conscia detur  
 27 Pirene : largos potius mihi gurges in haustus  
 28 qui rapitur de fonte tuo, seu plana solutis  
 29 quom struis orsa modis seu quom tibi dulcis in artem  
 30 frangitur et nostras curat facundia leges.  
 31 Quare age, si Cereri sua dona merumque Lyaeo  
 32 reddimus et dives praedae tamen accipit omni  
 33 exuvias Diana tholo captivaque tela  
 34 bellipotens : nec tu ,quando tibi, Gallice, majus  
 35 eloquium fandique opibus sublimis abundas,  
 36 sperne coli tenuiore lyra. Vaga cingitur astris  
 37 luna, et in Oceanum rivi cecidere minores.  
 38 Quae tibi sollicitus persolvit praemia morum  
 39 Urbis amor ! quae tum patrumque equitumque notavi  
 40 lumina et ignarae plebis lugere potentes !  
 41 Non labente Numa timuit sic curia felix  
 42 Pompeio nec celsus eques nec femina Bruto.  
 43 Hoc illud : tristis invitum audire catenas,  
 44 parcere verberibus nec qua jubet alta potestas  
 45 ire, set armatas multum sibi demere vires  
 46 dignarique manus humilis et verba precantum,  
 47 reddere jura foro nec proturbare curules  
 48 et ferrum mulcere toga. Sic itur in alta  
 49 pectora, sic mixto reverentia fidit amori.  
 50 Ipsa etiam cunctos gravis inclementia fati  
 51 terruit et subiti praeceps juvenile pericli,  
 52 nil cunctante malo. Non illud culpa senectae  
 53 (quippe ea bisseis vixdum orsa excedere lustris),  
 54 sed labor intendens animique in membra vigentis  
 55 imperium vigilesque suo pro Caesare curae,  
 56 dulce opus. Hinc fessos penitus subrepsit in artus  
 57 insidiosa quies et pigra oblivio vitae.  
 58 Tunc deus, Alpini qui juxta culmina dorsi  
 59 signat Apollineos sancto cognomine lucos,  
 60 respicit heu tanti pridem securus alumni  
 61 praegressusque moras : "Hinc mecum, Epidauria proles,  
 62 hinc", ait, "i gaudens : datur (aggradienda facultas)

63       ingentem recreare virum. Teneamus adorti  
64       (tendatis jam fila !) colos. Ne fulminis atri  
65       sit metus : has ultro laudarit Juppiter artes.  
66       Nam neque plebeiam aut dextro sine numine cretam  
67       servo animam. Atque adeo breviter, dum tecta subimus,  
68       expediam. Genus ipse suis permissaque retro  
69       nobilitas ; nec origo latet, sed luce sequente  
70       vincitur et magno gaudet cessisse nepoti.  
71       Prima togae virtus illi quoque : clarus et ingens  
72       eloquio ; mox innumeris exercita castris  
73       occiduas primasque domos et sole sub omni  
74       permeruit jurata manus, nec in otia pacis  
75       permissum laxare animos ferrumque recingi.  
76       Hunc Galatea vigens ausa est incessere bello  
77       (me quoque !) perque novem timuit Pamphylia messes  
78       Pannoniusque ferox arcuque horrenda fugaci  
79       Armenia et patiens Latii jam pontis Araxes.  
80       Quid geminos fasces magnaue iterata revolvam  
81       jura Asiae ? velit illa quidem ter habere quaterque  
82       hunc sibi, sed revocant fasti majorque curulis  
83       nec permissa semel. Libyci quid mira tributis  
84       obsequia et missum media de pace triumphum  
85       laudem et opes ? tantas nec qui mandaverat ausus  
86       expectare fuit : gaudet Trasimennus et Alpes  
87       Cannensesque animae ; primusque insigne tributum  
88       ipse palam laeta poscebat Regulus umbra.  
89       Non vacat Arctoas acies Rhenumque rebellem  
90       captivaeque preces Veledae et, quae maxima nuper  
91       gloria, depositam Dacis pereuntibus Urbem  
92       pandere, cum tanti lectus rectoris habenas,  
93       Gallice, Fortuna non admirante subisti.  
94       Hunc igitur, si digna loquor, rapiemus iniquo,  
95       nate, Jovi. Rogat hoc Latiae pater inclitus urbis  
96       et meruit ; neque enim frustra mihi nuper honora  
97       carmina patricio pueri sonuistis in ostro.  
98       Si qua salutifero gemini Chironis in antro  
99       herba, tholo quodcumque tibi Trojana recondit  
100       Pergamus aut medicis felix Epidaurus harenis  
101       educat, Idaea profert quam Creta sub umbra  
102       dictamni florentis opem, quoque anguis abundat  
103       spumatu : jungam ipse manus atque omne benigne  
104       virus, odoriferis Arabum quod doctus in arvis  
105       aut Amphrysiaco pastor de gramine carpsi."  
106       Dixerat. Inveniunt positos jam segniter artus  
107       pugnantemque animam ; ritu se cingit uterque  
108       Paeonio monstrantque simul parentque volentes,  
109       donec letiferas vario medicamine pestes  
110       et suspecta mali ruperunt nubila somni.  
111       Adjuvat ipse deos morboque valentior omni  
112       occupat auxilium. Citius non arte refectus  
113       Telephus Haemonia, nec quae metuentis Atridae  
114       saeva Machaonio coierunt vulnera suco.  
115       Quis mihi tot coetus inter populique patrumque  
116       sit curae votique locus ? Tamen ardua testor  
117       sidera teque, pater vatium Thymbraee, quis omni  
118       luce mihi, quis nocte timor, dum postibus haerens  
119       assiduus nunc aure vigil, nunc lumine cuncta  
120       auguror : immensae veluti conexa carinae

121 cumba minor, cum saevit hiems, pro parte furentis  
 122 parva receptat aquas et eodem volvitur austro.  
 123 Nectite nunc laetae candentia fila, sorores,  
 124 nectite. Nemo modum transmissi computet aevi :  
 125 hic vitae natalis erit. Tu Troica dignus  
 126 saecula et Euboici transcendere pulveris annos  
 127 Nestoreosque situs. Qua nunc tibi pauper acerra  
 128 digna litem ? Nec si vacuet Mevania valles  
 129 aut praestent niveos Clitumna novalia tauros,  
 130 sufficiam. Sed saepe deis hos inter honores  
 131 caespes et exiguo placuerunt farra salino.

## BALNEVM CLAVDII ETRVSCI

S1\_5 v.1 Non Helicona gravi pulsat chelys enthea plectro,  
 2 nec lassata voco totiens mihi numina, Musas ;  
 3 et te, Phoebe, choris et te dimittimus, Euhan,  
 4 tu quoque muta ferae, volucer Tegeaeae, sonorae  
 5 terga premas : alios poscunt mea carmina coetus.  
 6 Naidas, undarum dominas, regemque corusci  
 7 ignis adhuc fessum Siculaque incude rubentem  
 8 elicuisse satis. Paulum arma nocentia, Thebae,  
 9 ponite : dilecto volo lascivire sodali.  
 10 Junge, puer, cyathos, et ne numerare labora  
 11 cunctantemque incende chelyn ; discede Laborque  
 12 Curaque, dum nitidis canimus gemmantia saxis  
 13 balnea dumque procax vittis hederisque, soluta  
 14 fronde verecunda, Clio mea ludit Etrusco.  
 15 Ite, deae virides, liquidosque advertite vultus  
 16 et vitreum teneris crinem redimite corymbis  
 17 veste nihil tectae, quales emergitis altis  
 18 fontibus et visu Satyros torquetis amantes.  
 19 Non vos, quae culpa decus infamastis aquarum,  
 20 sollicitare juvat ; procul hinc et fonte doloso  
 21 Salmacis et viduae Cebrenidos arida luctu  
 22 flumina et Herculei praedatrix cedat alumni.  
 23 Vos mihi, quae Latium septenaque culmina, Nymphae,  
 24 incolitis Thybrimque novis attollitis undis,  
 25 quas praeceps Anien atque exceptura natatus  
 26 Virgo juvat Marsasque nives et frigora ducens  
 27 Marcia, praecelsis quarum vaga molibus unda  
 28 crescit et innumero pendens transmittitur arcu :  
 29 vestrum opus aggredimur, vestra est quam carmine molli  
 30 pando domus. Non umquam aliis habitastis in antris  
 31 ditius. Ipsa manus tenuit Cytherea mariti  
 32 monstravitque artes ; neu vilis flamma caminos  
 33 ureret, ipsa faces volucrum succendit Amorum.  
 34 Non huc admissae Thasos aut undosa Carystos ;  
 35 maeret onyx longe, queriturque exclusus ophites ;  
 36 sola nitent flavis Nomadum decisa metallis  
 37 marmora, sola cavo Phrygiae quam Synnados antro  
 38 ipse cruentavit maculis lucentibus Attis,  
 39 quaeque Tyri niveas secat et Sidonia rupes.  
 40 Vix locus Eurotae, viridis cum regula longo  
 41 Synnada distinctu variat. Non limina cessant,  
 42 effulgent camerae, vario fastigia vitro

43 in species animoque nitent. Stupet ipse beatas  
 44 circumplexus opes et parcius imperat ignis.  
 45 Multus ubique dies, radiis ubi culmina totis  
 46 perforat atque alio sol improbus uritur aestu.  
 47 Nil ibi plebeium ; nusquam Temesaea notabis  
 48 aera, sed argento felix propellitur unda  
 49 argentoque cadit labrisque nitentibus instat  
 50 delicias mirata suas et abire recusat.  
 51 Extra autem niveo qui margine caerulus amnis  
 52 vivit et in summum fundo patet omnis ab imo,  
 53 cui non ire lacu pigrosque exsolvere amictus  
 54 suadeat ? Hoc mallet nasci Cytherea profundo,  
 55 hic te perspicuum melius, Narcisse, videres,  
 56 hic velox Hecate velit et deprensa lavari.  
 57 Quid nunc strata solo referam tabulata crepantis  
 58 auditura pilas, ubi languidus ignis inerrat  
 59 aedibus et tenuem volvunt hypocausta vaporem ?  
 60 Nec si Baianis veniat novus hospes ab oris,  
 61 talia despiciet (fas sit componere magnis  
 62 parva), Neronea nec qui modo lotus in unda,  
 63 hic iterum sudare neget. Macte, oro, nitenti  
 64 ingenio curaque puer ! Tecum ista senescant  
 65 et tua jam melius discat fortuna renasci.

#### KALENDAE DECEMBRES

S1\_6 v.1 Et Phoebus pater et severa Pallas  
 2 et Musae procul ite feriatae :  
 3 Jani vos revocabimus kalendis.  
 4 Saturnus mihi compede exsoluta  
 5 et multo gravidus mero December  
 6 et ridens Jocus et Sales protervi  
 7 adsint, dum refero diem beatum  
 8 laeti Caesaris ebriamque noctem.  
 9 Vix Aurora novos movebat ortus,  
 10 jam bellaria linea pluebant  
 11 (hunc rorem veniens profudit Eurus) :  
 12 quicquid nobile Ponticis nucetis  
 13 fecundis cadit aut jugis Idymes,  
 14 quod ramis pia germinat Damascos,  
 15 et quod percoquit aestuosa Caunos,  
 16 largis gratuitum cadit rapinis ;  
 17 molles gaioli lucuntulique,  
 18 et massis Amerina non perustis  
 19 et mustaceus et latente palma  
 20 praegnantes caryotides cadebant.  
 21 Non tantis Hyas inserena nimbis  
 22 terras obruit aut soluta Plias,  
 23 qualis per cuneos hiems Latinos  
 24 plebem grandine contudit serena.  
 25 Ducat nubila Juppiter per orbem  
 26 et latis pluvias minetur agris,  
 27 dum nostri Jovis hi ferantur imbres.  
 28 Ecce autem caveas subit per omnis  
 29 insignis specie, decora cultu  
 30 plebes altera non minor sedente.

31 Hi panaria candidasque mappas  
32 subvectant epulasque lautiores ;  
33 illi marcida vina largiuntur :  
34 idaeos totidem putes ministros.  
35 Orbem, qua melior severiorque est,  
36 et gentes alis insemel togatas  
37 et cum tot populos beata pascas,  
38 hunc, Annona, diem superba nescis.  
39 I nunc saecula compara, Vetustas,  
40 antiqui Jovis aureumque tempus :  
41 non sic libera vina tunc fluebant  
42 nec tardum seges occupabat annum.  
43 Una vescitur omnis ordo mensa,  
44 parvi, femina, plebs, eques, senatus :  
45 libertas reverentiam remisit.  
46 Et tu quin etiam (quis hoc vocari,  
47 quis promittere possit hoc deorum ?)  
48 nobiscum socias dapes inisti.  
49 Jam se, quisquis is est, inops beatus  
50 convivam ducis esse gloriatur.  
51 Hos inter fremitus novosque luxus  
52 spectandi levis effugit voluptas :  
53 stat sexus rudis, insciusque ferri ;  
54 ut pugnas capit improbus viriles !  
55 Credas ad Tanain ferumque Phasim  
56 Thermodontiacas calere turmas.  
57 Hic audax subit ordo pumilorum,  
58 quos natura brevis statim peracta  
59 nodosum semel in globum ligavit.  
60 Edunt vulnera conseruntque dextras  
61 et mortem sibi (qua manu !) minantur.  
62 Ridet Mars pater et cruenta Virtus  
63 casuraeque vagis grues rapinis  
64 mirantur pugiles ferociores.  
65 Jam noctis propioribus sub umbris  
66 dives sparsio quos agit tumultus !  
67 Hic intrans faciles emi puellae,  
68 hic agnoscitur omne, quod theatri  
69 aut forma placet aut probatur arte.  
70 Hoc plaudunt grege Lydiae tumentes,  
71 illic cymbala tinnulaeque Gades,  
72 illic agmina confremunt Syrorum,  
73 hic plebs scenica quique comminutis  
74 permutant vitreis gregale sulphur.  
75 Inter quae subito cadunt volatu  
76 immensae volucrum per astra nubes,  
77 quas Nilus sacer horridusque Phasis,  
78 quas udo Numidae legunt sub austro.  
79 Desunt qui rapiant sinusque pleni  
80 gaudent, dum nova lucra comparantur.  
81 Tollunt innumeras ad astra voces  
82 Saturnalia principis sonantes  
83 et dulci dominum favore clamant :  
84 hoc solum vetuit licere Caesar.  
85 Vixdum caerulea nox subibat orbem,  
86 descendit media nitens harena  
87 densas flammeus orbis inter umbras  
88 vincens Gnosiacae facem coronae.

89 Conlucet polus ignibus nihilque  
 90 obscurae patitur licere nocti.  
 91 Fugit pigra Quies inersque Somnus  
 92 haec cernens alias abit in urbes.  
 93 Quis spectacula, quis jocos licentes,  
 94 quis convivia, quis dapes inemptas,  
 95 largi flumina quis canat Lyaei ?  
 96 Jam jam deficio tuoque Baccho  
 97 in serum trahor ebrius soporem.  
 98 Quos ibit procul hic dies per annos !  
 99 quam nullo sacer exolescet aevo !  
 100 dum montes Latii paterque Thybris,  
 101 dum stabit tua Roma dumque terris  
 102 quod reddis Capitolium manebit.

GLAVCIAS ATEDII MELIORIS DELICATVS

S2\_1 v.1 Quod tibi praerepti, Melior, solamen alumni  
 2 improbus ante rogos et adhuc vivente favilla  
 3 ordiar ? abruptis etiam nunc flebile venis  
 4 vulnus hiat, magnaetque patet via lubrica plagae,  
 5 cum jam egomet cantus et verba medentia saevus  
 6 confero, tu planctus lamentaque fortia mavis  
 7 odistique chelyn surdaque averteris aure.  
 8 Intempesta cano : citius me tigris abactis  
 9 fetibus orbatique velint audire leones.  
 10 Nec si tergeminum Sicula de virgine carmen  
 11 affluat aut silvis chelys intellecta ferisque,  
 12 mulceat insanos gemitus. Stat pectore demens  
 13 luctus et admoto latrant praecordia tactu.  
 14 Nemo vetat : satiare malis aegrumque dolorem  
 15 libertate doma. Jam flendi expleta voluptas,  
 16 jamque preces fessus non indignaris amicas ?  
 17 Jamne canam ? Lacrimis en et mea carmine in ipso  
 18 ora natant tristesque cadunt in verba liturae.  
 19 Ipse etenim tecum nigrae sollemnia pompae  
 20 spectatumque Urbi scelus et puerile feretrum  
 21 produxi, saevos damnati turis acervos  
 22 plorantemque animam supra sua funera vidi,  
 23 teque patrum gemitus superantem et brachia matrum  
 24 complexumque rogos ignemque haurire parantem  
 25 vix tenui similis comes offendique tenendo.  
 26 Et nunc, heu, vittis et frontis honore soluto  
 27 infaustus vates versa mea pectora tecum  
 28 plango lyra : sed tu comitem sociumque doloris,  
 29 si merui luctusque tui consortia sensi,  
 30 jam lenis patiari precor. Me fulmine in ipso  
 31 audivere patres ; ego juxta busta profusis  
 32 matribus atque piis cecini solacia natis  
 33 et mihi, cum proprios gemerem defectus ad ignes  
 34 (quem, Natura !) patrem. Nec te lugere severus  
 35 arceo, sed confer gemitus pariterque fleamus.  
 36 Jamdudum dignos aditus laudumque tuarum,  
 37 o merito dilecte puer, primordia quaerens  
 38 distrahor. Hinc anni stantes in limine vitae,  
 39 hinc me forma rapit, rapit inde modestia praecox

40 et pudor et tenero probitas maturior aevo.  
41 O ubi purpureo suffusus sanguine candor  
42 sidereique orbis radiataque lumina caelo  
43 et castigatae collecta modestia frontis  
44 ingenuique super crines mollisque decorae  
45 margo comae ? blandis ubinam ora arguta querelis  
46 osculaque impliciti vernos redolentia flores  
47 et mixtae risu lacrimae penitusque loquentis  
48 hyblaeis vox mixta favis ? Cui sibila serpens  
49 poneret et saevae vellent servire novercae.  
50 Nil veris adfingo bonis. Heu lactea colla,  
51 brachia, quo numquam domini sine pondere cervix !  
52 O ubi venturae spes non longinqua juventae  
53 atque genis optatus honos jurataque multum  
54 barba tibi ? Cuncta in cineres gravis intulit hora  
55 hostilisque dies : nobis meminisse relictum.  
56 Quis tua colloquiis hilaris mulcebit amatis  
57 pectora ? quis curas mentisque arcana remittet ?  
58 accensum quis bile fera famulisque tumentem  
59 leniet ardentique in se deflectet ab ira ?  
60 inceptas quis ab ore dapes libataque vina  
61 auferet et dulci turbabit cuncta rapina ?  
62 quis matutinos abrumpet murmure somnos  
63 impositus stratis, abitusque morabitur artis  
64 nexibus atque ipso revocabit ad oscula postes ?  
65 obvius intranti rursus quis in ora manusque  
66 prosiliet brevibusque umeros circumdabit ulnis ?  
67 Muta domus, fateor, desolatique penates,  
68 et situs in thalamis et maesta silentia mensis.  
69 Quid mirum, tanto si te pius altor honorat  
70 funere ? tu domino requies portusque senectae,  
71 tu modo deliciae, dulces modo pectore curae.  
72 Non te barbaricae versabat turbo catastae,  
73 nec mixtus Phariis venalis mercibus infans  
74 compositosque sales meditataque verba locutus  
75 quaesisti lascivus erum tardeque parasti.  
76 Hic domus, hinc ortus, dominique penatibus olim  
77 carus uterque parens atque in tua gaudia liber,  
78 ne quererere genus. Raptum sed protinus alvo  
79 sustulit exsultans ac prima lucida voce  
80 astra salutantem dominus sibi mente dicavit  
81 amplexusque sinu tulit et genuisse putavit.  
82 Fas mihi sanctorum venia dixisse parentum,  
83 tuque oro, Natura, sinas, cui prima per orbem  
84 jura animis sancire datum : non omnia sanguis  
85 proximus aut serie generis demissa propago  
86 alligat ; interius nova saepe adscitataque serpunt  
87 pignora conexis. Natos genuisse necesse est,  
88 elegisse juvat. Tenero sic blandus Achilli  
89 semifer Haemonium vincebat Pelea Chiron.  
90 Nec senior Peleus natum comitatus in arma  
91 Troica, sed claro Phoenix haerebat alumno.  
92 Optabat longe reditus Pallantis ovantis  
93 Euander, fidus pugnas spectabat Acoetes.  
94 Cumque procul nitidis genitor cessaret ab astris,  
95 fluctivagus volucrem comebat Persea Dictys.  
96 Quid referam altricum victas pietate parentes ?  
97 quid te post cineres deceptaque funera matris



98 tutius Inoo reptantem pectore, Bacche ?  
 99 Jam segura patris Tuscis regnabat in undis  
 100 Ilia, portantem lassabat Romulus Accam.  
 101 Vidi ego transertos alieno in robore ramos  
 102 altius ire suis. Et te jam fecerat illi  
 103 mens animusque patrem, necdum moresve decorve :  
 104 tu tamen et vinctas etiam nunc murmure voces  
 105 vagitumque rudem fletusque infantis amabas.  
 106 Ille, velut primos exspiraturus ad austros  
 107 mollibus in pratis alte flos improbus exstat,  
 108 sic tener ante diem vultu gressuque superbo  
 109 vicerat aequales multumque reliquerat annos.  
 110 Sive catenatis curvatus membra palaestris  
 111 staret, Amyclaea conceptum matre putares,  
 112 Oebaliden illo praeceps mutaret Apollo,  
 113 Alcides pensaret Hylan ; seu Graius amictu  
 114 Attica facundi decurreret orsa Menandri,  
 115 laudaret gavisa sonum crinemque decorum  
 116 fregisset rosea lasciva Thalia corona ;  
 117 maeonium sive ille senem Trojaeque labores  
 118 diceret aut casus tarde remeantis Ulixis,  
 119 ipse pater sensus, ipsi stupuere magistri.  
 120 Scilicet infausta Lachesis cunabula dextra  
 121 attigit, et gremio puerum complexa fovebat  
 122 Invidia : illa genas et adultum comere crinem,  
 123 et monstrare artes et verba infigere, quae nunc  
 124 plangimus. Herculeos annis aequare labores  
 125 coeperat adsurgens, sed adhuc infantia juxta ;  
 126 jam tamen et validi gressus mensuraque major  
 127 cultibus et visae puero decrescere vestes,  
 128 cum tibi quas vestes, quae non gestamina mitis  
 129 festinabat erus ? Brevibus constringere laenis  
 130 pectora et angusta telas artare lacerna ;  
 131 enormes non ille sinus, sed semper ad annos  
 132 texta legens modo puniceo velabat amictu,  
 133 nunc herbas imitante sinu, nunc dulce rubenti  
 134 murice, nunc vivis digitos incendere gemmis  
 135 gaudebat ; non turba comes, non munera cessant :  
 136 sola verecundo deerat praetexta decori.  
 137 Haec fortuna domus. Subitas inimica levavit  
 138 Parca manus. Quo, diva, feros gravis exseris ungues ?  
 139 Non te forma movet, non te lacrimabilis aetas ?  
 140 Hunc nec saeva viro potuisset carpere Procne,  
 141 nec fera crudeles Colchis durasset in iras,  
 142 editus Aeolia nec si foret iste Creusa ;  
 143 torvus ab hoc Athamas insanos flecteret arcus ;  
 144 hunc quamquam Hectoreos cineres Trojamque perosus  
 145 turribus e Phrygiis flesset missurus Ulixes.  
 146 Septima lux, et jam frigentia lumina torpent,  
 147 jam complexa manu crinem tenet infera Juno.  
 148 Ille tamen Parcis fragiles urgentibus annos  
 149 te vultu moriente videt linguaque cadente  
 150 murmurat ; in te omnes vacui jam pectoris efflat  
 151 reliquias, solum meminit solumque vocantem  
 152 exaudit tibi que ora movet, tibi verba relinquit  
 153 et prohibet gemitus consolaturque dolentem.  
 154 Gratum est, Fata, tamen quod non mors lenta jacentis  
 155 exedit puerile decus, manesque subivit

156 integer et nullo temeratus corpora damno,  
157 qualis erat. Quid ego exsequias et prodiga flammis  
158 dona loquor maestoque ardentia funera luxu ?  
159 quod tibi purpureo tristis rogos aggere crevit,  
160 quod Cilicum flores, quod munera graminis Indi  
161 quodque Arabes Phariique Palaestinique liquores  
162 arsuram lavere comam ? cupit omnia ferre  
163 prodigus et totos Melior succendere census,  
164 desertas exosus opes ; sed non capit ignis  
165 invidus, atque artae desunt in munera flammae.  
166 Horror habet sensus. Qualem te funere summo  
167 atque rogam juxta, Melior placidissime quondam,  
168 extimui ! Tune ille hilaris comisque videri ?  
169 Unde animi saevaeque manus et barbarus horror,  
170 dum modo fusus humi lucem aversaris iniquam,  
171 nunc torvus pariter vestes et pectora rumpis  
172 dilectosque premis visus et frigida lambis  
173 oscula ? Erant illic genitor materque jacentis  
174 maesta, sed attoniti te spectavere parentes.  
175 Quid mirum ? plebs cuncta nefas et praevia flerunt  
176 agmina, Flaminio quae limite Molvius agger  
177 transvehit, immeritus flammis dum tristibus infans  
178 traditur et gemitum formaque aevoque meretur :  
179 talis in Isthmiacos prolatus ab aequore portus  
180 naufragus imposita jacuit sub matre Palaemon ;  
181 sic et in anguiferae ludentem gramine Lernae  
182 rescissum squamis avidus bibit anguis Ophelten.  
183 Pone metus letique minas desiste vereri :  
184 illum nec terno latrabit Cerberus ore,  
185 nulla soror flammis, nulla adsurgentibus hydri  
186 terrebit ; quin ipse avidae trux navita cumbae  
187 interius steriles ripas et adusta subibit  
188 litora, ne puero dura ascendisse facultas.  
189 Quid mihi gaudenti proles Cyllenia virga  
190 nuntiat ? Estne aliquid tam saevo in tempore laetum ?  
191 Noverat effigies generosique ardua Blaesi  
192 ora puer, dum saepe domi nova sarta ligantem  
193 te videt et similes tergentem pectore ceras.  
194 Hunc ubi Lethaei lustrantem gurgitis oras  
195 Ausonios inter proceres seriemque Quirini  
196 adgnovit, timide primum vestigia jungit  
197 accessu tacito summosque lacessit amictus,  
198 inde magis sequitur ; neque enim magis ille trahentem  
199 spernit et ignota credit de stirpe nepotum.  
200 Mox ubi delicias et rari pignus amici  
201 sensit et amissi puerum solacia Blaesi,  
202 tollit humo magnaue ligat cervice diuque  
203 ipse manu gaudens vehit et, quae munera mollis  
204 Elysii, steriles ramos mutasque volucres  
205 porgit et optunso pallentes germine flores.  
206 Nec prohibet meminisse tui, sed pectora blandus  
207 miscet et alternum pueri partitur amorem.  
208 Hic finis raptum. Quin tu jam vulnera sedas  
209 et tollis mersum luctu caput ? Omnia functa  
210 aut moritura vides : obeunt noctesque diesque  
211 astraque, nec solidis prodest sua machina terris.  
212 Nam populus mortale genus, plebisque caducae  
213 quis fleat interitus ? hos bella, hos aequora poscunt ;

214 his amor exitio, furor his et saeva cupido,  
 215 ut sileam morbos ; hos ora rigentia Brumae,  
 216 illos implacido letalis Sirius igni,  
 217 hos manet imbrifero pallens Autumnus hiatu.  
 218 Quicquid init ortus, finem timet. Ibimus omnes,  
 219 ibimus : immensis urnam quatit Aeacus umbris.  
 220 Ast hic quem gemimus, felix hominesque deosque  
 221 et dubios casus et caecae lubrica vitae  
 222 effugit, immunis fati. Non ille rogavit,  
 223 non timuit meruisse mori : nos anxia plebes,  
 224 nos miseri ; quibus unde dies suprema, quis aevi  
 225 exitus incertum, quibus instet fulmen ab astris,  
 226 quae nubes fatale sonet. Nil flecteris istis ?  
 227 Sed flectere libens. Ades huc emissus ab atro  
 228 limine, cui soli cuncta impetrare facultas,  
 229 Glaucia ! (Insontes animas nec portitor arcet,  
 230 nec durae comes ille ferae) tu pectora mulce,  
 231 tu prohibe manare genas noctesque beatas  
 232 dulcibus alloquiis et vivis vultibus imple  
 233 et periisse nega desolatamque sororem,  
 234 qui potes, et miseros perge insinuare parentes.

VILLA SVRRENTINA POLLII FELICIS

S2\_2 v.1 Est inter notos Sirenum nomine muros  
 2 saxaque Tyrrhenae templis onerata Minervae  
 3 celsa Dicarchei speculatrix villa profundi,  
 4 qua Bromio dilectus ager, collesque per altos  
 5 uritur et prelis non invidet uva Falernis.  
 6 Huc me post patrii laetum quinquennia lustris,  
 7 cum stadio jam pigra quies canusque sederet  
 8 pulvis ad Ambracias conversa gymnade frondes,  
 9 trans gentile fretum placidi facundia Polli  
 10 detulit et nitidae juvenilis gratia Pollae,  
 11 flectere jam cupidum gressus, qua limite noto  
 12 Appia longarum teritur regina viarum.  
 13 Sed juvare morae. Placido lunata recessu  
 14 hinc atque hinc curvas perrumpunt aequora rupes.  
 15 Dat natura locum montique intervenit unum  
 16 litus et in terras scopulis pendentibus exit.  
 17 Gratia prima loci, gemina testudine fumant  
 18 balnea, et e terris occurrit dulcis amaro  
 19 nympha mari. Levis hic Phorci chorus udaque crines  
 20 Cymodoce viridisque cupit Galatea lavari.  
 21 Ante domum tumidae moderator caerulus undae  
 22 excubat, innocui custos laris ; hujus amico  
 23 spumant templa salo. Felicia rura tuetur  
 24 Alcides ; gaudet gemino sub numine portus :  
 25 hic servat terras, hic saevis fluctibus obstat.  
 26 Mira quies pelagi : ponunt hic lassa furorem  
 27 aequora et insani spirant clementius austri ;  
 28 hic praeceps minus audet hiems, nulloque tumultu  
 29 stagna modesta jacent dominique imitantia mores.  
 30 Inde per obliquas erepit porticus arces,  
 31 urbis opus, longoque domat saxa aspera dorso.  
 32 Qua prius obscuro permixti pulvere soles

33 et feritas inamoena viae, nunc ire voluptas :  
34 qualis, si subeas Ephyres Baccheidos altum  
35 culmen, ab Inoo fert semita tecta Lyaeo.  
36 Non, mihi si cunctos Helicon indulgeat amnes  
37 et superet Piplea sitim largeque volantis  
38 ungula sedet equi reseretque arcana pudicos  
39 Phemonoe fontes vel quos meus auspice Phoebos  
40 altius immersa turbavit Pollius urna,  
41 innumeras valeam species cultusque locorum  
42 Pieriis aequare modis. Vix ordine longo  
43 suffecere oculi, vix, dum per singula ducor,  
44 suffecere gradus. Quae rerum turba ! locine  
45 ingenium an domini mirer prius ? haec domus ortus  
46 aspicit et Phoebi tenerum jubar ; illa cadentem  
47 detinet exactamque negat dimittere lucem,  
48 cum jam fessa dies et in aequora montis opaci  
49 umbra cadit vitreoque natant praetoria ponto.  
50 Haec pelagi clamore fremunt, haec tecta sonoros  
51 ignorant fluctus terraeque silentia malunt.  
52 His favit natura locis, hic victa colenti  
53 cessit et ignotos docilis mansuevit in usus.  
54 Mons erat hic ubi plana vides ; et lustra fuerunt,  
55 quae nunc tecta subis ; ubi nunc nemora ardua cernis,  
56 hic nec terra fuit : domuit possessor, et illum  
57 formantem rupes expugnantemque secuta  
58 gaudet humus. Nunc cerne jugum discentia saxa  
59 intrantesque domos jussumque recedere montem.  
60 Jam Methymnaei vatis manus et chelys una  
61 Thebais et Getici cedat tibi gloria plectri :  
62 et tu saxa moves, et te nemora alta sequuntur.  
63 Quid referam veteres ceraeque aerisque figuras,  
64 si quid Apellei gaudent animasse colores,  
65 si quid adhuc vacua tamen admirabile Pisa  
66 Phidiacae rasere manus, quod ab arte Myronis  
67 aut Polycleteo jussum est quod vivere caelo,  
68 aeraque ab Isthmiacis auro potiora favillis,  
69 ora ducum ac vatium sapientumque ora priorum,  
70 quos tibi cura sequi, quos toto pectore sentis,  
71 expers curarum atque animum virtute quieta  
72 compositus semperque tuus ? Quid mille revolvam  
73 culmina visendique vices ? sua cuique voluptas  
74 atque omni proprium thalamo mare, transque jacentem  
75 Nerea diversis servit sua terra fenestris :  
76 haec videt Inarimen, illinc Prochyta aspera paret ;  
77 armiger hac magni patet Hectoris, inde malignum  
78 aera respirat pelago circumflua Nesis ;  
79 inde vagis omen felix Euploea carinis  
80 quaeque ferit curvos exerta Megalia fluctus,  
81 angitur et domino contra recubante proculque  
82 Surrentina tuus spectat praetoria Limon.  
83 Una tamen cunctis, procul eminet una diaetis,  
84 quae tibi Parthenopen directo limite ponti  
85 ingerit : hic Graeis penitus delecta metallis  
86 saxa ; quot Eoae respergit vena Syenes,  
87 Synnade quot maesta Phrygiae fodere secures  
88 per Cybeles lugentis agros, ubi marmore picto  
89 candida purpureo distinguitur area gyro ;  
90 hic et Amyclaei caesum de monte Lycurgi

91 quod viret et molles imitatur rupibus herbas,  
 92 hic Nomadum lucent flaventia saxa Thasosque  
 93 et Chios et gaudens fluctus spectare Carystos :  
 94 omnia Chalcidicas turres obversa salutant.  
 95 Macte animo quod Graia probas, quod Graia frequentas  
 96 arva ; nec invideant quae te genuere Dicarchi  
 97 moenia. Nos docto melius potiemur alumno.  
 98 Quid nunc ruris opes pontoque novalia dicam  
 99 injecta et madidas Baccheo nectare rupes ?  
 100 Saepe per autumnum jam pubescente Lyaeo  
 101 conscendit scopulos noctisque occulta sub umbra  
 102 palmite maturo rorantia lumina tersit  
 103 Nereis et dulces rapuit de collibus uvas.  
 104 Saepe et vicino sparsa est vindemia fluctu,  
 105 et Satyri cecidere vadis, nudamque per undas  
 106 Dorida montani cupierunt prendere Panes.  
 107 Sis felix, tellus, dominis ambobus in annos  
 108 Mygdonii Pyliaque senis, nec nobile mutes  
 109 servitium, nec te cultu Tirynthia vincat  
 110 aula Dicarcheique sinus, nec saepius isti  
 111 blanda Therapnaei placent vineta Galaesi.  
 112 Hic ubi Pierias exercet Pollius artes,  
 113 seu volvit monitus quos dat Gargettius auctor,  
 114 seu nostram quatit ille chelyn seu dissona nectit  
 115 carmina sive minax ultorem stringit iambon,  
 116 hinc levis e scopulis meliora ad carmina Siren  
 117 advolat, hinc motis audit Tritonia cristis.  
 118 Tunc rapidi ponunt flatus, maria ipsa vetantur  
 119 obstrepere, emergunt pelago doctamque trahuntur  
 120 ad chelyn et blandi scopulis delphines aderrant.  
 121 Vive, Midae gazis et Lydo ditior auro,  
 122 Troica et Euphratae supra diademata felix,  
 123 quem non ambigui fasces, non mobile vulgus,  
 124 non leges, non castra terent, qui pectore magno  
 125 spemque metumque domas voto sublimior omni,  
 126 exemptus fatis indignantemque refellens  
 127 Fortunam ; dubio quem non in turbine rerum  
 128 deprendet suprema dies, sed abire paratum  
 129 ac plenum vita. Nos, vilis turba, caducis  
 130 deservire bonis semperque optare parati,  
 131 spargimur in casus : celsa tu mentis ab arce  
 132 despicias errantes humanaque gaudia rides.  
 133 Tempus erat, cum te geminae suffragia terrae  
 134 diriperent, celsusque duas veherere per urbes,  
 135 inde Dicarcheis multum venerande colonis,  
 136 hinc adscite meis, pariterque his largus et illis  
 137 ac juvenile calens plectrique errore superbus.  
 138 At nunc discussa rerum caligine verum  
 139 aspicias : illo alii rursus jactantur in alto,  
 140 et tua securos portus placidamque quietem  
 141 intravit non quassa ratis. Sic perge nec umquam  
 142 emeritam in nostras puppem demitte procellas.  
 143 Tuque, nurus inter longae . . .  
 144 . . . Praecordia curae,  
 145 non frontem vertere minae, sed candida semper  
 146 gaudia et in vultu curarum ignara voluptas ;  
 147 non tibi sepositas infelix strangulat arca  
 148 divitias avidique animum dispendia torquent

149 fenoris : expositi census et docta fruendi  
 150 temperies. Non ulla deo meliore cohaerent  
 151 pectora, non alias docuit Concordia mentes.  
 152 Discite securi, quorum de pectore mixtae  
 153 in longum coiere faces sanctusque pudicae  
 154 servat amicitiae leges amor. Ite per annos  
 155 saeculaque et priscae titulos praecedite famae.

ARBOR ATEDII MELIORIS

S2\_3 v.1 Stat, quae perspicuas nitidi Melioris opacet  
 2 arbor aquas complexa lacus ; quae robore ab imo  
 3 cur curvata vadis redit inde cacumine recto  
 4 ardua, ceu mediis iterum nascatur ab undis  
 5 atque habitet vitreum tacitis radicibus amnem ?  
 6 Quid Phoebum tam parva rogem ? Vos dicite causas,  
 7 Naides, et faciles, satis est, date carmina Fauni.  
 8 Nympharum tenerae fugiebant Pana catervae ;  
 9 ille quidem it, cunctas tamquam velit, it tamen unam  
 10 in Pholoen. Silvis haec fluminibusque sequentis  
 11 nunc hirtos gressus, nunc improba cornua vitat.  
 12 Jamque et belligerum Jani nemus atraque Caci  
 13 rura Quirinalesque fuga suspensa per agros  
 14 Caelica tesca subit ; ibi demum victa labore,  
 15 fessa metu, qua nunc placidi Melioris aperti  
 16 stant sine fraude lares, flavos collegit amictus  
 17 artius et niveae posuit se margine ripae.  
 18 Insequitur velox pecorum deus et sua credit  
 19 conubia ; ardenti jamjam suspiria librat  
 20 pectore, jam praedae levis imminet. Ecce citatos  
 21 advertit Diana gradus, dum per juga septem  
 22 errat Aventinaeque legit vestigia cervae.  
 23 Paenituit vidisse deam, conversaque fidas  
 24 ad comites : "Numquamne avidis arcebo rapinis  
 25 hoc petulans foedumque pecus, semperque pudici  
 26 decrescet mihi turba chori ? " Sic deinde locuta  
 27 depromit pharetra telum breve, quod neque flexis  
 28 cornibus aut solito torquet stridore, sed una  
 29 emisit contenta manu laevumque soporem  
 30 Naidos aversa fertur tetigisse sagitta.  
 31 Illa diem pariter surgens hostemque protervum  
 32 vidit et in fontem, niveos ne panderet artus,  
 33 sic tota cum veste ruit, stagnisque sub altis  
 34 pana sequi credens ima latus implicat alga.  
 35 Quid faceret subito deceptus praedo ? nec altis  
 36 credere corpus aquis hirtae sibi conscius audet  
 37 pellis et a tenero nandi rudis. Omnia questus  
 38 immitem Bromium, stagna invida et invida tela,  
 39 primaevam visu platanum, cui longa propago  
 40 innumeraeque manus et iturus in aethera vertex,  
 41 deposuit juxta vivamque adgressit harenam  
 42 optatisque aspergit aquis et talia mandat :  
 43 "Vive diu nostri pignus memorabile voti,  
 44 arbor, et haec durae latebrosa cubilia nymphae  
 45 tu saltem declinis ama, preme frondibus undam.  
 46 Illa quidem meruit, sed ne, precor, igne superno

47 aestuet aut dura feriatur grandine ; tantum  
 48 spargere tu laticem et foliis turbare memento.  
 49 Tunc ego teque diu recolam dominamque benignae  
 50 sedis et inlaesa tutabor utramque senecta,  
 51 ut Jovis, ut Phoebi frondes, ut discolor umbra  
 52 populus et nostrae stupeant tua germina pinus."  
 53 Sic ait. Illa dei veteres animata calores  
 54 uberibus stagnis obliquo pendula trunco  
 55 incubat atque umbris scrutatur amantibus undas.  
 56 Sperat et amplexus, sed aquarum spiritus arcet  
 57 nec patitur tactus. Tandem eluctata sub auras  
 58 libratur fundo rursusque enode cacumen  
 59 ingeniosa levat, veluti descendat in imos  
 60 stirpe lacus alia. Jam nec Phoebelia Nais  
 61 odit et exclusos invitat gurgite ramos.  
 62 Haec tibi parva quidem genitalem luce paramus  
 63 dona, sed ingenti forsitan victura sub aevo.  
 64 Tu cujus placido posuere in pectore sedem  
 65 blandus honos hilarisque tamen cum pondere virtus,  
 66 cui nec pigra quies nec iniqua potentia nec spes  
 67 improba, sed medius per honesta et dulcia limes,  
 68 incorrupte fidem nullosque experte tumultus  
 69 et secreta, palam quod digeris ordine vitam,  
 70 idem auri facilis contemptor et optimus idem  
 71 comere divitias opibusque immittere lucem :  
 72 hac longum florens animi morumque juvena  
 73 Iliacos aequare senes et vincere persta,  
 74 quos pater Elysio, genetrix quos detulit annos :  
 75 hoc illi duras exoravere sorores,  
 76 hoc, quae te sub teste situm fugitura tacentem  
 77 ardua magnanimi revirescet gloria Blaesi.

## PSITTACVS EIVSDEM

S2\_4 v.1 Psittace dux volucrum, domini facunda voluptas,  
 2 humanae sollers imitator, psittace, linguae,  
 3 quis tua tam subito praeclusit murmura fato ?  
 4 Hesternas, miserande, dapes moriturus inisti  
 5 nobiscum, et gratae carpentem munera mensae  
 6 errantemque toris mediae plus tempore noctis  
 7 vidimus. Adfatus etiam meditataque verba  
 8 reddideras. At nunc aeterna silentia Lethes  
 9 ille canorus habes. Cedat Phaethontia vulgi  
 10 fabula : non soli celebrant sua funera cygni.  
 11 At tibi quanta domus rutila testudine fulgens,  
 12 conexusque ebori virgarum argenteus ordo,  
 13 argutumque tuo stridentia limina cornu  
 14 et, querulae jam sponte, fores ! Vacat ille beatus  
 15 carcer et augusti nusquam convicia tecti.  
 16 Huc doctae stipentur aves quis nobile fandi  
 17 jus Naturae dedit ; plangat Phoebelius ales  
 18 auditasque memor penitus demittere voces  
 19 sturnus, et Aonio versae certamine picae,  
 20 quique refert jungens iterata vocabula perdix,  
 21 et quae Bistonio queritur soror orba cubili :  
 22 ferte simul gemitus cognataque ducite flammis

23 funera et hoc cunctae miserandum addiscite carmen :  
 24 "Occidit aerae celeberrima gloria gentis  
 25 psittacus, ille plagae viridis regnator Eoae,  
 26 quem non gemmata volucris Junonia cauda  
 27 vinceret aspectu, gelidi non Phasidis ales,  
 28 nec quas umentis Numidae rapuere sub austro,  
 29 ille saluator regum nomenque locutus  
 30 Caesareum et queruli quondam vice functus amici,  
 31 nunc conviva levis monstrataque reddere verba  
 32 tam facilis, quo tu, Melior dilecte, recluso  
 33 numquam solus eras. At non inglorius umbris  
 34 mittitur : Assyrio cineres adolentur amomo  
 35 et tenues Arabum respirant gramine plumae  
 36 sicaniisque crocis ; senio nec fessus inertis  
 37 scandet odoratos Phoenix felicior ignes."

## LEO MANSVETVS

S2\_5 v.1 Quid tibi monstrata mansuescere profuit ira ?  
 2 Quid scelus humanasque animo dediscere caedes  
 3 imperiumque pati et domino parere minori ?  
 4 Quid, quod abire domo rursusque in claustra reverti  
 5 suetus et a capta jam sponte recedere praeda  
 6 insertasque manus laxo dimittere morsu ?  
 7 Occidis, altarum vastator docte ferarum,  
 8 non grege Massylo curvaque indagine clausus,  
 9 non formidato supra venabula saltu  
 10 incitus aut caeco foveae deceptus hiatu,  
 11 sed victus fugiente fera. Stat cardine aperto  
 12 infelix cavea et clausas circum undique portas  
 13 hoc licuisse nefas placidi tumuere leones.  
 14 Tum cunctis cecidere jubae, puduitque relatum  
 15 aspicere, et totas duxere in lumina frontes.  
 16 At non te primo fusum novus obruit ictu  
 17 ille pudor : mansere animi, virtusque cadenti  
 18 a media jam morte redit, nec protinus omnes  
 19 terga dedere minae. Sicut sibi conscius alti  
 20 vulneris adversum moriens it miles in hostem  
 21 attollitque manum et ferro labente minatur,  
 22 sic piger ille gradu solitoque exutus honore  
 23 firmat hians oculos animamque hostemque requirit.  
 24 Magna tamen subiti tecum solacia leti,  
 25 victae, feres, quod te maesti populusque patresque,  
 26 ceu notus caderes tristi gladiator harena,  
 27 ingemere mori ; magni quod Caesaris ora  
 28 inter tot Scythicas Libycasque, e litore Rheni  
 29 et Pharia de gente feras, quas perdere vile est,  
 30 unius amissi tetigit jactura leonis.

## CONSOLATIO AD FLAVIVM VRSVM DE AMISSIONE PVERI DELICATI

S2\_6 v.1 Saeve nimis, lacrimis quisquis discrimina ponis  
 2 lugendique modos. Miserum est primaeva parenti  
 3 pignera surgentesque (nefas !) accendere natos ;



4 durum et deserti praerepta conjuge partem  
5 conclamare tori, maesta et lamenta sororum  
6 et fratrum gemitus : alte haec tamen at procul intrat  
7 altius in sensus majoraque vulnera vincit  
8 plaga minor. Famulum (quia rerum nomina caeca  
9 sic miscet Fortuna manu nec pectora novit),  
10 sed famulum gemis, Urse, pium, sed amore fideque  
11 has meritum lacrimas, cui major stemmate juncto  
12 libertas ex mente fuit. Ne comprime fletus,  
13 ne pudeat ; rumpat frenos dolor iste diesque,  
14 si tam dura placent : hominem gemis (heu mihi ! subdo  
15 ipse faces), hominem, Urse, tuum, cui dulce volenti  
16 servitium, cui triste nihil, qui sponte sibique  
17 imperiosus erat. Quisnam haec in funera missos  
18 castiget luctus ? Gemit inter bella peremptum  
19 parthus equum, fidosque canes flevere Molossi,  
20 et volucres habuere rogam cervusque Maronem.  
21 Quid, si nec famulus ? vidi ipse habitusque notavi  
22 te tantum cupientis erum ; sed major in ore  
23 spiritus et tenero manifesti in sanguine mores.  
24 Optarent multum Graiae cuperentque Latinae  
25 sic peperisse nurus. Non talem Cressa superbum  
26 callida sollicito revocavit Thesea filo,  
27 nec Paris Oebalios talis visurus amores  
28 rusticus invitas dejecit in aequora pinus.  
29 Non fallo aut cantus assueta licentia ducit :  
30 vidi et adhuc video, qualem nec bella caventem  
31 litore virgineo Thetis occultavit Achillen,  
32 nec circum saevi fugientem moenia Phoebi  
33 Troilon Haemoniae deprendit lancea dextrae.  
34 Qualis eras ! procul en cunctis puerisque virisque  
35 pulchrior et tantum domino minor ! Illius unus  
36 ante decor, quantum praecedit clara minores  
37 luna faces quantumque alios premit Hesperos ignes.  
38 Non tibi femineum vultu decus oraque supra  
39 mollis honos, qualis dubiae post crimina formae  
40 de sexu transire jubent, torva atque virilis  
41 gratia ; nec petulans acies, blandique severo  
42 igne oculi, qualis bellis jam casside visu  
43 parthenopaeus erat ; simplexque horrore decoro  
44 crinis, et obsessae nondum primoque micantes  
45 flore genae : talem Ledaeo gurgite pubem  
46 educat Eurotas, teneri sic integer aevi  
47 Elin adit primosque Jovi puer approbat annos.  
48 Nam pudor unde notae, mentis tranquillaque morum  
49 temperies teneroque animus maturior aevo,  
50 carmine quo potasse queam ? saepe ille volentem  
51 castigabat erum studioque altisque juvabat  
52 consiliis ; tecum tristisque hilarisque nec umquam  
53 ille suus, vultumque tuo sumebat ab ore :  
54 dignus et Haemonium Pyladen praecedere fama  
55 Cecropiamque fidem. Sed laudum terminus esto,  
56 quem fortuna sinit : non mente fidelior aegra  
57 speravit tardi reditus Eumaeus Ulixis.  
58 Quis deus aut quisnam tam tristia vulnera casus  
59 eligit ? unde manus Fatis tam certa nocendi ?  
60 O quam divitiis censuque exutus opimo  
61 fortior, Urse, fores ! Si vel fumante ruina

62 ructassent dites Vesuvina incendia Locroe  
 63 seu Pollentinos mersissent flumina saltus  
 64 seu Lucanus Acir seu Thybridis impetus altas  
 65 in dextrum torsisset aquas, paterere serena  
 66 fronte deos ; sive alma fidem messisque negasset  
 67 Cretaque Cyreneque et qua tibi cumque beato  
 68 larga redit Fortuna sinu. Sed gnara dolorum  
 69 invidia infelix animi vitalia vidit  
 70 laedendique vias. Vitae modo germen adultae  
 71 nectere temptabat juvenum pulcherrimus ille  
 72 cum tribus Eleis unam trieterida lustris.  
 73 Attendit torvo tristis Rhamnusia vultu,  
 74 ac primum implevitque toros oculisque nitorem  
 75 addidit ac solito sublimius ora levavit,  
 76 heu ! misero letale favens, seseque videndo  
 77 torsit et invidia mortemque amplexa jacenti  
 78 injecit nexus carpsitque immitis adunca  
 79 ora verenda manu. Quinta vix Phosphoros ora  
 80 rorantem sternebat equum : jam litora duri  
 81 saeva, Philete, senis durumque Acheronta videbas,  
 82 quo domini clamate sono ! Non saevius atros  
 83 nigrasset planctu genetrix sibi saeva lacertos,  
 84 nec pater ; et certe qui vidit funera frater  
 85 erubuit vinci. Sed nec servilis adempto  
 86 ignis : odoriferos exhaustit flamma Sabaeos  
 87 et Cilicum messes Phariaeque exempta volucris  
 88 cinnama et Assyrio manantes gramine sucos  
 89 et domini fletus : hos tantum hausere favillae,  
 90 hos bibit usque rogos ; nec quod tibi Setia canos  
 91 restinxit cineres, gremio nec lubricus ossa  
 92 quod vallavit onyx, miseris acceptius umbris  
 93 quam gemitus. Sed (et ipse juvat) quid terga dolori,  
 94 Urse, damus ? Quid damna foves et pectore iniquo  
 95 vulnus amas ? ubi nota reis facundia raptis ?  
 96 quid caram crucias tam saevis luctibus umbram ?  
 97 Eximius licet ille animi meritusque doleri :  
 98 solvistis. Subit ille pios carpitque quietem  
 99 Elysiam clarosque illic fortasse parentes  
 100 invenit ; aut illi per amoena silentia Lethes  
 101 forsitan Avernales adludunt undique mixtae  
 102 Naides, obliquoque notat Proserpina vultu.  
 103 Pone, precor, questus ; alium tibi Fata Phileton  
 104 forsitan et ipse dabit moresque habitusque decoros  
 105 monstrabit gaudens similemque docebit amorem.

GENETHLIACON LVCANI AD POLLAM

S2\_7 v.1 Lucani proprium diem frequentet,  
 2 quisquis collibus Isthmiae Diones  
 3 docto pectora concitatus oestro  
 4 pendentis bibit unguulae liquorem.  
 5 Ipsi quos penes est honor canendi,  
 6 vocalis citharae repertor Arcas  
 7 et tu Bassaridum rotator Euan  
 8 et Paeon et Hyantiae sorores,  
 9 laetae purpureas novate vittas,

10 crinem comite, candidamque vestem  
 11 perfundant hederæ recentiores.  
 12 Docti largius evagentur amnes,  
 13 et plus Aoniae virete silvae,  
 14 et, si qua patet aut diem recepit,  
 15 sertis mollibus expleatur umbra.  
 16 Centum Thespiacis odora lucis  
 17 stent altaria victimaeque centum,  
 18 quas Dirce lavat aut alit Cithaeron.  
 19 Lucanum canimus, favete linguis ;  
 20 vestra est ista dies, favete, Musae,  
 21 dum qui vos geminas tulit per artes,  
 22 et vinctae pede vocis et solutae,  
 23 Romani colitur chori sacerdos.  
 24 Felix heu nimis et beata tellus,  
 25 quae pronos Hyperionis meatus  
 26 summis Oceani vides in undis  
 27 stridoremque rotae cadentis audis,  
 28 quae Tritonide fertilis Athenas  
 29 unctis, Baetica, provocas trapetis :  
 30 Lucanum potes imputare terris !  
 31 Hoc plus quam Senecam dedisse mundo  
 32 aut dulcem generasse Gallionem.  
 33 Attollat refluos in astra fontes  
 34 Graio nobilior Melete Baetis ;  
 35 Baetim, Mantua, provocare noli.  
 36 Natum protinus atque humum per ipsam  
 37 primo murmure dulce vagientem  
 38 blando Calliope sinu recepit.  
 39 Tum primum posito remissa luctu  
 40 longos Orpheos exuit dolores  
 41 et dixit : "Puer o dicite Musis,  
 42 longae vos cito transiture vates,  
 43 non tu flumina nec greges ferarum  
 44 nec plectro Geticas movebis ornos,  
 45 sed septem juga Martiumque Thybrim  
 46 et doctos equites et eloquente  
 47 cantu purpureum trahes senatum.  
 48 Nocturnas alii Phrygum ruinas  
 49 et tardi reducis vias Ulixidis  
 50 et puppem temerariam Minervae  
 51 trita vatibus orbita sequantur :  
 52 tu carus Latio memorque gentis  
 53 carmen fortior exeris togatum.  
 54 Ac primum teneris adhuc in annis  
 55 ludas Hectora Thessalosque currus  
 56 et supplex Priami potentis aurum,  
 57 et sedes reserabis inferorum,  
 58 ingratus Nero dulcibus theatris  
 59 et noster tibi proferetur Orpheus.  
 60 Dices culminibus Remi vagantis  
 61 infandos domini nocentis ignes.  
 62 Hinc castae titulum decusque Pollae  
 63 jucunda dabis adlocutione.  
 64 Mox coepta generosior juvena  
 65 albos ossibus Italidis Philippos  
 66 et Pharsalica bella detonabis,  
 67 quo fulmen ducis inter arma divi,

68 libertate gravem pia Catonem  
69 et gratum popularitate Magnum.  
70 Tu Pelusiaci scelus Canopi  
71 deflebis pius et Pharo cruenta  
72 Pompeio dabis altius sepulcrum.  
73 Haec primo juvenis canes sub aevo,  
74 ante annos Culicis Maroniani.  
75 Cedet Musa rudis ferocis Enni  
76 et docti furor arduus Lucreti,  
77 et qui per freta duxit Argonautas,  
78 et qui corpora prima transfigurat.  
79 Quid ? Majus loquar : ipsa te Latinis  
80 Aeneis venerabitur canentem.  
81 Nec solum dabo carminum nitorem,  
82 sed taedis genialibus dicabo  
83 doctam atque ingenio tuo decoram,  
84 qualem blanda Venus daretque Juno  
85 forma, simplicitate, comitate,  
86 censu, sanguine, gratia, decore,  
87 et vestros hymenaeon ante postes  
88 festis cantibus ipsa personabo.  
89 O saevae nimium gravesque Parcae !  
90 o numquam data longa fata summis !  
91 Cur plus, ardua, casibus patetis ?  
92 cur saeva vice magna non senescunt ?  
93 Sic gnatum Nasamonii Tonantis  
94 post ortus obitusque fulminatos  
95 angusto Babylon premit sepulcro ;  
96 sic fixum Paridis manu trementis  
97 peliden Thetis horruit cadentem ;  
98 sic ripis ego murmurantis Hebri  
99 non mutum caput Orpheos sequebar.  
100 Sic et tu, rabidi nefas tyranni,  
101 Jussus praecipitem subire Lethen,  
102 dum pugnas canis arduaue voce  
103 das solacia grandibus sepulcris,  
104 (o dirum scelus ! o scelus !) tacebis."  
105 Sic fata est leviterque decidentem  
106 abrasit lacrimas nitente plectro.  
107 At tu, seu rapidum poli per axem  
108 Famae curribus arduis levatus,  
109 qua surgunt animae potentiores,  
110 terras despicias et sepulcra rides ;  
111 seu pacis merito nemus reclusi  
112 felix Elysii tenes in oris,  
113 quo Pharsalica turba congregatur,  
114 et te nobile carmen insonantem  
115 Pompei comitantur et Catones  
116 (tu magna sacer et superbus umbra  
117 nescis Tartaron et procul nocentum  
118 audis verbera pallidumque visa  
119 matris lampade respicis Neronem),  
120 adsis lucidus, et vocante Polla  
121 unum, quaeso, diem deos silentium  
122 exores : solet hoc patere limen  
123 ad nuptas redeuntibus maritis.  
124 Haec te non thiasis procax dolosis  
125 falsi numinis induit figura,

126 ipsum sed colit et frequentat ipsum  
 127 imis altius insitum medullis ;  
 128 at solacia vana subministrat  
 129 vultus, qui simili notatus auro  
 130 stratis praenitet incubatque somno  
 131 securae. Procul hinc abite, Mortes :  
 132 haec vitae genialis est origo.  
 133 Cedat luctus atrox genisque manent  
 134 jam dulces lacrimae, dolorque festus,  
 135 quicquid fleverat ante, nunc adoret.

HERCVLES SVRRENTINVS POLLII FELICIS

S3\_1 v.1 Intermissa tibi renovat, Tirynthie, sacra  
 2 Pollius et causas designat desidis anni,  
 3 quod coleris majore tholo nec litora pauper  
 4 nuda tenes tectumque vagis habitabile nautis,  
 5 sed nitidos postes Graisque effulta metallis  
 6 culmina, ceu taedis iterum lustratus honesti  
 7 ignis ab Oetaea conscenderis aethera flamma.  
 8 Vix oculis animoque fides. Tune ille reclusi  
 9 liminis et parvae custos inglorius arae ?  
 10 Unde haec aula recens fulgorque inopinus agresti,  
 11 Alcidae ? Sunt fata deum, sunt fata locorum.  
 12 O velox pietas ! steriles hic nuper harenas  
 13 ad sparsum pelago montis latus hirtaque dumis  
 14 saxa nec ulla pati faciles vestigia terras  
 15 cernere erat. Quaenam subito fortuna rigentes  
 16 ditavit scopulos ? Tyrione haec moenia plectro  
 17 an Getica venere lyra ? Stupet ipse labores  
 18 annus, et angusti bis seno limite menses  
 19 longaeum mirantur opus. Deus attulit arces  
 20 erexitque suas atque obluctantia saxa  
 21 summovit nitens et magno pectore montem  
 22 reppulit : immitem credas jussisse novercam.  
 23 Ergo age, seu patrios liber jam legibus Argos  
 24 incolis et mersum tumultis Eurysthea calcas,  
 25 sive tui solium Jovis et virtute parata,  
 26 astra tenes, haustumque tibi succincta beati  
 27 nectaris excluso melior Phryge porrigit Hebe :  
 28 huc ades et genium templis nascentibus infer.  
 29 Non te Lerna nocens nec pauperis arva Molochi  
 30 nec formidatus Nemees ager antraque poscunt  
 31 Thracia nec Pharii polluta altaria regis,  
 32 sed felix simplexque domus fraudumque malarum  
 33 inscia et hospitibus superis dignissima sedes.  
 34 Pone truces arcus agmenque immite pharetrae  
 35 et regum multo perfusum sanguine robur,  
 36 instratumque umeris dimitte gerentibus hostem :  
 37 hic tibi Sidonio celsum pulvinar acantho  
 38 textitur et signis crescit torus asper eburnis.  
 39 Pacatus mitisque veni nec turbidus ira  
 40 nec famulare timens, sed quem te Maenalis Auge  
 41 confectum thiasis et multo fratre madentem  
 42 detinuit qualemque vagae post crimina noctis  
 43 Thespius obstupuit, totiens socer. Hic tibi festa

44 gymnas, et insontes juvenum sine caestibus irae  
 45 annua veloci peragunt certamina lustro.  
 46 Hic templis inscriptus avo gaudente sacerdos  
 47 parvus adhuc similisque tui, cum prima novercae  
 48 monstra manu premeres atque exanimata doleres.  
 49 Sed quae nam subiti, veneranda, exordia templi,  
 50 dic age, Calliope ; socius tibi grande sonabit  
 51 Alcides tensoque modos imitabitur arcu.  
 52 Tempus erat, caeli cum torrentissimus axis  
 53 incumbit terris ictusque Hyperione multo  
 54 acer anhelantis incendit Sirius agros.  
 55 Jamque dies aderat, profugis cum regibus aptum  
 56 fumat Aricinum Triviae nemus et face multa  
 57 conscius Hippolyti splendet lacus ; ipsa coronat  
 58 emeritos Diana canes et spicula terget  
 59 et tutas sinit ire feras, omnisque pudicis  
 60 Itala terra focis Hecateidas excolit idus.  
 61 Ast ego, Dardaniae quamvis sub collibus Albae  
 62 rus proprium magnique ducis mihi munere currens  
 63 unda domi curas mulcere aestusque levare  
 64 sufficerent, notas Sirenum nomine rupes  
 65 facundique larem Polli non hospes habebam,  
 66 assidue moresque viri pacemque novosque  
 67 Pieridum flores intactaque carmina discens.  
 68 Forte diem Triviae dum litore ducimus udo  
 69 angustasque fores adsuetaque tecta gravati  
 70 frondibus et patula defendimus arbore soles,  
 71 delituit caelum et subitis lux candida cessit  
 72 nubibus ac tenuis graviore favonius austro  
 73 immaduit ; qualem Libyae Saturnia nimbum  
 74 attulit, Iliaco dum dives Elissa marito  
 75 donatur testesque ululant per devia nymphae.  
 76 Diffugimus, festasque dapes redimitaque vina  
 77 abripiunt famuli ; nec quo convivia migrent,  
 78 quamvis innumerae gaudentia rura superne  
 79 insedere domus et multo culmine dives  
 80 mons nitet : instantes sed proxima quaerere nimbi  
 81 suadebant laesique fides reditura sereni.  
 82 Stabat dicta sacri tenuis casa nomine templi  
 83 et magnum Alciden humili lare parva premebat,  
 84 fluctivagos nautas scrutatoresque profundi  
 85 vix operire capax. Huc omnis turba coimus,  
 86 huc epulae ditesque tori coetusque ministrum  
 87 stipantur nitidaeque cohors gratissima Pollae.  
 88 Non cepere fores, angustaque deficit aedes.  
 89 Erubuit risitque deus dilectaque Polli  
 90 corda subit blandisque virum complectitur ulnis.  
 91 "Tune", inquit, "largitor opum, qui mente profusa  
 92 tecta Dicarchei pariter juvenemque replesti  
 93 Parthenopen ? nostro qui tot fastigia monti,  
 94 tot virides lucos, tot saxa imitantia vultus  
 95 aeraque, tot scripto viventes lumine ceras  
 96 fixisti ? Quid enim ista domus, quid terra, priusquam  
 97 te gauderet, erant ? Longo tu tramite nudos  
 98 texisti scopulos, fueratque ubi semita tantum,  
 99 nunc tibi distinctis stat porticus alta columnis,  
 100 ne sorderet iter. Curvi tu litoris ora  
 101 clausisti calidas gemina testudine nymphas.

102 Vix opera enumerem ; mihi pauper et indigus uni  
103 Pollius ? et talis hilaris tamen intro penates  
104 et litus quod pandis, amo. Sed proxima sedem  
105 despicit et tacite ridet mea limina Juno.  
106 Da templum dignasque tuis conatibus aras,  
107 quas puppes velis nolint transire secundis,  
108 quo Pater aetherius mensisque accita deorum  
109 turba et ab excelso veniat soror hospita templo.  
110 Nec te, quod solidus contra riget umbo maligni  
111 montis et immenso non umquam exesus ab aevo,  
112 terreat : ipse adero et conamina tanta juvabo  
113 asperaque invitae perfringam viscera terrae.  
114 Incipe et Herculeis fidens hortatibus aude.  
115 Non Amphioniae steterint velocius arces  
116 Pergameusve labor." Dixit mentemque reliquit.  
117 Nec mora, cum scripta formatur imagine tela.  
118 Innumerae coiere manus : his caedere silvas  
119 et levare trabes, illis immergere curae  
120 fundamenta solo. Coquitur pars umida terrae  
121 protectura hiemes atque exclusura pruinas,  
122 indomitusque silex curva fornace liquescit.  
123 Praecipuus sed enim labor est excindere dextra  
124 oppositas rupes et saxa negantia ferro.  
125 Hic pater ipse loci positus Tirynthius armis  
126 insudat validaque solum deforme bipenni,  
127 cum grave nocturna caelum subtexitur umbra,  
128 ipse fodit, ditesque Caprae viridesque resultant  
129 Taurubulae, et terris ingens redit aequoris echo.  
130 Non tam grande sonat motis incudibus Aetne ,  
131 cum Brontes Steropesque ferit, nec major ab antris  
132 Lemniacis fragor, est ubi flammeus aegida caelat  
133 Mulciber et castis exornat Pallada donis.  
134 Decrescunt scopuli, et rosea sub luce reversi  
135 artifices mirantur opus. Vix annus anhelat  
136 alter, et ingenti dives Tirynthius arce  
137 despectat fluctus et junctae tecta novercae  
138 provocat et dignis invitat Pallada templis.  
139 Jam placidae dant signa tubae, jam fortibus ardens  
140 fumat harena sacris. Hos nec Pisaeus honores  
141 Juppiter aut Cirrhae pater aspernetur opacae.  
142 Nil his triste locis ; cedat lacrimabilis Isthmos,  
143 cedat atrox Nemeae : litat hic felicior infans.  
144 Ipsae puniceis virides Nereides antris  
145 exsiliunt ultro : scopulis umentibus haerent  
146 nec pudet occulte nudas spectare palaestras.  
147 Spectat et Icario nemorosus palmite Gaurus  
148 silvaque, quae fixam pelago Nesida coronat,  
149 et placidus Limon omenque Euploea carinis  
150 et Lucrina Venus, Phrygioque e vertice Graias  
151 addisces, Misene, tubas, ridetque benigna  
152 Parthenope gentile sacrum nudosque virorum  
153 certatus et parva suae simulacra coronae.  
154 Quin age et ipse libens proprii certaminis actus  
155 invicta dignare manu, seu nubila disco  
156 findere seu volucres Zephyros praecedere telo  
157 seu tibi dulce manu Libycas nodare palaestras :  
158 indulge sacris et, si tibi poma supersunt  
159 Hesperidum, gremio venerabilisingere Pollae ;

160 nam capit et tantum non degenerabit honorem.  
 161 Quod si dulce decus viridesque resumeret annos,  
 162 (da veniam, Alcide) fors hic et pensa tulisses.  
 163 Haec ego nascentes laetus bacchatus ad aras  
 164 libamenta tuli. Nunc ipse in limine - cerno  
 165 solventem voces et talia dicta ferentem :  
 166 "Macte animis opibusque meos imitate labores,  
 167 qui rigidas rupes infecundaeque pudenda  
 168 naturae deserta domas et vertis in usum  
 169 lustra habitata feris foedeque latentia profers  
 170 numina. Quae tibi nunc meritorum praemia solvam ?  
 171 quas referam grates ? Parcarum fila tenebo  
 172 extendamque colus (duram scio vincere Mortem) ;  
 173 avertam luctus et tristia damna vetabo  
 174 teque nihil laesum viridi renovabo senecta  
 175 concedamque diu juvenes spectare nepotes,  
 176 donec et hic sponsae maturus et illa marito,  
 177 rursus et ex illis soboles nova grexque protervus  
 178 nunc umeris inreptet avi nunc agmine blando  
 179 certatim placidae concurrat ad oscula Pollae.  
 180 Nam templis numquam statuatur terminus aevi,  
 181 dum me flammigeri portabit machina caeli.  
 182 Nec mihi plus Nemeae priscumque habitabitur Argos  
 183 nec Tiburna domus solisque cubilia Gades."  
 184 Sic ait ; et tangens surgentem altaribus ignem  
 185 populeaque movens albentia tempora silva  
 186 et Styga et aetherii juravit fulmina Patris.

PROPEMPTICON MAECIO CELERI

S3\_2 v.1 Di quibus audaces amor est servare carinas,  
 2 saevaue ventosi mulcere pericula ponti,  
 3 sternite molle fretum placidumque advertite votis  
 4 concilium, et lenis non obstrepat unda precanti :  
 5 grande tuo rarumque damus, Neptune, profundo,  
 6 depositum ; juvenis dubio committitur alto  
 7 Maecius atque animae partem super aequora nostrae  
 8 majorem transferre parat. Proferte benigna  
 9 sidera et antemnae gemino considite cornu,  
 10 oebalii fratres ; vobis pontusque polusque  
 11 luceat ; Iliacae longe nimbose sororis  
 12 astra fugate, precor, totoque excludite caelo.  
 13 Vos quoque caeruleum ponti, Nereides, agmen,  
 14 quis honor et regni cessit fortuna secundi  
 15 (dicere quae magni fas sit mihi sidera ponti),  
 16 surgite de vitreis spumosae Doridos antris  
 17 baianosque sinus et feta tepentibus undis  
 18 litora tranquillo certatim ambite natatu,  
 19 quaerentes ubi celsa ratis, quam scandere gaudet  
 20 nobilis Ausoniae Celer armipotentis alumnus.  
 21 Nec quaerenda diu ; modo nam trans aequora terris  
 22 prima Dicarcheis Pharium gravis intulit annum,  
 23 prima salutavit Capreas et margine dextro  
 24 sparsit Tyrrhenae Mareotica vina Minervae.  
 25 Hujus utrumque latus molli praecingite gyro,  
 26 partitaeque vices vos stuppea tendite mali



27 vincula, vos summis adnectite sipara velis,  
 28 vos Zephyris aperite sinus ; pars transtra reponat,  
 29 pars demittat aquis curvae moderamina puppis ;  
 30 sint quibus exploret primos gravis artemo flatus,  
 31 quaeque secuturam religent post terga phaselon  
 32 uncaque summersae penitus retinacula vellant ;  
 33 temperet haec aestus pelagusque inclinet ad ortus :  
 34 officio careat glaucarum nulla sororum.  
 35 Hinc multo Proteus geminoque hinc corpore Triton  
 36 praenatet, et subitis qui perdidit inguina monstris  
 37 Glaucus, adhuc patriis quotiens adlabitur oris  
 38 litoream blanda feriens Anthedona cauda.  
 39 Tu tamen ante omnes, diva cum matre Palaemon,  
 40 annue, si vestras amor est mihi pandere Thebas,  
 41 nec cano degeneri Phoebeum Amphiona plectro.  
 42 Et pater, Aeolio frangit qui carcere ventos,  
 43 cui varii flatus omnisque per aequora mundi  
 44 spiritus atque hiemes nimbosaque nubila parent,  
 45 artius objecto Borean Eurumque Notumque  
 46 monte premat : soli Zephyro sit copia caeli,  
 47 solus agat puppes summasque supernatet undas  
 48 assiduus pelago ; donec tua turbine nullo  
 49 laeta Paraetoniis adsignet carbasa ripis."  
 50 Audimur. Vocat ipse ratem nautasque morantes  
 51 increpat. Ecce meum timido jam frigore pectus  
 52 labitur et nequeo, quamvis movet ominis horror,  
 53 claudere suspensos oculorum in margine fletus.  
 54 Jamque ratem terris divisit fune soluto  
 55 navita et angustum dejecit in aequora pontem.  
 56 Saevus et e puppi longo clamore magister  
 57 dissipat amplexus atque oscula fida revellit,  
 58 nec longum cara licet in cervice morari.  
 59 Attamen in terras e plebe novissimus omni  
 60 ibo, nec egrediar nisi jam currente carina.  
 61 Quis rude et abscissum miseris animantibus aequor  
 62 fecit iter solidaeque pios telluris alumnos  
 63 expulit in fluctus pelagoque immisit hianti  
 64 audax ingenii ? nec enim temeraria virtus  
 65 illa magis, summae gelidum quae Pelion Ossae  
 66 junxit anhelantemque jugis bis pressit Olympum.  
 67 Usque adeone parum lentas transire paludes  
 68 stagnaque et angustos summittere pontibus amnes ?  
 69 imus in abruptum gentilesque undique terras  
 70 fugimus exigua clausi trabe et aere nudo.  
 71 Inde furor ventis indignataeque procellae  
 72 et caeli fremitus et fulmina plura Tonanti.  
 73 Ante rates pigro torpebant aequora somno,  
 74 nec spumare Thetis nec spargere nubila fluctus  
 75 audebant. Visis tumuerunt puppibus undae, ,  
 76 inque hominem surrexit hiems. Tunc nubila Plias  
 77 Oleniumque pecus, solito tunc pejor Orion.  
 78 Justa queror ; fugit ecce vagas ratis acta per undas  
 79 paulatim minor et longe servantia vincit  
 80 lumina, tot gracili ligno complexa timores,  
 81 quaeque super reliquos te, nostri pignus amoris,  
 82 portatura, Celer. Quo nunc ego pectore somnos  
 83 quoque queam perferre dies ? quis cuncta paventi  
 84 nuntius, an facili te praetermiserit unda

85 Lucani rabida ora maris, num torta Charybdis  
86 fluctuet aut Siculi populatrix virgo profundi,  
87 quos tibi currenti praeceps gerat Hadria mores,  
88 quae pax Carpathio, quali te subvehat aura  
89 Doris Agenorei furtis blandita juvenci ?  
90 Sed merui questus. Quid enim te castra petente  
91 non vel ad ignotos ibam comes impiger Indos  
92 Cimmeriumque chaos ? starem prope bellica regis  
93 signa mei, seu tela manu seu frena teneres,  
94 armatis seu jura dares ; operumque tuorum  
95 etsi non socius, certe mirator adessem.  
96 Si quondam magno Phoenix reverendus Achilli  
97 litus ad Iliacum Thymbraeaeque Pergama venit  
98 imbellis tumidoque nihil juratus Atridae,  
99 cur nobis ignavus amor ? Sed pectore fido  
100 numquam abero longisque sequar tua carbasa votis.  
101 Isi, Phoroneis olim stabulata sub antris,  
102 nunc regina Phari numenque Orientis anhelis,  
103 excipe multisono puppem Mareotida sistro  
104 ac juvenem egregium, Latius cui ductor Eoa  
105 signa Palaestinasque dedit frenare cohortes,  
106 ipsa manu placida per limina festa sacrosque  
107 duc portus urbesque tuas. Te praeside noscat,  
108 unde paludosi fecunda licentia Nili,  
109 cur vada desidant et ripa coerceat undas  
110 Cecropio stagnata luto, cur invida Memphis,  
111 curve Therapnaei lasciviat ora Canopi,  
112 cur servet Pharias Lethaeus janitor aras,  
113 vilia cur magnos aequent animalia divos ;  
114 quae sibi praesternat vivax altaria Phoenix,  
115 quos dignetur agros aut quo se gurgite Nili  
116 mergat adoratus trepidis pastoribus Apis.  
117 Duc et ad Emathios manes, ubi belliger urbis  
118 conditor Hyblaeo perfusus nectare durat,  
119 anguiferamque domum, blando qua mersa veneno  
120 Actias Ausonias fugit Cleopatra catenas.  
121 Usque et in Assyrias sedes mandataque castra  
122 prosequere et Marti juvenem, dea, trade Latino.  
123 Nec novus hospes erit : puer his sudavit in arvis  
124 notus adhuc tantum majoris lumine clavi,  
125 jam tamen et turmas facili praevertere gyro  
126 fortis et Eoas jaculo damnare sagittas.  
127 Ergo erit illa dies, qua te majora daturus  
128 Caesar ab emerito jubeat discedere bello,  
129 at nos hoc iterum stantes in litore vastos  
130 cernemus fluctus aliasque rogabimus auras.  
131 O tum quantus ego aut quanta votiva movebo  
132 plectra lyra, cum me magna cervice ligatum  
133 attolles umeris atque in mea pectora primum  
134 incumbes e puppe novus servataque reddes  
135 colloquia inque vicem medios narrabimus annos,  
136 tu rapidum Euphraten et regia Bactra sacrasque  
137 antiquae Babylonis opes et Zeuma, Latinae  
138 pacis iter, qua dulce nemus florentis Idymes,  
139 qua pretiosa Tyros rubeat, qua purpura suco  
140 Sidoniis iterata bafis, ubi germine primum,  
141 candida felices sudent opobalsama virgae :  
142 ast ego, devictis dederim quae busta Pelasgis

143 quaeve laboratas claudat mihi pagina Thebas.

CONSOLATIO AD CLAUDIVM ETRVSCVM

S3\_3 v.1 Summa deum, Pietas, cujus gratissima caelo  
 2 rara profanatas inspectant numina terras,  
 3 huc vittata comam niveoque insignis amictu,  
 4 qualis adhuc praesens nullaque expulsa nocentum  
 5 fraude rudes populos atque aurea regna colebas,  
 6 mitibus exsequiis ades et lugentis Etrusci  
 7 cerne pios fletus laudataque lumina terge.  
 8 Nam quis inexpleto rumpentem pectora questu  
 9 complexumque rogos incumbentemque favillis  
 10 aspiciens non aut primaevae funera plangi  
 11 conjugis aut nati modo pubescentia credat  
 12 ora rapi flammis ? pater est qui fletur. Adeste  
 13 dique hominesque sacris. Procul hinc, procul ite nocentes,  
 14 si cui corde nefas tacitum fessique senectus  
 15 longa patris, si quis pulsatae conscius umquam  
 16 matris et inferna rigidum timet Aeacon urna :  
 17 insontes castosque voco. Tenet ecce seniles  
 18 leniter implicitos vultus sanctamque parentis  
 19 canitiem spargit lacrimis animaeque supremum  
 20 frigus amat ; celeres genitoris filius annos  
 21 (mira fides !) nigrasque putat properasse sorores.  
 22 Exsultent placidi Lethaea ad flumina manes,  
 23 Elysiae gaudete domus, date sarta per aras  
 24 festaque pallentes hilarent altaria lucos.  
 25 Felix a ! nimium felix plorataque nato  
 26 umbra venit. Longe Furiarum sibila, longe  
 27 tergeminus custos, penitus via longa patescat  
 28 manibus egregiis. Eat horrendumque silentis  
 29 accedat domini solium gratesque supremas  
 30 perferat et totidem juveni roget anxius annos.  
 31 Macte pio gemitu. Dabimus solacia dignis  
 32 luctibus Aoniasque tuo sacrabimus ultro  
 33 inferias, Etrusce, seni. Tu largus Eoa  
 34 germina, tu messes Cilicumque Arabumque superbas  
 35 merge rogis ; ferat ignis opes heredis et alto  
 36 aggere missuri nitido pia nubila caelo  
 37 stipentur cineres : nos non arsura feremus  
 38 munera, venturosque tuus durabit in annos  
 39 me monstrante dolor. Neque enim mihi flere parentem  
 40 ignotum ; similis gemui projectus ad ignem.  
 41 Ille mihi tua damna dies compescere cantu  
 42 suadet : et ipse tuli quos nunc tibi confero questus.  
 43 Non tibi clara quidem, senior placidissime, gentis  
 44 linea nec proavis demissum stemma, sed ingens  
 45 supplevit fortuna genus culpamque parentum  
 46 oculuit. Nec enim dominos de plebe tulisti,  
 47 sed quibus occasus pariter famulantur et ortus.  
 48 Nec pudor iste tibi : quid enim terrisque poloque  
 49 parendi sine lege manet ? vice cuncta reguntur  
 50 alternisque premunt. Propriis sub regibus omnis  
 51 terra ; premit felix regum diademata Roma ;  
 52 hanc ducibus frenare datum ; mox crescit in illos  
 53 imperium superis. Sed habent et numina legem :

54 servit et astrorum velox chorus et vaga servit  
 55 luna nec injussae totiens redit orbita lucis,  
 56 Et (modo si fas est aequare jacentia summis)  
 57 pertulit et saevi Tirynthius horrida regis  
 58 pacta, nec erubuit famulantis fistula Phoebi.  
 59 Sed neque barbaricis Latio transmissus ab oris :  
 60 Smyrna tibi gentile solum potusque verendo  
 61 fonte Meles Hermique vadum, quo Lydius intrat  
 62 Bacchus et aurato reficit sua cornua limo.  
 63 Laeta dehinc series variisque ex ordine curis  
 64 auctus honos ; semperque gradi prope numina, semper  
 65 Caesareum coluisse latus sacrisque deorum  
 66 arcanis haerere datum. Tibereia primum  
 67 aula tibi vixdum ora nova mutante juvena  
 68 panditur (hic annis multa super indole victis  
 69 libertas oblata venit) nec proximus heres,  
 70 immitis quamquam et Furiis agitatus, abegit.  
 71 Hinc et in Arctos tenuis comes usque pruinas  
 72 terribilem affatu passus visuque tyrannum  
 73 immanemque suis, ut qui metuenda ferarum  
 74 corda domant mersasque jubent jam sanguine tacto  
 75 reddere ab ore manus et nulla vivere praeda.  
 76 Praecipuos sed enim merito surrexit in actus  
 77 nondum stelligerum senior dimissus in axem  
 78 Claudius et longo transmittit habere nepoti.  
 79 Quis superos metuens pariter tot templa, tot aras  
 80 promeruisse datur ? Summi Jovis aliger Arcas  
 81 nuntius ; imbrifera potitur Thaumantide Juno ;  
 82 stat celer obsequio jussa ad Neptunia Triton :  
 83 tu totiens mutata ducum juga rite tulisti  
 84 integer, inque omni felix tua cumba profundo.  
 85 Jamque piam lux alta domum praecelsaque toto  
 86 intravit Fortuna gradu ; jam creditur uni  
 87 sanctarum digestus opum partaeque per omnis  
 88 divitiae populos magnique impendia mundi.  
 89 Quicquid ab auriferis ejectat Hiberia fossis,  
 90 Dalmatico quod monte nitet, quod messibus Afris  
 91 veritur, aestiferi quicquid terit area Nili,  
 92 quodque legit mersus pelagi scrutator Eoi,  
 93 et Lacedaemonii pecuaria culta Galesi  
 94 perspicuaeque nives Massylaque robora et Indi  
 95 dentis honos : uni parent commissa ministro,  
 96 quae Boreas quaeque Euris atrox, quae nubilus Auster  
 97 invehit ; hibernos citius numeraveris imbres  
 98 silvarumque comas. Vigil iste animique sagacis  
 99 excitus evolvit quantum Romana sub omni  
 100 pila die quantumque tribus, quid templa, quid alti  
 101 undarum cursus, quid propugnacula poscant  
 102 aequoris aut longe series porrecta viarum ;  
 103 quod domini celsis niteat laquearibus aurum,  
 104 quae divum in vultus igni formanda liquescat  
 105 massa, quid Ausoniae scriptum crepet igne Monetae.  
 106 Hinc tibi rara quiet animoque exclusa voluptas,  
 107 exiguaeque dapes et numquam laesa profundo  
 108 cura mero ; sed jura tamen genialia cordi  
 109 et mentem vincire toris ac jungere festa  
 110 conubia et fidus domino genuisse clientes.  
 111 Quis sublime genus formamque insignis Etruscae

112 nesciat ? haud quamquam proprio mihi cognita visu,  
 113 sed decus eximium famae par reddit imago,  
 114 et sibimet similis natorum gratia monstrat.  
 115 Nec vulgare genus ; fascēs summamque curulem  
 116 frater et Ausonios enses mandataque fidus  
 117 signa tulit, cum prima truces amentia Dacos  
 118 impulit et magno gens est damnata triumpho.  
 119 Sic quicquid patrio cessatum a sanguine, mater  
 120 reddidit, obscurumque latus clarescere vidit  
 121 conubio gavisā domus. Nec pignora longe ;  
 122 quippe bis ad partus venit Lucina manuque  
 123 ipsa levi gravidos tetigit fecunda labores.  
 124 Felix a ! si longa dies, si cernere vultus  
 125 natorum viridisque genas tibi justa dedissent  
 126 stamina. Sed media cecidere abrupta juventa  
 127 gaudia, florentesque manu scidit Atropos annos ;  
 128 qualia pallentes declinant lilia culmos  
 129 pubentesque rosae primos moriuntur ad austros,  
 130 aut ubi verna novis exspirat purpura pratis.  
 131 Illa, sagittiferi, circumvolitastis, Amores,  
 132 funera maternoque rogos unxistis amomo ;  
 133 nec modus aut pennis laceris aut crinibus ignem  
 134 spargere, collectaeque pyram struxere pharetrae.  
 135 Quas tunc inferias aut quae lamenta dedisses  
 136 maternis, Etrusce, rogis, qui funera patris  
 137 haud matura putas atque hos pius ingemis annos !  
 138 Illum et qui nutu superas nunc temperat arces,  
 139 progeniem claram terris partitus et astris,  
 140 laetus Idymaei donavit honore triumphī  
 141 dignatusque loco victricis et ordine pompae  
 142 non vetuit, tenuesque nihil minuere parentes.  
 143 Atque idem in cuneos populo deduxit equestres  
 144 mutavitque genus laevaeque ignobile ferrum  
 145 exuit et celso natorum aequavit honorem.  
 146 Dextra bis octonis fluxerunt saecula lustris,  
 147 atque aevi sine nube tenor. Quam dives in usus  
 148 natorum totoque volens excedere censu,  
 149 testis adhuc largi nitor inde assuetus Etrusci,  
 150 cui tua non humilis dedit indulgentia mores ;  
 151 hunc siquidem amplexu semper revocante tenebas  
 152 blandus et imperio numquam pater ; hujus honori  
 153 pronior ipse etiam gaudebat cedere frater.  
 154 Quas tibi devoti juvenes pro patre renato,  
 155 summe ducum, grates, aut quae pia vota rependunt !  
 156 Tu (seu tarda situ rebusque exhausta senectus  
 157 erravit seu blanda diu Fortuna regressum  
 158 maluit) attonitum et venturi fulminis ictus  
 159 horrentem tonitru tantum lenique procella  
 160 contentus monuisse senem ; cumque horrida supra  
 161 aequora curarum socius procul Itala rura  
 162 linqueret, hic molles Campani litoris oras  
 163 et Diomedaeas concedere jussus in arces  
 164 atque hospes, non exsul, erat. Nec longa moratus  
 165 Romuleum reseras iterum, Germanice, limen  
 166 maerentemque foves inclinatosque penates  
 167 erigis. Haut mirum, ductor placidissime, quando  
 168 haec est quae victis parentia foedera Cattis  
 169 quaeque suum Dacis donat clementia montem,

170 quae modo Marcomanos post horrida bella vagosque,  
 171 Sauromatas Latio non est dignata triumpho.  
 172 Jamque in fine dies et inexorabile pensum  
 173 deficit. Hic maesti pietas me poscit Etrusci,  
 174 qualia nec Siculae moderantur carmina rupes  
 175 nec fati jam certus olor saevique marita  
 176 Tereos. Heu quantis lassantem brachia vidi  
 177 planctibus et prono fusum super oscula vultu !  
 178 Vix famuli comitesque tenent, vix arduus ignis  
 179 summovet. Haud aliter gemuit perjuria Theseus  
 180 litore, qui falsis deceperat Aegea velis.  
 181 Tunc immane gemens foedatusque ora tepentes  
 182 affatur cineres : "Cur nos, fidissime, linqvis  
 183 Fortuna redeunte, pater ? Modo numina magni  
 184 praesidis atque breves superum placavimus iras,  
 185 nec frueris tantique orbatus muneris usu  
 186 ad manes, ingrante, fugis. Nec flectere Parcas  
 187 aut placare malae datur aspera numina Lethes ?  
 188 Felix, cui magna patrem cervice vehenti  
 189 sacra Mycenaeae patuit reverentia flammae,  
 190 quique tener saevis genitorem Scipio Poenis  
 191 abstulit et Lydi pietas temeraria Lausi.  
 192 Ergo et Thessalici conjunx pensare mariti  
 193 funus et immitem potuit Styga vincere supplex  
 194 Thracius ? hoc quanto melius pro patre liceret.  
 195 Non totus rapiere tamen, nec funera mittam  
 196 longius ; hic manes, hic intra tecta tenebo :  
 197 tu custos dominusque laris, tibi cuncta tuorum  
 198 parebunt ; ego rite minor semperque secundus  
 199 assiduas libabo dapes et pocula sacris  
 200 manibus effigiesque colam : te lucida saxa,  
 201 te similem doctae referet mihi linea cerae,  
 202 nunc ebur et fulvum vultus imitabitur aurum.  
 203 Inde viam morum longaeque examina vitae  
 204 adfatusque pios monituraque somnia poscam."  
 205 Talia dicentem genitor dulcedine laeta  
 206 audit et immites lente descendit ad umbras  
 207 verbaque dilectae fert narraturus Etruscae.  
 208 Salve supremum, senior mitissime patrum,  
 209 supremumque vale, qui numquam sospite nato  
 210 triste chaos maestique situs patiēre sepulcri.  
 211 Semper odoratis spirabunt floribus arae,  
 212 semper et Assyrios felix bibet urna liquores  
 213 et lacrimas, qui major honos. Hic sacra litabit  
 214 manibus eque tua tumulum tellure levabit.  
 215 Nostra quoque exemplo meritis tibi carmina sancit  
 216 hoc etiam gaudens cinerem donasse sepulcro.

## CAPILLI FLAVI EARINI

S3\_4 v.1 Ite, comae, facilemque precor transcurrere pontum,  
 2 ite coronato recubantes molliter auro ;  
 3 ite, dabit cursus mitis Cytherea secundos  
 4 placabitque notos, fors et de puppe timenda  
 5 transferet inque sua ducet super aequora concha.  
 6 Accipe laudatos, juvenis Phoebeie, crines

7 quos tibi Caesareus donat puer, accipe laetus  
8 intonsoque ostende patri. Sine dulce nitentes  
9 comparet atque diu fratris putet esse Lyaei.  
10 Forsan et ipse comae numquam labentis honorem  
11 praemetet atque alio clusum tibi ponet in auro.  
12 Pergame, pinifera multum felicior Ida,  
13 illa licet sacrae placeat sibi nube rapinae  
14 (nempe dedit superis illum quem turbida semper  
15 juno videt refugitque manum nectarque recusat),  
16 at tu grata deis pulchroque insignis alumno  
17 misisti Latio, placida quem fronte ministrum  
18 juppiter Ausonius pariter Romanaque Juno  
19 aspiciunt et uterque probant. Nec tanta potenti  
20 terrarum domino divum sine mente voluptas.  
21 Dicitur Idalios Erycis de vertice lucos  
22 dum petit et molles agitat Venus aurea cygnos,  
23 Pergameas intrasse domos, ubi maximus aegris  
24 auxiliator adest et festinantia sistens  
25 Fata salutifero mitis deus incubat angui.  
26 Hic puerum egregiae praeclarum sidere formae  
27 ipsius ante dei ludentem conspicit aras.  
28 Ac primum subita paulum decepta figura  
29 natorum de plebe putat ; sed non erat illi  
30 arcus et ex umeris nullae fulgentibus umbrae.  
31 Miratur puerile decus, vultumque comasque  
32 aspiciens : "Tunc Ausonias", ait, "ibis ad arces,  
33 neglectus Veneri ? Tu sordida tecta jugumque  
34 servitii vulgare feres ? Procul absit : ego isti,  
35 quem meruit formae dominum dabo. Vade age mecum,  
36 vade, puer : ducam volucris per sidera curru  
37 donum immane duci ; nec te plebeia manebunt  
38 jura : Palatino famulus deberis amori.  
39 Nil ego, nil, fateor, toto tam dulce sub orbe  
40 aut vidi aut genui. Cedet tibi Latmius ultro  
41 Sangariusque puer quemque irrita fontis imago  
42 et sterilis consumpsit amor. Te caerula Nais  
43 mallet et adpressa traxisset fortius urna.  
44 Tu puer ante omnis ; solus formosior ille,  
45 cui daberis." Sic orsa leves secum ipsa per auras  
46 tollit olorinaque jubet considerare biga.  
47 Nec mora. Jam Latii montes veterisque penates  
48 Evandri, quos mole nova pater inclitus orbis  
49 excolit et summis aequat Germanicus astris.  
50 Tunc propior jam cura deae, quae forma capillis  
51 optima, quae vestis roseos accendere vultus  
52 apta, quod in digitis, collo quod dignius aurum.  
53 Norat caelestis oculos ducis ipsaque taedas  
54 junxerat et plena dederat conubia dextra :  
55 sic ornata crines, Tyrios sic fundit amictus,  
56 dat radios ignemque suum. Cessere priores  
57 deliciae famulumque greges ; hic pocula magno  
58 prima duci murrasque graves crystallaque portat  
59 candidiore manu : crescit nova gratia Baccho.  
60 Care puer superis, qui praelibare verendum  
61 nectar et ingentem totiens contingere dextram  
62 electus, quam nosse Getae, quam tangere Persae  
63 Armeniique Indique petunt ! o sidere dextro  
64 edite, multa tibi divum indulgentia favit.

65 Olim etiam, ne prima genas lanugo nitentes  
 66 carperet et pulchrae fuscaret gratia formae,  
 67 ipse deus patriae celsam trans aequora liquit  
 68 Pergamon. Haud ulli puerum mollire potestas  
 69 credita, sed tacita juvenis Phoebieus arte  
 70 leniter haud ullo concussum vulnere corpus  
 71 de sexu transire jubet. Tamen anxia curis  
 72 mordetur puerique timet Cytherea dolores.  
 73 Nondum pulchra ducis clementia coeperat ortu  
 74 intactos servare mares ; nunc frangere sexum  
 75 atque hominem mutare nefas, gavisaque solos  
 76 quos genuit Natura videt, nec lege sinistra  
 77 ferre timent famulae natorum pondera matres.  
 78 Tu quoque nunc juvenis, genitus si tardius esses,  
 79 umbratusque genas et adultos fortior artus,  
 80 non unum gaudens Phoebea ad limina munus  
 81 misisses ; patrias nunc solus crinis ad oras  
 82 naviget. Hunc multo Paphie saturabat amomo,  
 83 hunc nova tergemina pectebat Gratia dextra.  
 84 Huic et purpurei cedet coma saucia Nisi,  
 85 et quam Sperchio tumidus servabat Achilles.  
 86 Ipsi, cum primum niveam praecerpere frontem  
 87 decretum est umerosque manu nudare nitentes,  
 88 adcurrunt teneri Paphia cum matre volucres  
 89 expediuntque comas et serica pectore ponunt  
 90 pallia. Tunc junctis crinem incidere sagittis  
 91 atque auro gemmisque locant ; rapit ipsa cadentem  
 92 mater et arcanos iterat Cytherea liquores.  
 93 Tunc puer e turba, manibus qui forte supinis  
 94 nobile gemmato speculum portaverat auro,  
 95 "Hoc quoque demus", ait, "patriis nec gratius ullum  
 96 munus erit templis ipsoque potentius auro.  
 97 Tu modo fige aciem et vultus hic usque relinque."  
 98 Sic ait et speculum recludit imagine rapta.  
 99 At puer egregius tendens ad sidera palmas :  
 100 "His mihi pro donis, hominum mitissime custos,  
 101 si merui, longa dominum renovare juventa  
 102 atque orbi servare velis. Hoc sidera mecum,  
 103 hoc undae terraeque rogant. Eat, oro, per annos  
 104 Iliacos Pyliosque simul, propriosque penates  
 105 gaudeat et secum Tarpeia senescere templa."  
 106 Sic ait et motas miratur Pergamos aras.

## AD VXOREM

S3\_5 v.1 Quid mihi maesta die, sociis quid noctibus, uxor,  
 2 anxia pervigili ducis suspiria cura ?  
 3 Non metuo ne laesa fides aut pectore in isto  
 4 alter amor ; nullis in te datur ire sagittis  
 5 (audiat infesto licet hoc Rhamnusia vultu)  
 6 non datur. Et si egomet patrio de litore raptus  
 7 quattuor emeritis per bella, per aequora lustris  
 8 errarem, tu mille procos intacta fugares,  
 9 non intersectas commenta retexere telas,  
 10 sed sine fraude palam, thalamosque armata negasses.  
 11 Dic tamen, unde alta mihi fronte et nubila vultus ?



12 anne quod Euboicos fessus remeare penates  
13 auguror et patria senium componere terra ?  
14 Cur hoc triste tibi ? Certe lascivia corde  
15 nulla nec aut rapidi mulcent te proelia Circi  
16 aut intrat sensus clamosi turba theatri ;  
17 sed probitas et opaca quies et sordida numquam  
18 gaudia. Quas autem comitem te rapto per undas ?  
19 Quamquam et si gelidas irem mansurus ad Arctos  
20 vel super Hesperiae vada caligantia Thyles  
21 aut septemgemi caput impenetrabile Nili,  
22 hortarere vias. Etenim tua (nempe benigna  
23 quam mihi sorte Venus junctam florentibus annis  
24 servat et in senium), tua, quae me vulnere primo  
25 intactum thalamis et adhuc juvenile vagantem  
26 fixisti, tua frena libens docilisque recepi,  
27 et semel insertas non mutaturus habenas  
28 usque premo. Tu me nitidis Albana ferentem  
29 dona comis sanctoque indutum Caesaris auro  
30 visceribus complexa tuis, sertisque dedisti,  
31 oscula anhela meis ; tu, cum Capitolia nostrae  
32 infitiata lyrae, saevum ingratumque dolebas  
33 mecum victa Jovem ; tu procurrentia primis  
34 carmina nostra sonis, totasque in murmure noctes  
35 aure rapis vigili ; longi tu sola laboris  
36 conscia, cumque tuis crevit mea Thebais annis.  
37 Qualem te nuper Stygias prope raptus ad umbras,  
38 cum jam Lethaeos audirem comminus amnes,  
39 aspexi, tenuique oculos jam morte cadentes !  
40 Scilicet exhausti Lachesis mihi tempora fati  
41 te tantum miserata dedit, superique potentes  
42 invidiam timuere tuam. Post ista propinquum  
43 nunc iter optandosque sinus comes ire moraris ?  
44 Heu ubi nota fides totque explorata per usus,  
45 qua veteres Latias Graias heroidas aequas ?  
46 Isset ad Iliacas (quid enim deterret amantes ?)  
47 Penelope gavisa domos, si passus Ulixes ;  
48 questa est Aegiale, questa est Meliboea relinqui,  
49 et quam (quam saevi !) Fecerunt maenada planctus.  
50 Nec minor his tu nosse fidem vitamque maritis  
51 dedere. Sic certe cineres umbramque priorem  
52 quaeris adhuc, sic exsequias amplexa canori  
53 conjugis ingentes iterasti pectore planctus,  
54 jam mea. Nec pietas alia est tibi cura que natae ;  
55 sic et mater amas, sic numquam corde recedit  
56 nata tuo, fixamque animi penetralibus imis  
57 nocte dieque tenes. Non sic Trachinia nidos  
58 Alcyone, vernos non sic Philomela penates  
59 circumit amplectens animamque in pignora transfert.  
60 Et nunc illa tenet viduo quod sola cubili  
61 otia jam pulchrae terit infecunda juventae.  
62 Sed venient, plenis venient conubia taedis.  
63 Sic certe formaeque bonis animique meretur ;  
64 sive chelyn complexa petit seu voce paterna  
65 discendum Musis sonat et mea carmina flectit,  
66 candida seu molli diducit bracchia motu,  
67 ingenium probitas artemque modestia vincit.  
68 Nonne leves pueros, non te, Cytherea, pudebit  
69 hoc cessare decus ? Nec tantum Roma jugales

70 conciliare toros festasque accendere taedas  
 71 fertilis : et nostra generi tellure dabuntur.  
 72 Non adeo Vesuvinus apex et flammea diri  
 73 montis hiems trepidas exhausit civibus urbes :  
 74 stant populisque vigent. Hinc auspice condita Phoebo  
 75 tecta Dicarchei portusque et litora mundi  
 76 hospita ; at hinc magnae tractus imitantia Romae  
 77 quae Capys advectis implevit moenia Teucris.  
 78 Nostra quoque et propriis tenuis nec rara colonis  
 79 Parthenope, cui mite solum trans aequora vectae  
 80 ipse Dionaea monstravit Apollo columba.  
 81 Has ego te sedes (nam nec mihi barbara Thrace  
 82 nec Libye natale solum) transferre laboro,  
 83 quas et mollis hiems et frigida temperat aestas,  
 84 quas imbelle fretum torpentibus adluit undis.  
 85 Pax segura locis et desidis otia vitae  
 86 et numquam turbata quies somnique peracti.  
 87 Nulla foro rabies aut strictae in jurgia leges :  
 88 morum jura viris solum et sine fascibus aequum.  
 89 Quid nunc magnificas species cultusque locorum  
 90 templaque et innumeris spatia interstincta columnis,  
 91 et geminam molem nudi tectique theatri  
 92 et Capitolinis quinquennia proxima lustris,  
 93 quid laudem litus libertatemque Menandri,  
 94 quam Romanus honos et Graia licentia miscent ?  
 95 Nec desunt variae circa oblectamina vitae :  
 96 sive vaporiferas, blandissima litora, Baias,  
 97 enthea fatidicae seu visere tecta Sibyllae  
 98 dulce sit Iliacoque jugum memorabile remo,  
 99 seu tibi Bacchei vineta madentia Gauri  
 100 Teleboumque domos, trepidis ubi dulcia nautis  
 101 lumina noctivagae tollit Pharus aemula lunae,  
 102 caraque non molli juga Surrentina Lyaeo,  
 103 quae meus ante alios habitator Pollius auget,  
 104 Denarumque lacus medicos Stabiasque renatas :  
 105 mille tibi nostrae referam telluris amores ?  
 106 Sed satis hoc, conjunx, satis est dixisse : creavit  
 107 me tibi, me socium longos astrinxit in annos.  
 108 Nonne haec amborum genetrix altrixque videri  
 109 digna ? Sed ingratus qui plura adnecto tuisque  
 110 moribus indubito : venies, carissima conjunx,  
 111 praeveniesque etiam. Sine me tibi ductor aquarum  
 112 Thybris et armiferi sordebunt tecta Quirini.

## SEPTIMVS DECIMVS CONSVLATVS IMP. AVG. GERMANICI

S4\_1 v.1 Laeta bis octonis accedit purpura fastis  
 2 Caesaris insignemque aperit Germanicus annum  
 3 atque oritur cum sole novo, cum grandibus astris  
 4 clarius ipse nitens et primo major Eoo.  
 5 Exsultent leges Latiae, gaudete curules,  
 6 et septemgemino jactantior aethera pulset  
 7 Roma jugo, plusque ante alias Evandrius arces  
 8 collis ovet : subiere novi Palatia fasces,  
 9 et requiem bis sextus honos precibusque receptis  
 10 Curia Caesareum gaudet vicisse pudorem.

11 Ipse etiam immensi reparator maximus aevi  
 12 attollit vultus et utroque a limine grates  
 13 Janus agit, quem tu vicina Pace ligatum  
 14 omnia jussisti componere bella novique  
 15 in leges jurare Fori. Levat ecce supinas  
 16 hinc atque inde manus geminaque haec voce profatur :  
 17 "Salve, magne parens mundi, qui saecula mecum  
 18 instaurare paras, talem te cernere semper  
 19 mense meo tua Roma cupit ; sic tempora nasci,  
 20 sic annos intrare decet. Da gaudia Fastis  
 21 continua ; hos umeros multo sinus ambiat ostro  
 22 et properata tuae manibus praetexta Minervae.  
 23 Aspicias ut templis alius nitor, altior aris  
 24 ignis et ipsa meae tepeant tibi sidera brumae,  
 25 moribus atque tuis gaudent turmaeque tribusque  
 26 purpureique patres, lucemque a consule ducit  
 27 omnis honos. Quid tale, precor, prior annus habebat ?  
 28 Dic age, Roma potens, et mecum, longa Vetustas,  
 29 dinumera fastos nec parva exempla recense,  
 30 sed quae sola meus dignetur vincere Caesar.  
 31 Ter Latio deciesque tulit labentibus annis  
 32 Augustus fasces, sed coepit sero mereri :  
 33 tu juvenis praegressus avos. Et quanta recusas,  
 34 quanta vetas ! flectere tamen precibusque senatus  
 35 permittes hunc saepe diem. Manet insuper ordo  
 36 longior, et totidem felix tibi Roma curules  
 37 terque quaterque dabit. Mecum altera saecula condes,  
 38 et tibi longaevi renovabitur ara parentis ;  
 39 mille tropaea ferēs, tantum permittite triumphos :  
 40 restat Bactra novis, restat Babylona tributis  
 41 frenari ; nondum gremio Jovis Indica laurus,  
 42 nondum Arabes Seresque rogant, nondum omnis honorem  
 43 annus habet, cupiuntque decem tua nomina menses."  
 44 Sic Janus clausoque libens se poste recepit.  
 45 Tunc omnes patuere dei laetoque dederunt  
 46 signa polo, longamque tibi, rex magne, juventam  
 47 annuit atque suos promisit Juppiter annos.

EVCHARISTICON AD IMP. AVG. GERM. DOMITIANVM

S4\_2 v.1 Regia Sidoniae convivium laudat Elissae,  
 2 qui magnum Aenean Laurentibus intulit arvis,  
 3 Alcinoique dapes mansuro carmine monstrat,  
 4 aequare qui multo reducem consumpsit Ulixem :  
 5 ast ego, cui sacrae Caesar nova gaudia cenae  
 6 nunc primum dominaque dedit consurgere mensa,  
 7 qua celebrem mea vota lyra, quas solvere grates  
 8 sufficiam ? non, si pariter mihi vertice laeto  
 9 nectat odoratas et Smyrna et Mantua lauros,  
 10 digna loquar. Mediis videor discumbere in astris  
 11 cum Jove et Iliaca porrectum sumere dextra  
 12 immortale merum. Steriles transmisimus annos :  
 13 haec aevi mihi prima dies, hic limina vitae.  
 14 Tene ego, regnator terrarum orbisque subacti  
 15 magne parens, te, spes hominum, te, cura deorum,  
 16 cerno jacens ? Datur haec juxta, datur ora tueri

17 vina inter mensasque, et non assurgere fas est ?  
 18 Tectum augustum, ingens, non centum insigne columnis,  
 19 sed quanta superos caelumque Atlante remisso  
 20 sustentare queant. Stupet hoc vicina Tonantis  
 21 regia, teque pari laetantur sede locatum  
 22 numina. Nec magnum properes excedere caelum :  
 23 tanta patet moles effusaeque impetus aulae  
 24 liberior, campi multumque amplexus operti  
 25 aetheros, et tantum domino minor ; ille penates  
 26 implet et ingenti genio juvat. Aemulus illic  
 27 mons Libys Iliacusque nitet tam multa Syene  
 28 et Chios et glaucae certantia Doridi saxa  
 29 Lunaque portandis tantum suffecta columnis.  
 30 Longa supra species : fessis vix culmina prenas  
 31 visibus auratique putes laquearia caeli.  
 32 Hic cum Romuleos proceres trabeataque Caesar  
 33 agmina mille simul jussit discumbere mensis,  
 34 ipsa sinus accincta Ceres Bacchusque laborat  
 35 sufficere. Aetherii felix sic orbita fluxit  
 36 Triptolemi ; sic vitifero sub palmitate nudos  
 37 umbravit colles et sobria rura Lyaeus.  
 38 Sed mihi non epulas Indisque innixa columnis  
 39 robora Maurorum famulasque ex ordine turmas,  
 40 ipsum, ipsum cupido tantum spectare vacavit  
 41 tranquillum vultus et majestate serena  
 42 mulcentem radios summittentemque modeste  
 43 fortunae vexilla suae ; tamen ore nitebat  
 44 dissimulatus honos. Talem quoque barbarus hostis  
 45 posset et ignotae conspectum agnoscere gentes.  
 46 Non aliter gelida Rhodopes in valle recumbit  
 47 dimissis Gradivus equis ; sic lubrica ponit  
 48 membra Therapnaea resolutus gymnade Pollux,  
 49 sic jacet ad Gangen Indis ululantibus Euan,  
 50 sic gravis Alcides post horrida jussa reversus  
 51 gaudebat strato latus adclinare leoni.  
 52 Parva loquor necdum aequo tuos, Germanice, vultus :  
 53 talis, ubi Oceani finem mensasque revisit  
 54 aethiopum sacro diffusus nectare vultus  
 55 dux superum secreta jubet dare carmina Musas  
 56 et Pallenaeos Phoebum laudare triumphos.  
 57 Di tibi - namque animas saepe exaudire minores  
 58 dicuntur - patriae bis terque exire senectae  
 59 annuerint fines. Rata numina miseris astris,  
 60 templaque des habitasque domos. Saepe annua pandas  
 61 limina, saepe novo Janum lictore salutes,  
 62 saepe coronatis iteres quinquennia lustris.  
 63 Qua mihi felices epulas mensaeque dedisti  
 64 sacra tuae, talis longo post tempore venit  
 65 lux mihi, Trojanae qualis sub collibus Albae,  
 66 cum modo Germanas acies modo Dacia sonantem  
 67 proelia Palladio tua me manus induit auro.

## VIA DOMITIANA

S4\_3 v.1 Quis duri silicis gravisque ferri  
 2 immanis sonus aequori propinquum

3 saxosae latus Appiae replevit ?  
 4 Certe non Libycae sonant catervae  
 5 nec dux advena pejerante bello  
 6 Campanos quatit inquietus agros,  
 7 nec frangit vada montibusque caesis  
 8 inducit Nero sordidas paludes,  
 9 sed qui limina bellicosa Jani  
 10 justis legibus et Foro coronat,  
 11 (quis castae Cereri diu negata  
 12 reddit jugera sobriasque terras,  
 13 quis fortem vetat interire sexum  
 14 et censor prohibet mares adultos  
 15 pulchrae supplicium timere formae,)  
 16 qui reddit Capitolio Tonantem  
 17 et Pacem propria domo reponit,  
 18 qui genti patriae futura semper  
 19 sancit lumina Flaviumque caelum,  
 20 hic segnis populi vias gravatus  
 21 et campos iter omne detinentes  
 22 longos eximit ambitus novoque  
 23 injectu solidat graves harenas,  
 24 gaudens Euboicae domum Sibyllae  
 25 Gauranosque sinus et aestuantes  
 26 septem montibus admovere Baias.  
 27 Hic quondam piger axe vectus uno  
 28 nutabat cruce pendula viator,  
 29 sorbebatque rotas maligna tellus,  
 30 et plebs in mediis Latina campis  
 31 horrebat mala navigationis ;  
 32 nec cursus agiles, sed impeditum  
 33 tardabant iter orbitae tacentes,  
 34 dum pondus nimium querens sub alta  
 35 repit languida quadrupes statera.  
 36 At nunc, quae solidum diem terebat,  
 37 horarum via facta vix duarum.  
 38 Non tensae volucrum per astra pennae  
 39 nec velocius ibitis, carinae.  
 40 Hic primus labor incohare sulcos  
 41 et rescindere limites et alto  
 42 egestu penitus cavare terras ;  
 43 mox haustas aliter replere fossas  
 44 et summo gremium parare dorso,  
 45 ne nutent sola, ne maligna sedes  
 46 et pressis dubium cubile saxis ;  
 47 tunc umbonibus hinc et hinc coactis  
 48 et crebris iter alligare gonfis.  
 49 O quantae pariter manus laborant !  
 50 Hi caedunt nemus exuuntque montes,  
 51 hi ferro scopulos trabesque levant ;  
 52 illi saxa ligant opusque texunt  
 53 cocto pulvere sordidoque tofo ;  
 54 hi siccant bibulas manu lacunas  
 55 et longe fluvios agunt minores.  
 56 Hae possent et Athon cavare dextrae  
 57 et maestum pelagus gementis Helles  
 58 intercludere ponte non natanti.  
 59 His parvus, nisi cliviae vetarent,  
 60 Inous freta miscuisset Isthmos.

61 Fervent litora mobilesque silvae,  
62 it longus medias fragor per urbes,  
63 atque echon simul hinc et inde fractam  
64 Gauro Massicus uvifer remittit.  
65 Miratur sonitum quieta Cyme  
66 et Literna palus pigerque Safon.  
67 At flavum caput umidumque late  
68 crinem mollibus impeditus ulvis  
69 Vulturinus levat ora maximoque  
70 pontis Caesarei reclinus arcu  
71 raucis talia faucibus redundat :  
72 "Camporum bone conditor meorum,  
73 quis me vallibus aviis refusum  
74 et ripas habitare nescientem  
75 recti legibus alvei ligasti  
76 (et nunc ille ego turbidus minaxque,  
77 vix passus dubias prius carinas,  
78 jam pontem fero perviusque calcor ;  
79 qui terras rapere et rotare silvas  
80 assueram, pudet, amnis esse coepi ;  
81 sed grates ago servitusque tanti est,  
82 quod sub te duce, te jubente, cessi,  
83 quod tu maximus arbiter meaeque  
84 victor perpetuus legere ripae.  
85 Et nunc limite me colis beato  
86 nec sordere sinis malumque late  
87 deterges sterilis soli pudorem,  
88 ne me pulvereum gravemque caelo  
89 Tyrrheni sinus obluat profundi  
90 qualis Cinyphius tacente ripa  
91 poenos Bagrada serpit inter agros),  
92 sed talis ferar ut nitente cursu  
93 tranquillum mare proximumque possim  
94 puro gurgite provocare Lirim."  
95 Haec Amnis pariterque se levarat  
96 ingenti plaga marmorata dorso.  
97 Hujus janua prosperumque limen  
98 arcus, belligeris ducis tropaeis  
99 et totis Ligurum nitens metallis,  
100 quantus nubila qui coronat imbri.  
101 Illic flectitur excitus viator,  
102 illic Appia se dolet relinqui.  
103 Tunc velocior acriorque cursus,  
104 tunc ipsos juvat impetus jugales ;  
105 ceu fessis ubi remigum lacertis  
106 primae carbasa ventilatis, aurae.  
107 Ergo omnes, age, quae sub axe primo  
108 Romani colitis Fidem parentis,  
109 prono limite commeate gentes,  
110 Eoae citius venite laurus.  
111 Nil obstat cupidis, nihil moratur :  
112 qui primo Tiberim reliquit ortu,  
113 primo vespere naviget Lucrinum.  
114 Sed quam fine viae recentis imo,  
115 qua monstrat veteres Apollo Cumas,  
116 albam crinibus infulisque cerno ?  
117 visu fallimur ? an sacris ab antris  
118 profert Chalcidicas Sibylla laurus ?

119 Cedamus ; chely, jam repone cantus :  
 120 vates sanctior incipit, tacendum est.  
 121 En et colla rotat novisque late  
 122 bacchatur spatiis viamque replet.  
 123 Tunc sic virgineo profatur ore :  
 124 "Dicebam, veniet (manete Campi  
 125 atque Amnis), veniet favente caelo,  
 126 qui foedum nemus et putres harenas  
 127 celsis pontibus et via levabit.  
 128 En hic est deus, hunc jubet beatis  
 129 pro se Juppiter imperare terris ;  
 130 quo non dignior has subit habenas,  
 131 ex quo me duce praescios Averni  
 132 Aeneas avida futura quaerens  
 133 lucos et penetravit et reliquit.  
 134 Hic paci bonus, hic timendus armis,  
 135 natura melior potentiorque.  
 136 Hic si flammigeros teneret axes,  
 137 largis, India nubibus maderes,  
 138 undaret Libye, teperet Haemus.  
 139 Salve, dux hominum et parens deorum,  
 140 provisum mihi conditumque numen.  
 141 Nec jam putribus evoluta chartis  
 142 sollemni prece Quindecim Virorum  
 143 perlustra mea dicta, sed canentem  
 144 ipsam comminus, ut mereris, audi.  
 145 Vidi quam seriem merentis aevi  
 146 pronectant tibi candidae sorores :  
 147 magnus te manet ordo saeculorum,  
 148 natis longior abnepotibusque  
 149 annos perpetua geres juventa,  
 150 quos fertur placidos adisse Nestor,  
 151 quos Tithonia computat senectus  
 152 et quantos ego Delium poposci.  
 153 Juravit tibi jam nivalis Arctus ;  
 154 nunc magnos Oriens dabit triumphos.  
 155 Ibis qua vagus Hercules et Euhan  
 156 ultra sidera flammeumque solem  
 157 et Nili caput et nives Atlantis,  
 158 et laudum cumulo beatus omni  
 159 scandes belliger abnuesque currus ;  
 160 donec Troicus ignis et renatae  
 161 Tarpeius pater intonabit aulae,  
 162 haec donec via te regente terras  
 163 annosa magis Appia senescat."

EPISTOLA AD VITORIVM MARCELLVM

S4\_4 v.1 Curre per Euboicos non segnis, epistola, campos,  
 2 hac ingressa vias qua nobilis Appia crescit  
 3 in latus et molles solidus premit agger harenas.  
 4 Atque ubi Romuleas velox penetraveris arces,  
 5 continuo dextras flavi pete Thybridis oras,  
 6 Lydia qua penitus stagnum navale coercet  
 7 ripa suburbanisque vadum praetexitur hortis.  
 8 Illic egregium formaque animisque videbis

9 Marcellum et celso praesignem vertice nosces.  
 10 Cui primam solito vulgi de more salutem,  
 11 mox inclusa modis haec reddere verba memento :  
 12 "Jam terras volucremque polum fuga veris aquosi  
 13 laxat et Icariis caelum latratibus urit ;  
 14 ardua jam densae rarescunt moenia Romae.  
 15 Hos Praeneste sacrum, nemus hos glaciale Dianae,  
 16 Algidus aut horrens aut Tuscula protegit umbra,  
 17 Tiburis hi lucos Anienaque frigora captant.  
 18 Te quoque clamorae quaenam plaga mitior Urbi  
 19 subtrahit ? aestivos quo decipis aere soles ?  
 20 Quid tuus ante omnis, tua cura potissima, Gallus,  
 21 nec non noster amor (dubium morumne probandus  
 22 ingeniine bonis) ? Latiis aestivat in oris  
 23 anne metalliferae repetit jam moenia Lunae  
 24 Tyrrenasque domos ? Quod si tibi proximus haeret,  
 25 non ego nunc vestro procul a sermone recedo ;  
 26 certum est, inde sonus geminas mihi circumit aures.  
 27 Sed tu, dum nimio possessa Hyperione flagrat  
 28 torva Cleonaei juba sideris, exue curis  
 29 pectus et assiduo temet furare labori.  
 30 Et sontes operit pharetras arcumque retendit  
 31 Parthus et Eleis auriga laboribus actos  
 32 Alpheo permulcet equos et nostra fatiscit  
 33 laxaturque chelys : vires instigat alitque  
 34 tempestiva quies, major post otia virtus.  
 35 Talis cantata Briseide venit Achilles  
 36 acrior et positus erupit in Hectora plectris.  
 37 Te quoque flammabit tacite repetita parumper  
 38 desidia et solitos novus exsultabis in actus.  
 39 Certe jam Latiae non miscent jurgia leges,  
 40 et pacem piger annus habet messesque reversae  
 41 dimisere forum. Nec jam tibi turba reorum  
 42 vestibulo querulique rogant exire clientes ;  
 43 cessat centeni moderatrix judicis hasta,  
 44 qua tibi sublimi jam nunc celeberrima fama  
 45 eminent et juvenis facundia praeterit annos.  
 46 Felix curarum, cui non Heliconia cordi  
 47serta nec imbelles Parnasi e vertice laurus,  
 48 sed viget ingenium et magnos accinctus in usus  
 49 fert animus quascumque vices : nos otia vitae  
 50 solamur cantu ventosaeque gaudia famae  
 51 quaerimus. En egomet somnum et geniale secutus  
 52 litus, ubi Ausonio se condidit hospita portu  
 53 Parthenope, tenues ignavo pollice chordas  
 54 pulso Maroneique sedens in margine templi  
 55 sumo animum et magni tumulis adcanto magistri :  
 56 at tu, si longi cursum dabit Atropos aevi,  
 57 (detque, precor, Latiique ducis sic numina pergant,  
 58 quem tibi posthabito studium est coluisse Tonante,  
 59 quique tuos alio subtexit munere fasces  
 60 et spatia obliquae mandat renovare Latinae)  
 61 forsitan Ausonias ibis frenare cohortes  
 62 aut Rheni populos aut nigrae litora Thyles  
 63 aut Histrum servare datur metuendaque portae  
 64 limina Caspiacae. Nec enim tibi sola potentis  
 65 eloquii virtus ; sunt membra accommoda bellis  
 66 quique gravem tarde subeant thoraca lacerti :



67 seu campo pedes ire pares, est agmina supra  
 68 nutaturus apex ; seu frena sonantia flectes,  
 69 serviet asper equus. Nos facta aliena canendo  
 70 vergimur in senium : propriis tu pulcher in armis  
 71 ipse canenda geres parvoque exempla parabis  
 72 magna Getae, dignos quem jam nunc belliger actus  
 73 poscit avos praestatque domi novisse triumphos.  
 74 Surge, agedum, juvenemque, puer, deprende parentem,  
 75 stemmate materno felix, virtute paterna.  
 76 Jam te blanda sinu Tyrio sibi Curia felix  
 77 educat et cunctas gaudet spondere curules."  
 78 Haec ego Chalcidicis ad te, Marcelle, sonabam  
 79 litoribus, fractas ubi Vesvius erigit iras,  
 80 aemula Trinacriis volvens incendia flammis.  
 81 Mira fides ! credetne virum ventura propago,  
 82 cum segetes iterum, cum jam haec deserta virebunt,  
 83 infra urbes populosque premi proavitaque tanto  
 84 rura abiisse mari ? Necdum letale minari  
 85 cessat apex. Procul ista tuo sint fata Teate  
 86 nec Marrucinos agat haec insania montes.  
 87 Nunc si forte meis quae sint exordia musis  
 88 scire petis, jam Sidonios emensa labores  
 89 Thebais optato collegit carbasa portu  
 90 Parnasique jugis silvaque Heliconide festis  
 91 tura dedit flammis et virginis exta juvencae  
 92 votiferaque meas suspendit ab arbore vittas.  
 93 Nunc vacuos crines alio subit infula nexu :  
 94 Troja quidem magnusque mihi temptatur Achilles,  
 95 sed vocat arcitenens alio pater armaque monstrat  
 96 Ausonii majora ducis. Trahit impetus illo  
 97 jam pridem retrahitque timor. Stabuntne sub illa  
 98 mole umeri an magno vincetur pondere cervix ?  
 99 Dic, Marcelle, feram ? Fluctus an sueta minores  
 100 nosse ratis nondum Ioniis credenda periclis ?  
 101 Jamque vale et penitus voti tibi vatis honorem  
 102 corde exire veta. Nec enim Tirynthius, almae  
 103 pectus amicitiae, ( cedet tibi gloria fidi  
 104 Theseos, et lacerum qui circa moenia Trojae  
 105 Priamiden caeso solacia traxit amico).

ODE LYRICA AD SEPTIMIVM SEVERVM

S4\_5 v.1 Parvi beatus ruris honoribus,  
 2 qua prisca Teucros Alba colit lares,  
 3 fortem atque facundum Severum  
 4 non solitis fidibus saluto.  
 5 Jam trux ad Arctos Parrhasias hiems  
 6 concessit altis obruta solibus,  
 7 jam pontus ac tellus reudent  
 8 in Zephyros Aquilone fracto.  
 9 Nunc cuncta veris ; frondibus annuis  
 10 crinitur arbor, nunc volucrum novi  
 11 questus inexpertumque carmen,  
 12 quod tacita statuere bruma.  
 13 Nos parca tellus pervigil et focus  
 14 culmenque multo lumine sordidum

15 solantur exemptusque testa  
 16 qua modo fervuerat Lyaeus.  
 17 Non mille balant lanigeri greges,  
 18 nec vacca dulci mugit adultero,  
 19 unique siquando canenti  
 20 mutus ager domino reclamat.  
 21 Sed terra primis post patriam mihi  
 22 dilecta curis ; hic mea carmina  
 23 regina bellorum virago  
 24 Caesareo peramavit auro,  
 25 cum tu sodalis dulce periculum  
 26 conisus omni pectore tolleres,  
 27 ut Castor ad cunctos tremebat  
 28 Bebryciae strepitus harenae.  
 29 Tene in remotis Syrtibus avia  
 30 Leptis creavit ? Jam feret Indicas  
 31 messes odoratisque rara  
 32 cinnama praeripiet Sabaeis.  
 33 Quis non in omni vertice Romuli  
 34 reptasse dulcem Septimium putet ?  
 35 Quis fonte Juturnae relictis  
 36 uberibus neget esse pastum ?  
 37 Nec mira virtus : protinus Ausonum  
 38 portus vadosae nescius Africae  
 39 intras adoptatusque Tuscis  
 40 gurgitibus puer innatasti.  
 41 Hinc parvus inter pignora Curiae  
 42 contentus artae lumine purpurae  
 43 crescis, sed immensos labores  
 44 indole patricia secutus.  
 45 Non sermo Poenus, non habitus tibi,  
 46 externa non mens : Italus, Italus.  
 47 Sunt Urbe Romanisque turmis,  
 48 qui Libyam deceant alumni.  
 49 Est et frementi vox hilaris foro,  
 50 venale sed non eloquium tibi,  
 51 ensisque vagina quiescit,  
 52 stringere ni jubeant amici.  
 53 Sed rura cordi saepius et quies,  
 54 nunc in paternis sedibus et solo  
 55 Veiente, nunc frondosa supra  
 56 Hernica, nunc Curibus vetustis.  
 57 Hic plura pones vocibus et modis  
 58 passim solutis, sed memor interim  
 59 nostri verecundo latentem  
 60 barbiton ingemina sub antro.

HERCVLES EPITRAPEZIOS NOVI VINDICIS

S4\_6 v.1 Forte remittentem curas Phoebouque levatum  
 2 pectora, cum patulis tererem vagus otia Saepthis  
 3 jam moriente die, rapuit me cena benigni  
 4 Vindicis. Haec imos animi perlapsa recessus  
 5 inconsumpta manet. Neque enim ludibria ventris  
 6 hausimus aut epulas diverso a sole petitas  
 7 vinaque perpetuis aevo certantia fastis.

8       A miseri, quos nosse juvat quid Phasidis ales  
 9       distet ab hiberna Rhodopes grue, quis magis anser  
 10       exta ferat, cur Tuscus aper generosior Umbro,  
 11       lubrica qua recubent conchylia mollius alga :  
 12       nobis verus amor medioque Helicone petitus  
 13       sermo hilaresque joci brumalem absumere noctem  
 14       suaserunt mollemque oculis expellere somnum,  
 15       donec ab Elysiis prospexit sedibus alter  
 16       Castor et hesternas risit Tithonia mensas.  
 17       O bona nox junctaque utinam Tirynthia luna !  
 18       Nox et Erythraeis Thetidis signanda lapillis  
 19       et memoranda diu geniumque habitura perennem !  
 20       Mille ibi tunc species aerisque eborisque vetusti  
 21       atque locuturas mentito corpore ceras  
 22       edidici. Quis namque oculis certaverit usquam  
 23       Vindicis, artificum veteres agnoscere ductus  
 24       et non inscriptis auctorem reddere signis ?  
 25       Hic tibi quae docto multum vigilata Myroni  
 26       aera, laboriferi vivant quae marmora caelo  
 27       Praxitelis, quod ebur Pisaeo pollice rasum,  
 28       quid Polycleteis jussum spirare caminis,  
 29       linea quae veterem longe fateatur Apellen,  
 30       monstrabit : namque haec, quotiens chelyn exuit, illi  
 31       desidia est, hic Aoniis amor avocat antris.  
 32       Haec inter castae genius tutelaque mensae  
 33       Amphitryoniades multo mea cepit amore  
 34       pectora nec longo satiavit lumina visu :  
 35       tantus honos operi finesque inclusa per artos  
 36       majestas. Deus ille, deus ! seseque videndum  
 37       indulsit, Lysippe, tibi parvusque videri  
 38       sentirique ingens. Et cum mirabilis intra  
 39       stet mensura pedem, tamen exclamare libebit,  
 40       si visus per membra feres : "Hoc pectore pressus  
 41       vastator Nemees, haec exitiale ferebant  
 42       robur et Argoos frangebant brachia remos."  
 43       Ac spatium tam magna brevi mendacia formae !  
 44       Quis modus in dextra, quanta experientia docti  
 45       artificis curis pariter gestamina mensae  
 46       fingere et ingentes animo versare colossos !  
 47       Tale nec Idaeis quicquam Telchines in antris  
 48       nec stolidus Brontes nec, qui polit arma deorum,  
 49       Lemnius exigua potuisset ludere massa.  
 50       Nec torva effigies epulisque aliena remissis,  
 51       sed qualem parci domus admirata Molochi  
 52       aut Aleae lucis vidit Tegeaea sacerdos ;  
 53       qualis et Oetaeis emissus in astra favillis  
 54       nectar adhuc torva laetus Junone bibebat :  
 55       sic mitis vultus, veluti de pectore gaudens,  
 56       hortatur mensas. Tenet haec marcentia fratris  
 57       pocula, at haec clavae meminit manus ; aspera sedis  
 58       sustinet et cultum Nemeaeo tegmine saxum.  
 59       Digna operi fortuna sacro. Pellaeus habebat  
 60       regnator laetis numen venerabile mensis  
 61       et comitem occasus secum portabat et ortus,  
 62       praestabatque libens modo qua diademata dextra  
 63       abstulerat dederatque et magnas verterat urbes.  
 64       Semper ab hoc animos in crastina bella petebat,  
 65       huic acies semper victor narrabat opimas,

66 sive catenatos Bromio detraxerat Indos  
 67 seu clusam magna Babylona refregerat hasta  
 68 seu Pelopis terras libertatemque Pelasgam  
 69 obruerat bello ; magnoque ex agmine laudum  
 70 fertur Thebanos tantum excusasse triumphos.  
 71 Ille etiam, magnos fatis rumpentibus actus,  
 72 cum traheret letale merum, jam mortis opaca  
 73 nube gravis vultus alios in numine caro  
 74 aeraque supremis timuit sudantia mensis.  
 75 Mox Nasamoniaco decus admirabile regi  
 76 possessum ; fortique deo libavit honores  
 77 semper atrox dextra perjuroque ense superbus  
 78 Hannibal. Italicae perfusum sanguine gentis  
 79 diraque Romuleis portantem incendia tectis  
 80 oderat, et cum epulas, et cum Lenaea dicaret  
 81 dona, deus castris maerens comes ire nefandis,  
 82 praecipue cum sacrilega face miscuit arces  
 83 ipsius immeritaeque domos ac templa Sagunti  
 84 polluit et populis furias immisit honestas.  
 85 Nec post Sidonii letum ducis aere potita  
 86 egregio plebeia domus. Convivia Syllae  
 87 ornabat semper claros intrare penates  
 88 assuetum et felix dominorum stemmate signum.  
 89 Nunc quoque, si mores humanaque pectora curae  
 90 nosse deis, non aula quidem, Tirynthie, nec te  
 91 regius ambit honos, sed casta ignaraque culpae  
 92 mens domini, cui prisca fides coeptaeque perenne  
 93 foedus amicitiae. Scit adhuc florente sub aevo  
 94 par magnis Vestinus avis, quem nocte dieque  
 95 spirat et in carae vivit complexibus umbrae.  
 96 Hic igitur tibi laeta quies, fortissime divum,  
 97 Alcide, nec bella vides pugnasque feroces,  
 98 sed chelyn et vittas et amantes carmina laurus.  
 99 Hic tibi sollemni memorabit carmine, quantus  
 100 Iliacas Geticasque domos quantusque nivalem  
 101 Stymphalon quantusque jugis Erymanthon aquosis  
 102 terrueris, quem te pecoris possessor Hiberi,  
 103 quem tulerit saevae Mareoticus arbiter arae.  
 104 Hic penetrata tibi spoliataque limina mortis  
 105 concinet et flentes Libyae Scythiaeque puellas.  
 106 Nec te regnator Macetum nec barbarus umquam  
 107 Hannibal aut saevi posset vox horrida Syllae  
 108 his celebrare modis. Certe tu, muneris auctor,  
 109 non aliis mallet oculis, Lysippe, probari.

ODE LYRICA AD VIBIVM MAXIMVM

S4\_7 v.1 Jam diu lato sociata campo  
 2 fortis heroos, Erato, labores  
 3 differ atque ingens opus in minores  
 4 contrahe gyros,  
 5 tuque, regnator lyricae cohortis,  
 6 da novi paulum mihi jura plectri,  
 7 si tuas cantu Latio sacravi,  
 8 Pindare, Thebas :  
 9 Maximo carmen tenuare tempto ;

10 nunc ab intonsa capienda myrto  
 11 certa, nunc major sitis et bibendus  
 12 castior amnis.  
 13 Quando te dulci Latio remittent  
 14 Dalmatae montes, ubi Dite viso  
 15 pallidus fossor redit erutoque  
 16 concolor auro ?  
 17 Ecce me natum propiore terra  
 18 non tamen portu retinent amoeno  
 19 desides Baiae liticenve notus  
 20 Hectoris armis.  
 21 Torpor est nostris sine te Camenis,  
 22 tardius sueto venit ipse Thymbrae  
 23 rector et primis meus ecce metis  
 24 haeret Achilles.  
 25 Quippe te fido monitore nostra  
 26 Thebais multa cruciata lima  
 27 temptat audaci fide Mantuanae  
 28 gaudia famae.  
 29 Sed damus lento veniam, quod alma  
 30 prole fundasti vacuos penates.  
 31 O diem laetum ! venit ecce nobis  
 32 Maximus alter.  
 33 Orbitas omni fugienda nisu,  
 34 quam premit votis inimicus heres,  
 35 optimo poscens (pudet heu !) propinquo  
 36 funus amice.  
 37 Orbitas nullo tumulata fletu :  
 38 stat domo capta cupidus superstes  
 39 imminens leti spoliis et ipsum  
 40 computat ignem.  
 41 Duret in longum generosus infans  
 42 perque non multis iter expeditum  
 43 crescat in mores patrios avumque  
 44 provocet actis.  
 45 Tu tuos parvo memorabis enses,  
 46 quos ad Eoum tuleras Orontem  
 47 signa frenatae moderatus alae  
 48 Castore dextro ;  
 49 ille ut invicti rapidum secutus  
 50 Caesaris fulmen refugis amaram  
 51 Sarmatis legem dederit, sub uno  
 52 vivere caelo.  
 53 Sed tuas artes puer ante discat,  
 54 omne quis mundi senium remensus  
 55 orsa Sallusti brevis et Timavi  
 56 reddis alumnum.

GRATVLATIO AD IVLIVM MENECRATEN

S4\_8 v.1 Pande fores superum vittataque templa Sabaeis  
 2 nubibus et pecudum fibris spirantibus imple,  
 3 Parthenope ; clari genus ecce Menecratis auget  
 4 tertia jam soboles. Procerum tibi nobile vulgus  
 5 crescit et insani solatur damna Vesevi.  
 6 Nec solum festas secreta Neapolis aras

7       ambiat : et socii portus dilectaque miti  
8       terra Dicarcheo nec non plaga cara madenti  
9       Surrentina deo sertis altaria cingat,  
10       materni qua litus avi, quem turba nepotum  
11       circumit et similes contendit reddere vultus.  
12       Gaudeat et Libyca praesignis avunculus hasta,  
13       quaeque sibi genitos putat attollitque benigno  
14       Polla sinu. Macte, o juvenis, qui tanta merenti  
15       lumina das patriae. Dulcis tremit ecce tumultus  
16       tot dominis clamata domus. Procul atra recedat  
17       Invidia atque alio liventia pectora flectat :  
18       his senium longaeque decus virtutis et alba  
19       Atropos et patrius lauros promisit Apollo.  
20       Ergo quod Ausoniae pater augustissimus urbis  
21       jus tibi tergeminae dederat laetabile prolis,  
22       omen erat. Venit totiens Lucina piumque  
23       intravit repetita larem. Sic fertilis, oro,  
24       stet domus et donis numquam mutata sacratis.  
25       Macte, quod et proles tibi saepius aucta virili  
26       robore, sed juveni laetanda et virgo parenti :  
27       aptior his virtus, citius dabit illa nepotes  
28       qualis maternis Helene jam digna palaestris  
29       inter Amyclaeos reptabat candida fratres ;  
30       vel qualis caeli facies, ubi nocte serena  
31       admovere jubar mediae duo sidera lunae.  
32       Sed queror haud faciles, juvenum rarissime, questus  
33       irascorque etiam, quantum irascuntur amantes.  
34       Tantane me decuit vulgari gaudia fama  
35       noscere ? Cumque tibi vagiret tertius infans,  
36       protinus ingenti non venit nuntia cursu  
37       littera, quae festos cumulare altaribus ignes  
38       et redimire chelyn postesque ornare juberet  
39       Albanoque cadum sordentem promere fumo  
40       et cantu signare diem, sed tardus inersque  
41       nunc demum mea vota cano ? tua culpa tuusque  
42       hic pudor. Ulterius sed enim producere questus  
43       non licet ; en hilaris circumstat turba tuorum  
44       defensatque patrem. Quem non hoc agmine vincas ?  
45       Di patrii, quos auguriis super aequora magnis  
46       litus ad Ausonium devexit Abantia classis,  
47       tu, ductor populi longe migrantis, Apollo,  
48       cujus adhuc volucrem laeva cervice sedentem  
49       respiciens blande felix Eumelus adorat,  
50       tuque, Actaea Ceres, cursu cui semper anhelos  
51       votivam taciti quassamus lampada mystae,  
52       et vos, Tyndaridae, quos non horrenda Lycurgi  
53       Taygeta umbrosaeque magis coluere Therapnae :  
54       hos cum plebe sua patrii servate penates.  
55       Sint, qui fessam aevo crebrisque laboribus urbem  
56       voce opibusque juvent viridique in nomine servent.  
57       His placidos genitor mores largumque nitorem  
58       monstret avus, pulchrae studium virtutis uterque.  
59       Quippe et opes et origo sinunt hanc lampade prima  
60       patricias intrare fores, hos pube sub ipsa,  
61       si modo prona bonis invicti Caesaris adsint  
62       numina, Romulei limen pulsare senatus.

## HENDECASYLLABI IOCOSI AD PLOTIVM GRYPVM

S4\_9 v.1 Est sane jocus iste, quod libellum  
 2 misisti mihi, Grype, pro libello.  
 3 Urbanum tamen hoc potest videri,  
 4 si post hoc aliquid mihi remittas ;  
 5 nam si ludere, Grype, perseveras,  
 6 non ludis. Licet, ecce, computemus !  
 7 Noster purpureus novusque charta  
 8 et binis decoratus umbilicis,  
 9 praeter me mihi constitit decussis :  
 10 tu rosum tineis situque putrem,  
 11 quales aut Libycis madent olivis  
 12 aut tus Niliacum piperve servant  
 13 aut Byzantiacos colunt lacertos,  
 14 nec saltem tua dicta continentem,  
 15 quae trino juvenis foro tonabas,  
 16 aut centum prope iudices, priusquam  
 17 te Germanicus arbitrum sequenti  
 18 annonae dedit omniumque late  
 19 praefecit stationibus viarum,  
 20 sed Bruti senis oscitationes  
 21 de capsula miseri libellionis  
 22 emptum plus minus asse Gaiano  
 23 donas. Usque adeone defuerunt  
 24 caesis pillea sutae de lacernis  
 25 vel mantelia luridaeve mappae,  
 26 chartae Thebaicaeve Caricaeve ?  
 27 Nusquam turbine conditus ruenti  
 28 prunorum globus atque cottanorum ?  
 29 non enlychnia sicca, non replictae  
 30 bulborum tunicae ? Nec ova tantum  
 31 nec lenes halicae, nec asperum far ?  
 32 Nusquam Cinyphiis vagata campis  
 33 curvarum domus uda coclearum ?  
 34 Non lardum grave debilisve perna ?  
 35 Non Lucanica, non graves Falisci,  
 36 non sal oxyporumve caseusve,  
 37 aut panes nitidantis aphronitri  
 38 vel passum psithiis suis recoctum,  
 39 dulci defruta vel lutosa caeno ?  
 40 Quantum nec dare cereos olentes,  
 41 cultellum tenuesve codicillos ?  
 42 Ollares, rogo, non licebat uvas,  
 43 Cumano patinas in orbe tortas  
 44 aut unam dare synthesin (quid horres ?)  
 45 alborum calicum atque caccaborum ?  
 46 Sed certa velut aequus in statera  
 47 nil mutas, sed idem mihi rependis.  
 48 Quid si, cum bene mane semicrudus  
 49 inlatam tibi dixero salutem,  
 50 et tu me vicibus domi salutes ?  
 51 Aut, cum me dape juveris opima,  
 52 exspectes similes et ipse cenas ?  
 53 Irascor tibi, Grype. Sed valebis ;  
 54 tantum ne mihi, quo soles lepore,  
 55 et nunc hendecasyllabos remittas.

## EPICEDION IN PRISCILLAM

S5\_1 v.1 Si manus aut similes docilis mihi fingere ceras  
 2 aut ebur impressis aurumve animare figuris,  
 3 hinc, Priscilla, tuo solacia grata marito  
 4 conciperem. Namque egregia pietate meretur,  
 5 ut vel Apelleo vultus signata colore,  
 6 Phidiaca vel nata manu reddare dolenti.  
 7 Sic auferre rogis umbram conatur et ingens  
 8 certamen cum Morte gerit curasque fatigat  
 9 artificum inque omni te quaerit amare metallo.  
 10 Sed mortalis honos, agilis quem dextra laborat.  
 11 Nos tibi, laudati juvenis rarissima conjunx,  
 12 longa nec obscurum finem latura perenni  
 13 temptamus dare justa lyra, modo dexter Apollo  
 14 quique venit juncto mihi semper Apolline Caesar  
 15 annuat : haut alio melius condere sepulcro.  
 16 Sera quidem tanto struitur medicina dolori,  
 17 altera cum volucris Phoebi rota torqueat annum ;  
 18 sed cum plaga recens et adhuc in vulnere primo  
 19 nigra domus, questu miseram qua accessus ad aurem  
 20 conjugis orbati, tunc flere et scindere vestes  
 21 et famulos lassare greges et vincere planctus  
 22 Fataque et injustos rabidis pulsare querelis  
 23 caelicolas solamen erat. Licet ipse levandos  
 24 ad gemitus silvis comitatus et amnibus Orpheus  
 25 adforet atque omnis pariter matertera vatem,  
 26 omnis Apollineus tegeter Bacchique sacerdos :  
 27 nil cantus, nil fila deis pallentis Averni  
 28 Eumenidumque audita comis mulcere valerent ;  
 29 tantus in attonito regnabat pectore luctus.  
 30 Nunc etiam ad tactus refugit jam plana cicatrix,  
 31 dum canimus, gravibusque oculis uxorius instat  
 32 imber. Habentne pios etiamnum haec lumina fletus ?  
 33 Mira fides ! citius genetrix Sipylea feretur  
 34 exhausisse genas, citius Tithonida maesti  
 35 deficient rores aut exsatiata fatiscet  
 36 mater Achilleis hiemes adfrangere bustis.  
 37 Macte animi ! notat ista deus, qui flectit habenas  
 38 orbis et humanos propior Jove digerit actus,  
 39 maerentemque videt lectique arcana ministri.  
 40 Hinc etiam documenta capit, quod diligis umbram  
 41 et colis exsequias. Hic est castissimus ardor,  
 42 hic amor a domino meritis censore probari.  
 43 Nec mirum, si vos collato pectore mixtos  
 44 junxit inabrupta concordia longa catena.  
 45 Illa quidem nuptumque prior taedasque marito  
 46 passa alio, sed te ceu virginitate jugatum  
 47 visceribus totis animaque complexa fovebat ;  
 48 qualiter aequaevo sociatam palmite vitem  
 49 ulmus amat miscetque nemus ditemque precatur  
 50 autumnum et caris gaudet redimita racemis.  
 51 Laudantur proavis seu pulchrae munere formae  
 52 quae morum caruere bonis falsaeque potentes  
 53 laudis egent verae : tibi quamquam et origo niteret



54 et felix species multumque optanda maritis,  
55 ex te major honos, unum novisse cubile,  
56 unum secretis agitare sub ossibus ignem.  
57 Illum nec Phrygius vitiasset raptor amorem  
58 Dulichiive proci nec qui fraternus adulter  
59 casta Mycenaeo conubia polluit auro.  
60 Si Babylonos opes, Lydae si pondera gazae  
61 Indorumque dares Serumque Arabumque potentes  
62 divitias, mallet cum paupertate pudica  
63 intemerata mori vitamque rependere famae.  
64 Nec frons triste rigens nimiusque in moribus horror,  
65 sed simplex hilarisque fides et mixta pudori  
66 gratia. Quod si anceps metus ad majora vocasset,  
67 illa vel armiferas pro conjuge laeta catervas  
68 fulmineosque ignes mediique pericula ponti  
69 exciperet. Melius, quod non adversa probarunt,  
70 quae tibi cura tori, quantus pro conjuge pallor.  
71 Sed meliore via dextros tua vota marito  
72 promeruere deos, dum nocte dieque fatigas  
73 numina, dum cunctis supplex advolveris aris  
74 et mitem genium domini praesentis adoras.  
75 Audita es, venitque gradu Fortuna benigno.  
76 Vidit quippe pii juvenis navamque quietem  
77 intactamque fidem succinctaque pectora curis  
78 et vigiles sensus et digna evolvere tantas  
79 sobria corda vices, vidit, qui cuncta suorum  
80 novit et inspectis ambit latus omne ministris.  
81 Nec mirum : videt ille ortus obitusque, quid auster,  
82 quid boreas hibernus agat, ferrique togaeque  
83 consilia atque ipsam mentem probat. Ille jubatis  
84 molem immensam umeris et vix tractabile pensum  
85 imposuit (nec enim numerosior altera sacra  
86 cura domo), magnum late dimittere in orbem  
87 Romulei mandata ducis viresque modosque  
88 imperii tractare manu ; quae laurus ab Arcto,  
89 quid vagus Euphrates, quid ripa binominis Histri,  
90 quid Rheni vexilla ferant, quantum ultimus orbis  
91 cesserit et refugo circumsona gurgite Thyle  
92 (omnia nam laetas pila attollentia frondes,  
93 nullaue famosa signatur lancea penna) ;  
94 praeterea, fidos dominus si dividat enses,  
95 pandere, quis centum valeat frenare, maniplos  
96 inter missus eques, quis praecepisse cohorti,  
97 quem deceat clari praestantior ordo tribuni,  
98 quisnam frenigerae signum dare dignior alae ;  
99 mille etiam praenosse vices, an merserit agros  
100 Nilus, an imbrifero Libye sudaverit austro ;  
101 cunctaque si numerem, non plura interprete virga  
102 nuntiat ex celsis ales Tegeaticus astris,  
103 quaeque cadit liquidas Junonia virgo per auras  
104 et picturato pluvium ligat aera gyro  
105 quaeque tuas laurus volucris, Germanice, cursu  
106 Fama vehit praegressa diem tardumque sub astris  
107 Arcada et in medio linquit Thaumantida caelo.  
108 Qualem te superi, Priscilla, hominesque benigno  
109 aspexere die, cum primum ingentibus actis  
110 admotus conjunx ! Vicisti gaudia cene  
111 ipsius, effuso dum pectore prona sacratos

112 ante pedes avide domini tam magna merentis  
113 volveris. Aonio non sic in vertice gaudet,  
114 quam pater arcani praefecit hiatibus antri  
115 Delius, aut primi cui jus venerabile thyrsi  
116 Bacchus et attonitae tribuit vexilla catervae.  
117 Nec tamen hic mutata quies probitasve secundis  
118 intumuit : tenor idem animo moresque modesti  
119 fortuna crescente manent. Fovet anxia curas  
120 conjugis hortaturque simul flectitque labores.  
121 Ipsa dapes modicas et sobria pocula tradit,  
122 exemplumque ad erile monet ; velut Apula conjunx  
123 agricolae parci vel sole infecta Sabino,  
124 quae videt emeriti jam prospectantibus astris  
125 tempus adesse viri, propere mensasque torosque  
126 instruit expectatque sonum redeuntis aratri.  
127 Parva loquor. Tecum gelidas comes illa per Arctos  
128 Sarmaticasque hiemes Histrumque et pallida Rheni  
129 frigora, tecum omnes animo durata per aestus  
130 et, si castra darent, vellet gestare pharetras,  
131 vellet Amazonia latus intercludere pelta ;  
132 dum te pulverea bellorum nube videret  
133 Caesarei prope fulmen equi divinaque tela  
134 vibrantem et magnae sparsum sudoribus hastae.  
135 Hactenus alma chelys. Tempus nunc ponere frondes,  
136 Phoebe, tuas maestaque comam damnare cupresso.  
137 Quisnam impacata consanguinitate ligavit  
138 Fortunam Invidiamque deus ? Quis jussit iniquas  
139 aeternum bellare deas ? Nullamne notavit  
140 illa domum, torvo quam non haec lumine figat  
141 protinus et saeva proturbet gaudia dextra ?  
142 Florebant hilares inconcussique penates :  
143 nil maestum. Quid enim, quamvis infida levisque,  
144 Caesare tam dextro posset Fortuna timeri ?  
145 Invenere viam liventia Fata, piumque  
146 intravit vis saeva larem. Sic plena maligno  
147 adflantur vineta Noto, sic alta senescit  
148 imbre seges nimio, rapidae sic obvia puppi  
149 invidet et velis adnubilat aura secundis.  
150 Carpitur eximium Fato Priscilla decorem ;  
151 qualiter alta comam silvarum gloria pinus  
152 seu Jovis igne malo seu jam radice soluta  
153 deficit et nulli spoliata remurmurat aurae.  
154 Quid probitas aut casta fides, quid numina prosunt  
155 culta deum ? Furvae miseram circum undique leti  
156 vallavere plagae, tenduntur dura sororum  
157 licia et exacti superest pars ultima fili.  
158 Nil famuli coetus, nil ars operosa medentum  
159 auxiliata malis ; comites tamen undique ficto  
160 spem simulant vultu, flentem notat illa maritum.  
161 Ille modo infernae nequiquam flumina Lethes  
162 in corrupta rogat, nunc anxius omnibus aris  
163 inlacrimat signatque fores et pectore terget  
164 limina ; nunc magni vocat exorabile numen  
165 Caesaris. Heu durus fati tenor ! Estne quod illi  
166 non liceat ? Quantae poterant mortalibus annis  
167 accessisse morae si tu, pater, omne teneres  
168 arbitrium ? caeco gemeret Mors clusa barathro  
169 longius et vacuae posuissent stamina Parcae.

170 Jamque cadunt vultus oculisque novissimus error  
171 optunsaetaeque aures, nisi cum vox sola mariti  
172 noscitur ; illum unum media de morte reversa  
173 mens videt, illum aegris circumdat fortiter ulnis  
174 immotas obversa genas, nec sole supremo  
175 lumina sed dulci mavult satiari marito.  
176 Tum sic unanimum moriens solatur amantem :  
177 "Pars animae victura meae, cui linqere possim  
178 o utinam, quos dura mihi rapit Atropos, annos :  
179 parce, precor, lacrimis, saevo ne concute planctu  
180 pectora, nec crucia fugientem conjugis umbram.  
181 Linquo equidem thalamos, salvo tamen ordine mortis  
182 quod prior : exegi longa potiora senecta  
183 tempora ; vidi omni pridem te flore nitentem,  
184 vidi altae propius propiusque accedere dextrae.  
185 Non in te Fatis, non jam caelestibus ullis  
186 arbitrium : mecum ista fero. Tu limite coepto  
187 tende libens sacrumque latus geniumque potentem  
188 inrequietus ama. Nunc, quod cupis ipse juberi,  
189 da Capitolinis aeternum sedibus aurum,  
190 quo niteat sacri centeno pondere vultus  
191 Caesaris et propriae signet cultriciis amorem.  
192 Sic ego nec Furias nec deteriora videbo  
193 Tartara et Elysias felix admittar in oras."  
194 Haec dicit labens sociosque amplectitur artus  
195 haerentemque animam non tristis in ora mariti  
196 transtulit et cara pressit sua lumina dextra.  
197 At juvenis magno flammatus pectora luctu  
198 nunc implet saevo viduos clamore penates,  
199 nunc ferrum laxare cupit, nunc ardua tendit  
200 in loca (vix retinent comites), nunc ore ligato  
201 incubat amissae mersumque in corde dolorem  
202 saevus agit, qualis conspecta conjugis segnis  
203 Odrysius vates positus ad Strymona plectris  
204 obstupuit tristemque rogum sine carmine flevit.  
205 Ille etiam erecte rupisset tempora vitae,  
206 ne tu Tartareum chaos incommitata subires,  
207 set prohibet mens fida ducis mirandaque sacris  
208 imperiis et major amor. Quis carmine digno  
209 exsequias et dona malae feralia pompae  
210 perlegat ? Omne illic stipatum examine longo  
211 ver Arabum Cilicumque fluit floresque Sabaei  
212 Indorumque arsura seges praereptaque templis  
213 tura, Palaestini simul Hebraei que liquores  
214 Coryciaeque comae Cinyreaeque germina ; et altis  
215 ipsa toris Serum Tyrioque umbrata recumbit  
216 tegmine. Sed toto spectatur in agmine conjunx  
217 solus ; in hunc magnae flectuntur lumina Romae  
218 ceu juvenes natos suprema ad busta ferentem :  
219 is dolor in vultu, tantum crinesque genaeque  
220 noctis habent. Illam tranquillo fine solutam  
221 felicemque vocant, lacrimas fudere marito.  
222 Est locus, ante Urbem qua primum nascitur ingens  
223 Appia quae Italo gemitus Almone Cybebe  
224 ponit et Idaeos jam non reminiscitur amnis.  
225 Hic te Sidonio velatam molliter ostro  
226 eximius conjunx (nec enim fumantia busta  
227 clamoremque rogi potuit perferre) beato

228 composuit, Priscilla, toro. Nil longior aetas  
 229 carpere, nil aevi poterunt vitiare labores :  
 230 sic cautum membris, tantas venerabile marmor  
 231 spirat opes. Mox in varias mutata novaris  
 232 effigies : hoc aere Ceres, hoc lucida Gnosis,  
 233 illo Maia tholo, Venus hoc non improba saxo.  
 234 Accipiunt vultus haud indignata decoros  
 235 numina : circumstant famuli consuetaque turba  
 236 obsequiis, tunc rite tori mensaeque parantur  
 237 assiduae. Domus ista, domus ! quis triste sepulcrum  
 238 dixerit ? Hac merito visa pietate mariti  
 239 protinus exclames : "Est hic, agnosco, minister  
 240 illius, aeternae modo qui sacraria genti  
 241 condidit inque alio posuit sua sidera caelo."  
 242 Sic, ubi magna novum Phario de litore puppis  
 243 solvit iter jamque innumeros utrimque rudentes  
 244 lataque veliferi porrexit brachia mali  
 245 invasitque vias, in eodem angusta phaselos  
 246 aequore et immensi partem sibi vindicat austri.  
 247 Quid nunc immodicos, juvenum lectissime, fletus  
 248 corde foves longumque vetas exire dolorem ?  
 249 Nempe times ne Cerbereos Priscilla tremescat  
 250 latratus ? Tacet ille piis ; netardior adsit  
 251 navita proturbetque vadis ? Vehit ille merentes  
 252 protinus et manes placidus locat hospite cumba.  
 253 Praeterea, si quando pio laudata marito  
 254 umbra venit, jubet ire faces Proserpina laetas  
 255 egressasque sacris veteres heroidas antris  
 256 lumine purpureo tristes laxare tenebras  
 257 sertaque et Elysios animae praesternere flores.  
 258 Sic manes Priscilla subit ; ibi supplice dextra  
 259 pro te Fata rogat, reges tibi tristis Averni  
 260 placat, ut expletis humani finibus aevi  
 261 pacantem terras dominum juvenemque relinquo  
 262 ipse senex. Certae jurant in vota sorores.

LAVDES CRISPINI VETTI BOLANI FILII

S5\_2 v.1 Rura meus Tyrrhena petit saltusque Tagetis  
 2 Crispinus ; nec longa mora est aut avia tellus ;  
 3 et mea secreto velluntur pectora morsu,  
 4 udaeque turgentes impellunt lumina guttas,  
 5 ceu super Aegaeas hiemes abeuntis amici  
 6 vela sequar spectemque ratem jam fessus ab altis  
 7 rupibus atque oculos longo querar aere vinci.  
 8 Quid ? si militiae jam te, puer inclite, primae  
 9 clara rudimenta et castrorum dulce vocaret  
 10 auspiciam, quanto manarent gaudia fletu  
 11 quosve darem amplexus ! etiamne optanda propinquis  
 12 tristia ? (ut octonos bis jam tibi circuit orbes  
 13 vita, sed angustis animus robustior annis,  
 14 succumbitque oneri et mentem sua non capit aetas).  
 15 Nec mirum : non te series inhonora parentum  
 16 obscurum proavis et priscae lucis egentem  
 17 plebeia de stirpe tulit ; non sanguine cretus  
 18 turmali trabeaque recens et paupere clavo

19 augustam sedem et Latii penetrabile senatus  
 20 advena pulsasti, sed praecedente tuorum  
 21 agmine. Romulei qualis per jugera Circi,  
 22 cum pulcher visu, titulis generosus avitis  
 23 expectatur equus, cujus de stemmate longo  
 24 felix demeritos habet admissura parentes,  
 25 illum omnes acuunt plausus, illum ipse volentem  
 26 pulvis et incurvae gaudent agnoscere metae :  
 27 sic te, clare puer, genitum sibi Curia sensit,  
 28 primumque patricia clausit vestigia luna.  
 29 Mox Tyrios ex more sinus tunicamque potentem  
 30 agnovere umeri. Sed enim tibi magna parabat  
 31 ad titulos exempla pater. Quippe ille juventam  
 32 protinus ingrediens pharetratum invasit Araxen  
 33 belliger indocilemque fero servire Neroni  
 34 Armeniam. Rigidi summam Mavortis agebat  
 35 Corbulo, sed comitem belli sociumque laborum  
 36 ille quoque egregiis multum miratus in armis  
 37 Bolanum ; atque illi curarum asperrima suetus  
 38 credere partiri que metus, quod tempus amicum  
 39 fraudibus, exerto quaenam bona tempora bello,  
 40 quae suspecta fides aut quae fuga vera ferocis  
 41 Armenii. Bolanus iter praenossetimendum,  
 42 Bolanus tutis juga quaerere commoda castris,  
 43 metiri Bolanus agros, aperire malignas  
 44 torrentum nemorumque moras tantamque verendi  
 45 mentem implere ducis jussisque ingentibus unus  
 46 sufficere. Ipsa virum norat jam barbara tellus,  
 47 ille secundus apex bellorum et proxima cassis.  
 48 Sic Phryges attoniti, quamquam Nemeaea viderent  
 49 arma Cleonaeusque acies impelleret arcus,  
 50 pugnantem Alcide tamen et Telamona timebant.  
 51 Disce, puer, (nec enim externo monitore petendus  
 52 virtutis tibi pulcher amor : cognata ministret  
 53 laus animos. Aliis Decii reducesque Camilli  
 54 monstrentur) tu disce patrem, quantusque negantem  
 55 fluctibus occiduis fesso usque Hyperione Thylen  
 56 intravit mandata gerens quantusque potentis  
 57 mille urbes Asiae sortito rexerit anno,  
 58 imperium mulcente toga. Bibe talia pronis  
 59 auribus, haec certent tibi conciliare propinqui,  
 60 haec iterent comites praecepta senesque paterni.  
 61 Jamque alio moliris iter nec deside passu  
 62 ire paras. Nondum validae tibi signa juventae  
 63 inrepsere genis, et adhuc tenor integer aevi ;  
 64 nec genitor juxta ; fati namque haustus iniquis  
 65 occidit et geminam prolem sine praeside linquens ;  
 66 nec saltem teneris ostrum puerile lacertis  
 67 exiit albentique umeros induxit amictu.  
 68 Quem non corrumpit pubes effrena novaeque  
 69 libertas properata togae ? ceu nescia falcis  
 70 silva comas tollit fructumque exspirat in umbras.  
 71 At tibi Pieriae tenero sub pectore curae  
 72 et pudor et docti legem sibi dicere mores ;  
 73 tunc hilaris probitas et frons tranquilla nitorque  
 74 luxuriae confine tenens pietasque per omnes  
 75 dispensata modos ; aequaevo cedere fratri  
 76 mirari que patrem miseraeque ignoscere matri

77 admonuit fortuna domus. Tibine illa nefanda  
78 pocula letalesque manu componere sucos  
79 evaluit, qui voce potes praevertere morsus  
80 serpentum atque omnis vultu placare novercas ?  
81 Infestare libet manes meritoque precatu  
82 pacem auferre rogis ; sed te, puer optime, cerno  
83 flectentem justis et talia dicta parantem :  
84 "Parce, precor, cineri : fatum illud et ira nocentum  
85 Parcarum crimenque dei, mortalia quisquis  
86 pectora sero videt nec primo in limine sistit  
87 conatus scelerum atque animos infanda parantes.  
88 Excidat illa dies aevo nec postera credant  
89 saecula. Nos certe taceamus et obruta multa  
90 nocte tegi propriae patiamur crimina gentis.  
91 Exegit poenas, hominum cui cura suorum,  
92 quo Pietas auctore redit terrasque revisit,  
93 quem timet omne nefas. Satis haec lacrimandaque nobis  
94 ultio. Quin saevas utinam exorare liceret  
95 Eumenidas timidaeque avertere Cerberon umbrae  
96 immemoremque tuis citius dare manibus amnem."  
97 Macte animo, juvenis ! sed crescunt crimina matris.  
98 Nec tantum pietas, sed protinus ardua virtus  
99 affectata tibi. Nuper cum fortesodalis  
100 immeritae falso palleret crimine famae,  
101 erigeretque Forum succinctaque iudice multo  
102 surgeret et castum vibraret Julia fulmen,  
103 tu, quamquam non ante forum legesque severas  
104 passus sed tacita studiorum occultus in umbra,  
105 defensare metus adversaque tela subisti  
106 pellere, inermis adhuc et tiro, paventis amici.  
107 Haud umquam tales aspexit Romulus annos  
108 Dardaniusque senex medii bellare togata  
109 strage Fori. Stupuere patres temptamina tanta  
110 conatusque tuos, nec te reus ipse timebat.  
111 Par vigor et membris, promptaeque ad fortia vires  
112 sufficiunt animo atque ingentia jussa sequuntur.  
113 Ipse ego te nuper Tiberino in litore vidi,  
114 qua Tyrrhena vadis Laurentibus aestuat unda,  
115 tendentem cursus vexantemque ilia nuda  
116 calce ferocis equi, vultu dextraque minacem  
117 (si qua fides dictis, stupui armatumque putavi) :  
118 Gaetulo sic pulcher equo Trojanaque quassans  
119 tela novercales ibat venator in agros  
120 Ascanius miseramque patri flagrabat Elissam ;  
121 Troilus haut aliter gyro leviole minantes  
122 eludebat equos, aut quem de turribus altis  
123 Arcadas Ogygio versantem in pulvere metas  
124 spectabant Tyriae non torvo lumine matres.  
125 Ergo age (nam magni ducis indulgentia pulsat  
126 certaue dat votis hilaris vestigia frater),  
127 surge animo et fortes castrorum concipe curas.  
128 Monstrabunt acies Mavors Actaeaque virgo,  
129 flectere Castor equos, umeris quater arma Quirinus,  
130 qui tibi jam tenero permisit plaudere collo  
131 nubigenas clipeos intactaque caedibus arma.  
132 Quasnam igitur terras, quem Caesaris ibis in orbem ?  
133 Arctosne amnes et Rheni fracta natabis  
134 flumina an aestiferis Libyae sudabis in arvis ?

135 An juga Pannoniae mutatoresque domorum  
 136 Sauromatas quaties ? An te septenus habebit  
 137 Hister et umbroso circumflua conjuge Peuce ?  
 138 An Solymum cinerem palmetaque capta subibis  
 139 non sibi felices silvas ponentis Idymes ?  
 140 Quod si te magno tellus frenata parenti  
 141 accipiat, quantum ferus exsultabit Araxes,  
 142 quanta Caledonios attollet gloria campos !  
 143 cum tibi longaevus referet trucis incola terrae :  
 144 "Hic suetus dare jura parens, hoc cespite turmas  
 145 adfari ; vicis speculas castellaque longe  
 146 (aspicis ?) ille dedit cinxitque haec moenia fossa ;  
 147 belligeris haec dona deis, haec tela dicavit  
 148 (cernis adhuc titulos), hunc ipse vocantibus armis  
 149 induit, hunc regi rapuit thoraca Britanno."  
 150 Qualiter in Teucros victricia bella paranti  
 151 ignotum Pyrrho Phoenix narrabat Achillem.  
 152 Felix qui viridi fidens, Optate, juventa  
 153 durabis quascumque vias vallumque subibis,  
 154 forsitan et ipse latus (sic numina principis adsint)  
 155 cinctus et unanimi comes indefessus amici,  
 156 quo Pylades ex more pius, quo Dardana gessit  
 157 bella Menoetiades. Quippe haec concordia vobis,  
 158 hic amor est duretque precor. Nos fortior aetas  
 159 jam fugit ; hinc votis animum precibusque juvabo  
 160 et mihi ! sed questus solitos si forte ciebo  
 161 et mea Romulei venient ad carmina patres,  
 162 tu deeris, Crispine, mihi, cuneosque per omnes  
 163 te meus absentem circumspectabit Achilles.  
 164 Sed venies melior (vatum non irrita currunt  
 165 omina), quique aquilas tibi nunc et castra recludit,  
 166 idem omnes perferre gradus cingique superbis  
 167 fascibus et patrias dabit insedis curules.  
 168 Sed quis ab excelsis Trojanae collibus Albae,  
 169 unde suae juxta prospectat moenia Romae  
 170 proximus ille deus, Fama velocior intrat  
 171 nuntius atque tuos implet, Crispine, penates ?  
 172 Dicebam : certe vatum non irrita currunt  
 173 auguria. En, ingens reserat tibi limen honorum  
 174 Caesar et Ausonii committit munia ferri.  
 175 Vade, puer, tantisque enixus suffice donis,  
 176 felix, qui magno jam nunc sub praeside juras  
 177 cuique sacer primum tradit Germanicus ense.  
 178 Non minus hoc, fortis quam si tibi panderet ipse  
 179 Bellipotens aquilas torvaque induceret ora  
 180 casside. Vade alacer majoraque disce mereri.

EPICEDION IN PATREM SVVM

S5\_3 v.1 Ipse malas vires et lamentabile carmen  
 2 Elysio de fonte mihi pulsumque sinistrae  
 3 da, genitor praedocte, lyrae. Neque enim antra moveri  
 4 Delia nec solitam fas est impellere Cirrham  
 5 te sine. Corycia quicquid modo Phoebus in umbra,  
 6 quicquid ab Ismariis monstrarat collibus Euhan,  
 7 dedidici. Fugere meos Parnasia crines

8 vellera, funestamque hederis inrepere taxum  
 9 extimui trepidamque (nefas !) arescere laurum.  
 10 Certe ego, magnanimum qui facta attollere regum  
 11 ibam altum spirans Martemque aequare canendo,  
 12 quis sterili mea corda situ, quis Apolline merso  
 13 frigida damnatae praeduxit nubila menti ?  
 14 Stant circum attonitae vatem et nil dulce sonantem  
 15 nec digitis nec voce, deae. Dux ipsa silenti  
 16 fulta caput cithara, qualis post Orphea raptum  
 17 astitit, Hebre, tibi cernens jam surda ferarum  
 18 agmina et immotos sublato carmine lucos.  
 19 At tu seu membris emissus in ardua tendens  
 20 fulgentisque plagas rerumque elementa recenses,  
 21 quis deus, unde ignes, quae ducat semita solem,  
 22 quae minuat Phoeben quaeque integrare latentem  
 23 causa queat, notique modos extendis Arati,  
 24 seu tu Lethaei secreto in gramine campi  
 25 concilia heroum juxta manesque beatos  
 26 Maeonium Ascraeumque senem non segnior umbra  
 27 accolis alternumque sonas et carmina misces :  
 28 da vocem magno, pater, ingeniumque dolori.  
 29 Nam me ter relegens caelo terque ora retexens  
 30 Luna videt residem nullaque Heliconide tristes  
 31 solantem curas ; tuus ut mihi vultibus ignis  
 32 inrubit cineremque oculis umentibus hausit,  
 33 vilis honos studiis. Vix haec in munera solvo  
 34 primum animum tacitisque situm depellere curis  
 35 nunc etiam labente manu nec lumine sicco  
 36 ordior adclinis tumulo, quo molle quiescis  
 37 jugera nostra tenens, ubi post Aeneia fata  
 38 stellatus Latiis ingessit montibus Albam  
 39 Ascanius, Phrygio dum pingues sanguine campos  
 40 odit et infaustae regnum dotale novercae.  
 41 Hic ego te (nam Sicanii non mitius halat  
 42 aura croci, dices nec si tibi rara Sabaei  
 43 cinnama, odoratas nec Arabs decerpsit aristas)  
 44 inferni cum laude laci sed carmine plango  
 45 Pierio ; sume et gemitus et vulnera nati  
 46 et lacrimas, rari quas umquam habuere parentes.  
 47 Atque utinam fortuna mihi dare manibus aras,  
 48 par templis opus, aeriamque educere molem,  
 49 Cyclopum scopulos ultra atque audacia saxa  
 50 Pyramidum, et magno tumulum praetexere luco.  
 51 Illic et Siculi superassem dona sepulcri  
 52 et Nemees lucum et Pelopis sollempnia trunci.  
 53 Illic Oebalio non finderet aera disco  
 54 Graiorum vis nuda virum, non arva rigaret  
 55 sudor equum aut putri sonitum daret ungula fossa ;  
 56 sed Phoebi simplex chorus, et frondentia vatum  
 57 praemia laudato, genitor, tibi rite ligarem.  
 58 Ipse madens oculis, umbrarum animaeque sacerdos,  
 59 praecinerem gemitum, cui te nec Cerberus omni  
 60 ore nec Orphea quirent avertere leges.  
 61 Atque tibi moresque tuos et facta canentem  
 62 fors et magniloquo non posthabuisset Homero,  
 63 tenderet et torvo pietas aequare Maroni.  
 64 Cur magis incessat superos et aena sororum  
 65 stamina, quae tepido genetrix super aggere nati



66 orba sedet vel quae primaevi conjugis ignem  
67 aspicit obstantesque manus turbamque tenentem  
68 vincit in ardentem, liceat, moritura maritum ?  
69 Major ab his forsan superos et Tartara pulsem  
70 invidia : externis etiam miserabile visu  
71 funus eat. Sed nec modo se Natura dolenti  
72 nec Pietas injusta dedit : mihi limine primo  
73 factorum et viridi, genitor, ceu raptus ab aevo  
74 Tartara dura subis. Nec enim Marathonia virgo  
75 parcius extinctum saevorum crimine agrestum  
76 flevit Icarium Phrygia quam turre cadentem  
77 Astyanacta parens. Laqueo quin illa supremo  
78 inclusit gemitus : at te post funera magni  
79 Hectoris Haemonio pudor est servisse marito.  
80 Non ego, quas fati certus sibi morte canora  
81 inferias praemittit olor nec rupe quod atra  
82 Tyrrhenae volucres nautis praedulce minantur,  
83 in patrios adhibebo rogos ; non murmure trunco  
84 quod gemit et durae queritur Philomela sorori :  
85 nota nimis vati. Quis non in funere cunctos  
86 Heliadum ramos lacrimosaque germina dixit  
87 et Phrygium silicem, atque ausum contraria Phoebos  
88 carmina nec fida gavisam Pallada buxo ?  
89 Te Pietas oblita virum revocataque caelo  
90 Justitia et gemina plangat Facundia lingua  
91 et Pallas doctique cohors Heliconia Phoebi,  
92 quis labor Aonios seno pede ducere campos  
93 et quibus Arcadia carmen testudine mensis  
94 Cydalibem nomenque fuit, quosque orbe sub omni  
95 ardua septena numerat Sapientia fama,  
96 qui furias regumque domos aversaque caelo  
97 sidera terrifico super intonuere cothurno,  
98 et quis lasciva vires tenuare Thalia  
99 dulce vel heroos gressu truncare tenores.  
100 Omnia namque animo complexus et omnibus usus,  
101 qua fandi vis lata patet, sive orsa libebat  
102 Aoniis vincere modis seu voce soluta  
103 spargere et effreno nimbos aequare profatu.  
104 Exsere semirutos subito de pulvere vultus,  
105 Parthenope, crinemque adflato monte sepultum  
106 pone super tumulos et magni funus alumni,  
107 quo non Monychiae quicquam praestantius arces  
108 doctaque Cyrene Sparteve animosa creavit.  
109 Si tu stirpe vacans famaеque obscura jaceres  
110 nil gentile tenens, illo te cive probabas  
111 Graiam atque Euboico majorum sanguine duci.  
112 Illa tuis totiens praestant se tempora sertis  
113 cum stata laudato caneret quinquennia versu  
114 ora supergressus regis Pylii oraеque regis  
115 Dulichii speciemque, comam subnexus utroque.  
116 Non tibi deformes obscuro sanguinis ortus  
117 nec sine luce genus, quamquam fortuna parentum  
118 artior expensis. Etenim te divite ritu  
119 ponere purpureos Infantia legit amictus  
120 stirpis honore datos et nobile pectoris aurum.  
121 Protinus exorto dextrum risere sorores  
122 Aonides, puerique chelyn summisit et ora  
123 imbuat amne sacro jam tum mihi blandus Apollo.

124 Nec simplex patriae decus, et natalis origo  
 125 pendet ab ambiguo geminae certamine terrae  
 126 te de gente suum Latiis ascita colonis  
 127 Graia refert Hyele, gravis, heu ! qua puppe magister  
 128 excidit et mediis miser evigilavit in undis ;  
 129 major at inde suum longo probat ordine vitae  
 130 [lacune]  
 131 Maeoniden aliaequae aliis natalibus urbes  
 132 diripiunt cunctaeque probant ; non omnibus ille  
 133 verus, alit victos immanis gloria falsi.  
 134 Atque ibi dum profers annos vitamque salutas,  
 135 protinus ad patrii raperis certamina lustris  
 136 vix implenda viris, laudum festinus et audax  
 137 ingenii. Stupuit primaeva ad carmina plebes  
 138 Euboea et natis te monstravere parentes.  
 139 Inde frequens pugnae nulloque ingloria sacro  
 140 vox tua : non totiens victorem Castora gyro  
 141 nec fratrem caestu virides clausere Therapnae.  
 142 Sin pronum vicisse domi, quid Achaea mereri  
 143 praemia nunc ramis Phoebi nunc gramine Lernae  
 144 nunc Athamantea protectum tempora pinu,  
 145 cum totiens lassata tamen nusquam avia frondes  
 146 abstulit aut alium tetigit Victoria crinem ?  
 147 Hinc tibi vota patrum credi generosaque pubes  
 148 te monitore regi, mores et facta priorum  
 149 discere, quis casus Trojae, quam tardus Ulixes,  
 150 quantus equum pugnasque virum decurrere versu  
 151 Maeonides quantumque pios ditavit agrestes  
 152 Ascraeus Siculoque senex, qua lege recurrat  
 153 Pindaricae vox flexa lyrae volucrumque precator  
 154 Ibycus et tetricis Alcman cantatus Amyclis  
 155 Stesichorusque ferox saltusque ingressa viriles  
 156 non formidata temeraria Chalcide Sappho,  
 157 quosque alios dignata chelys. Tu pandere doctus  
 158 carmina Battiadae latebrasque Lycophronis atri  
 159 Sophronaque implicitum tenuisque arcana Corinnae.  
 160 Sed quid parva loquor ? Tu par assuetus Homero  
 161 ferre jugum senosque pedes aequare solutis  
 162 versibus et numquam passu brevior relinqui.  
 163 Quid mirum, patria si te petiere relicta,  
 164 quos Lucanus ager, rigidi quos jugera Dauni,  
 165 quos Veneri plorata domus neglectaque tellus  
 166 Alcidae vel quos e vertice Surrentino  
 167 mittit Tyrrheni speculatrix virgo profundi,  
 168 quos propiore sinu lituo remoque notatus  
 169 collis et Ausonii pridem laris hospita Cyme  
 170 quosque Dicarchei portus Baianaque mittunt  
 171 litora, qua mediis alte permissus anhelat  
 172 ignis aquis et aperta domos incendia servant ?  
 173 Sic ad Avernales scopulos et opaca Sibyllae  
 174 antra rogaturae veniebant undique gentes ;  
 175 illa minas divum Parcarumque acta canebat  
 176 quamvis decepto vates non irrita Phoebus.  
 177 Mox et Romuleam stirpem proceresque futuros  
 178 instruis inque patrum vestigia ducere perstas.  
 179 Sub te Dardanius facis explorator opertae,  
 180 qui Diomedei celat penetralia furti,  
 181 crevit et inde sacrum didicit puer ; arma probatis

182 monstrasti Saliis praesagumque aethera certis  
183 auguribus ; cui Chalcidicum fas volvere carmen,  
184 cur Phrygii lateat coma flaminis, et tua multum  
185 verbera succincti formidavere Luperci.  
186 Et nunc ex illo fors an grege gentibus alter  
187 jura dat Eois, alter compescit Hiberas,  
188 alter Achaemenium secludit Zeumate Persen,  
189 hi dites Asiae populos, hi Pontica frenant,  
190 hi fora pacificis emendant fascibus, illi  
191 castra pia statione tenent : tu laudis origo.  
192 Non tibi certassent juvenilia fingere corda  
193 Nestor et indomiti Phoenix moderator alumni  
194 quique tubas acres lituosque audire volentem  
195 Aeaciden alio frangebant carmine Chiron.  
196 Talia dum celebras, subitam civilis Erinys  
197 Tarpeio de monte facem Phlegraeaeque movit  
198 proelia. Sacrilegis lucent Capitolia taedis,  
199 et Senonum furias Latiae sumpsere cohortes.  
200 Vix requies flammae necdum rogos ille deorum  
201 siderat, excisis cum tu solacia templis  
202 impiger et multum facibus velocior ipsis  
203 concinis ore pio captivaque fulmina defles.  
204 Mirantur Latii proceres ultorque deorum  
205 Caesar, et e medio divum pater annuit igni.  
206 Jamque et flere pio Vesuvina incendia cantu  
207 mens erat et gemitum patriis impendere damnis,  
208 cum pater exemptum terris ad sidera montem  
209 sustulit et late miseris dejecit in urbes.  
210 Me quoque vocales lucos Boeotaque tempe  
211 pulsantem, cum stirpe tua descendere dixi,  
212 admisere deae ; nec enim mihi sidera tantum  
213 aequoraque et terras, quae mos debere parenti,  
214 sed decus hoc quodcumque lyrae primusque dedisti  
215 non vulgare loqui et famam sperare sepulcro.  
216 Qualis eras, Latios quotiens ego carmine patres  
217 mulcerem felixque tui spectator adesses  
218 muneris ! Heu quali confusus gaudia fletu  
219 vota piosque metus inter laetumque pudorem !  
220 Quam tuus ille dies, quam non mihi gloria major !  
221 Talis Olympiaca juvenem cum spectat harena  
222 qui genuit, plus ipse ferit, plus corde sub alto  
223 caeditur ; attendunt cunei, spectatur Achaeis  
224 ille magis, crebro dum lumina pulveris haustu  
225 obruit et prensa vovet exspirare corona.  
226 Ei mihi quod tantum patrias ego vertice frondes  
227 solaque Chalcidicae Cerealia dona coronae  
228 te sub teste tuli ! Qualem te Dardanus Albae  
229 vix cepisset ager, si per me certa tulisses  
230 Caesarea donata manu ! Quod subdere robur  
231 illa dies, quantum potuit dempsisse senectae !  
232 Nam quod me mixta quercus non pressit oliva  
233 et fugit speratus honos : quam dulce parentis  
234 invida Tarpei caperes ! Te nostra magistro  
235 Thebais urgebat priscorum exordia vatum ;  
236 tu cantus stimulare meos, tu pandere facta  
237 heroum bellicae modos positusque locorum  
238 monstrabas. Labat incerto mihi limite cursus  
239 te sine et orbatae caligant vela carinae.

240 Nec solum larga memet pietate fovebas :  
 241 talis et in thalamos. Una tibi cognita taeda  
 242 conubia, unus amor. Certe sejungere matrem  
 243 jam gelidis nequeo bustis ; te sentit habetque,  
 244 te videt et tumulos ortuque obituque salutat,  
 245 ut Pharios aliae ficta pietate dolores  
 246 Mygdoniosque colunt et non sua funera plorant.  
 247 Quid referam expositos servato pondere mores ?  
 248 Quae pietas, quam vile lucrum, quae cura pudoris,  
 249 quantus amor recti ! Rursusque, ubi dulce remitti,  
 250 gratia quae dictis ! Animo quam nulla senectus !  
 251 His tibi pro meritis famam laudesque benignas  
 252 iudex cura deum, nulloque e vulnere tristem  
 253 concessit. Raperis, genitor, non indigus aevi,  
 254 non nimius, trinisque decem quinquennia lustris  
 255 juncta ferens. Sed me pietas numerare dolorque  
 256 non sinit, o Pylas aevi transcendere metas  
 257 et Teucros aequare senes, o digne videre  
 258 me similem ! Sed nec leti tibi janua tristis :  
 259 quippe leves causae, nec segnis labe senili  
 260 exitus instanti praemisit membra sepulcro,  
 261 sed te torpor iners et mors imitata quietem  
 262 explicuit falsoque tulit sub Tartara somno.  
 263 Quos ego tunc gemitus (comitum manus anxia vidit,  
 264 vidit et exemplum genetrix gavisaque novit),  
 265 quae lamenta tuli ! Veniam concedite, manes,  
 266 fas dixisse, pater : non tu mihi plura dedisses.  
 267 Felix ille patrem vacuis circumdedit ulnis ;  
 268 vellet et Elysia quamvis in sede locatum  
 269 abripere et Danaas iterum portare per umbras,  
 270 temptantem et vivos molitum in Tartara gressus  
 271 detulit infernae vates longaeva Dianae ;  
 272 sic chelyn Odrysiam pigro transmisit Averno  
 273 causa minor, sic Thessalicis Admetus in oris ;  
 274 si lux una retro Phylaceida rettulit umbram,  
 275 cur nihil exoret, genitor, chelys aut tua manes  
 276 aut mea ? Fas mihi sic patrios contingere vultus,  
 277 fas junxisse manus, et lex quaecumque sequatur.  
 278 At vos, umbrarum reges Aetnaeaeque Juno,  
 279 si laudanda precor, taedas auferte comasque  
 280 Eumenidum ; nullo sonet asper janitor ore,  
 281 Centauros Hydraeaeque greges Scyllaeaeque monstra  
 282 aversae celent valles, umbramque senilem  
 283 invitet ripis, discussa plebe, supremus  
 284 vector et in media componat molliter alga.  
 285 Ite, pii manes Graiumque examina vatum,  
 286 inlustremque animam Lethaeis spargite sertis  
 287 et monstrate nemus, quo nulla inrupit Erinys,  
 288 in quo falsa dies caeloque simillimus aer.  
 289 Inde tamen venias melior qua porta malignum  
 290 cornea vincit ebur, somnique in imagine monstra,  
 291 quae solitus. Sic sacra Numae ritusque colendos  
 292 mitis Aricino dictabat Nympha sub antro,  
 293 Scipio sic plenos Latio Jove ducere somnos  
 294 creditur Ausoniis, sic non sine Apolline Sylla.

## SOMNVS

S5\_4 v.1 Crimine quo merui, juvenis placidissime divum,  
 2 quove errore miser, donis ut solus egerem,  
 3 Somne, tuis ? Tacet omne pecus volucresque feraeque  
 4 et simulant fessos curvata cacumina somnos,  
 5 nec trucibus fluviis idem sonus ; occidit horror  
 6 aequoris et terris maria adclinata quiescunt.  
 7 Septima jam rediens Phoebe mihi respicit aegras  
 8 stare genas ; totidem Oetaeae Paphiaequae revisunt  
 9 lampades et totiens nostros Tithonia questus  
 10 praeterit et gelido spargit miserata flagello.  
 11 Unde ego sufficiam ? Non si mihi lumina mille,  
 12 quae sacer alterna tantum statione tenebat  
 13 Argus et haud umquam vigilabat corpore toto.  
 14 At nunc heu ! si aliquis longa sub nocte puellae  
 15 brachia nexa tenens ultro te, Somne, repellit,  
 16 inde veni, nec te totas infundere pennas  
 17 luminibus compello meis (hoc turba precatur  
 18 laetior) : extremo me tange cacumine virgae,  
 19 sufficit, aut leviter suspenso poplite transi.

## EPICEDION IN PVERVM SVVM

S5\_5 v.1 Me miserum ! neque enim verbis sollempnibus ulla  
 2 incipiam nec Castaliae vocalibus undis  
 3 invisus Phoeboque gravis. Quae vestra, sorores,  
 4 orgia, Pieriae, quas incestavimus aras ?  
 5 Dicite, post poenam liceat commissa fateri.  
 6 Numquid inaccesso posui vestigia luco ?  
 7 Num vetito de fonte bibi ? Quae culpa, quis error  
 8 quem luimus tantis ? Morientibus ecce lacertis  
 9 viscera nostra tenens animaque avellitur infans,  
 10 non de stirpe quidem nec qui mea nomina ferret  
 11 oraque ; non fueram genitor, sed cernite fletus  
 12 liventesque genas et credite planctibus orbi :  
 13 orbus ego. Huc patres et aperto pectore matres  
 14 conveniant ; cineremque oculis et crimina ferte !  
 15 si qua sub uberibus plenis ad funera natos  
 16 ipsa gradu labente tulit madidumque cecidit  
 17 pectus et ardentis restinxit lacte papillas,  
 18 quisquis adhuc tenerae signatum flore juventae  
 19 immersit cineri juvenem primaque jacentis  
 20 serpere crudelis vidit lanugine flammis,  
 21 adsit et alterno mecum clamore fatiscat :  
 22 vincetur lacrimis, et te, Natura, pudebit.  
 23 Tanta mihi feritas, tanta est insania luctus.  
 24 Hoc quoque cum nitor ter dena luce peracta  
 25 adclinis tumulo, planctus in carmina verto,  
 26 discordesque modos et singultantia verba ;  
 27 molior orsa lyra : dolor est atque ira tacendi  
 28 impatiens. Sed nec solitae mihi vertice laurus  
 29 nec fronti vittatus honos. En taxea marcet  
 30 silva comis, hilaresque hederas plorata cupressus  
 31 excludit ramis ; nec eburno pollice chordas  
 32 pulso, sed incertam digitis errantibus amens

33 scindo chelyn. Juvat heu ! juvat inlaudabile carmen  
 34 fundere et incompte miserum laudare dolorem.  
 35 Sic merui, sic me cantuque habituque nefastum  
 36 aspiciant superi. Pudeat Thebasque novumque  
 37 Aeaciden : nil jam placidum manabit ab ore.  
 38 Ille ego qui (quotiens !) blande matrumque patrumque  
 39 vulnera, qui vivos potui mulcere dolores,  
 40 ille ego lugentum mitis solator, acerbis  
 41 auditus tumultis et descendentibus umbris,  
 42 deficio medicasque manus fomentaque quaero  
 43 vulneribus, sed summa, meis. Nunc tempus, amici,  
 44 quorum ego manantes oculos et saucia tersi  
 45 pectora : reddite opem, saevas exsolvite gratis.  
 46 Nimirum cum vestra domus ego funera maestus  
 47 increpitans : "Qui damna doles aliena, repone  
 48 infelix lacrimas et tristia carmina serva."  
 49 Verum erat : absumptae vires et copia fandi  
 50 nulla mihi, dignumque nihil mens fulmine tanto  
 51 repperit : inferior vox omnis et omnia sordent  
 52 verba. Ignosce, puer : tu me caligine maestum  
 53 obruis a ! durus. Viso si vulnere carae  
 54 conjugis invenit caneret quod Thracius Orpheus  
 55 dulce sibi, si busta Lini complexus Apollo  
 56 non tacuit, nimius fortasse avidusque doloris  
 57 dicor et in lacrimis justum excessisse pudorem.  
 58 Quisnam autem gemitus lamentaque nostra rependis ?  
 59 O nimium felix, nimium crudelis et expers  
 60 imperii, Fortuna, tui, qui dicere legem  
 61 fletibus aut fines audet censere dolendi !  
 62 Incitat heu ! planctus ; potius fugientia ripas  
 63 flumina detineas rapidis aut ignibus obstes,  
 64 quam miseros lugere vetes. Tamen ille severus,  
 65 quisquis is est, nostrae cognoscat vulnera causae.  
 66 Non ego mercatus Pharia de puppe loquaces  
 67 delicias doctumque sui convicia Nili  
 68 infantem lingua nimium salibusque protervum,  
 69 dilexi : meus ille, meus. Tellure cadentem  
 70 aspexi atque unctum genitali carmine fovi  
 71 poscentemque novas tremulis ululatibus auras  
 72 inserui vitae. Quid plus tribuere parentes ?  
 73 Quin alios ortus libertatemque sub ipsis  
 74 uberibus tibi, parve, dedi ; heu ! munera nostra  
 75 rideres ingratus adhuc. Properaverit ille,  
 76 sed merito properabat, amor, ne perderet ullum  
 77 libertas tam parva diem. Nonne horridus ipsos  
 78 invidia superos injustaque Tartara pulsem ?  
 79 Nonne gemam te, care puer ? quo sospite natos  
 80 non cupii, primo gemitum qui protinus ortu  
 81 implicuit fixitque mihi, cui verba sonosque  
 82 monstravi questusque et vulnera caeca resolvens,  
 83 reptantemque solo demissus ad oscula nostra  
 84 exexi, blandoque sinu jam jamque cadentes  
 85 exsopire genas dulcesque accersere somnos.  
 86 Cui nomen vox prima meum ludusque tenello  
 87 risus, et a nostro veniebant gaudia vultu.